


ÛJAADIKÀ DÎYÌ DYÈNDÈ

 Twinyikààyikù mitu bwà katancì kakesè cyanààna. Taatù wa mu Dyulu munanga, tudi ne kusàkidila bwà patùdi kaaba aka dilòlò edi. Twètù, tudi ne kusàkidila bwà patùdi bamanyè ne Bwikadi Bwèbè bùdi neetù kaaba aka. Mpindyewu tudi tulòmba bwà Wèwè kwambulwisha yònsò wa kutùdi, bilondèshile dijinga ditùdi naadì. Tudi tulòmba nùnkù mu Dîna dyà Yesù. Amen. (Sòmbaayaaku.)

Byùmvwika ànu bîmpè bwà kwikalakù ne bikòlokolo ebi byasa ku nzembu. Mwawa muumvwè bibì be mùmvwa mwenza bu mubinyanga makèèlèla awu, Mukenji wùmvwà muswè ngamba kufwà bwà nwènù kupeta.

² Ne mvwa muswè bwà nwikalè batwishiiibwe bwà kucimòna. Cìdi lwo—lwongò lutùdi naalù. Katwèna beela lwongò kùdi èkèleeziyà kampànda to. Tudi beelè lwongò mu Kilistò, nudi numona's. Yèyè ki Njila umwèpelè awu. Yèyè ki mwaba wùmwèpelè wà dikùbiibwa, mwaba wùmwèpelè wùdiku Nzambi mutèèkemù Dîna Dyèndè. Ne Nzambi wàkamba ne Ûvwa mwà kutwilangana ne bantu mu mwaba wùvwàYe musungùle bwà kutèèkamù Dîna Dyèndè; kamùyi mu ciibi kanà cyònsò to, kadi mu ciibi cidiYè musungùle. Nènku mu wòwò mwaba awu mmùvwàYe mwà kutwilangana ne bantu, ne ànu mwómò amu nkààyaamù. Nènku tudi tusangana ne Nzambi kacya kàtukù mutèèke Dîna Dyèndè mwaba nànsha umwè to ànu mu Mwân'Èndè, Yesù Kilistò, ànu mùdibi ne mwànà misangu yònsò ùtu wàngata dîna dyà taatù.

Kadi mpindyewu wèwè udi wamba ne: “Èè, aci cidi cyàngaciibwa bìshi leelù? Muntu ne muntu ùdi wàmbà ne: ‘Mèmè ndi munda mwà Yesù.’”

³ Yèyè's ùdi Dîyì. Ne: “Ku cibangidilu kwàkadi Dîyì, ne Dîyì dyàkadi ne Nzambi, ne Dîyì dyàkadi Nzambi. Dîyì dyàkavwijiibwa mubidi ne dyàkasòmbela munkaci mwètù.” Kàbidi, bààkafunda kàbidi mu Bwàkabuulwibwà nshapità wa 19, patùdi tuMumòna ùlwa, Mukàji-musèla ne Mubàki, cinkùtù Cyèndè cizabika mu Mashì ne: “Dîna Dyèndè òvwa dìbiikidiibwa ne n'Dîyì dyà Nzambi.” Yèyè ùdi Dîyì dyà Nzambi.

⁴ Nènku, mbwena kwamba ne, Yèyè ki bukolè bufùùluludi. Yèyè ki Nyumà Mwîmpè mbwena kwamba ne, bu—bukolè bwendeshi bùdi bùbwelà mu byamù bilamakaja abi, Mèyi, bùdi bùAvwijà ne mwoyi. Nènku bìkengela bwà byònsò bìkwatè mudimu pàmwè, cyanààna kabyàkukùmbanakù to. Bìkèngela ciikalè Bible mujimà, Kilistò yònsò nkòng, Èvànjeeliyò mu kaabujimà.

⁵ Ndi muswè kwambila, beena muyiiki wa ku cisanji wûmvwà mbandila ku tèlèviziyô makèèlèlè dilòòlò, bu mûmvwà mumanyè ne wûvwà mwà kwediibwa, ki mêmè kuwùbandila. Ndi muswè kwela nsèke ku bìvwà bânà bèètù aba bambè abi, biinè bàvwà ku muyiiki wà ku cisanji abu, mudimu mwowela byanza wà dyandamuna ku nkonko's! Ne mêmè ndi mudyudi wa dikèma, nudi bamanyè's, twamb'eku twamb'eku, kàdi kakùvwà cyà didyûlamù to. Kakùyì mpatà to cìvwà cyà cyà bushùwà, ne mvwa mwà kwitaba aci, lukàmà pa lukàmà. [Disangisha didi dituuta bikàshi—Muf.] Twasàkidilaaayi. Amen. Mandamuna awu àvwà mu wôwò kakùyì cyà didingila to. Mvwa muànyishe cyà bushùwà. Mvwa ànu kujinga kwikalakù ne mukàbà wà bindidimbi wà dilèèjakù mu èkèleeziyà mwànyì kwètu. Bìvwà bilenga byà kacya.

⁶ Ne ndi ne kusàkidila kwàbûngì bwà kumanya ne—ne Nzambi mmukwàte mudimu mu bipaapu bikwàbò, pa kuumusha kasumbù kèètù sungasunga kàà beena Mpenta, usòbola bantu, mamiinu à Nzambi awu, àvwà àsanganyibwà pambèlù pààpa munda mwa bidimu byònsò ebi, mindile bwà Bukènkè bùbàteemènè.

⁷ Ne cìdi kàbìdì citùpèèsha didìmwija's, nwènù balundà bàànyì, bwà kumanya ne Yesù wàkamba ne: “Pààkatwàdijà virgò mukùtākàne ewu kubwela bwà kusumba Maanyì, apu ki pàvwà Mubàki ùlwa.” Pa nànkù tudì mwà kumwèna ku cyôci aci, patùdì tumòna ba-Épiscopaliens, ba-Presbytériens, ba-Méthodistes, ba-Baptistes, ba-Luthériens, bàbwela bwà kupeta Maanyì, piinè apu's ki dîbà dyàkalwà Mubàki adi. Twikalàayi bavùlùke aci.

⁸ Kacya ncitukù mwanji kuumvwa Billy, mwanàànyì wa balùme ewu, ùngambila cintu cyà bwena cidiye mungambile, ànu katanci kakesè aka to. Wàmbi ne: “Papa, ncyèna nkwambila cyà dyenza to. Ncyèna ne meeji à kukukèmesha ku kantu nànsha kàmwè to, kàdi,” yèyè ne, “papa, cyònsò cyùdì wenza, fila dîbà dyèbè dyònsò bwà babèèdì abu.” Yèyè ne: “Kacya ncitukù mwanji kumòna babèèdì búngì nùnkù to!” Yèyè ne: “Ndi mufile twartà nkàma yìbìdì ànu mu kasuna kàmwè anyì túbìdì cyanààna.” Yèyè ne: “Kùdì babèèdì búngì cyanààna!” Yèyè ùtu ùngambila aci ku mpùkàpùkà menemene.

⁹ Nènku ndi mulwè dilòòlò edi ne tuntu tukesè ndambù tufùnda kaaba aka, ne ndambù wa nsèke pa cilumbulwidi cìcilwàlwa, ne mumanyè ne tudì basòmbe kaaba aka dilòòlò edi ne cijì cikolè cyà Nzambi cituuta mwinshì mwètù mwà buloba, ne abidi aa necituute bikole. Ne mumanyè ne cijì cikolè cyà Nzambi ncindile; ànu pa dîbà dyàmbiibwàci, nekùjikè, bwà mìlìyò yà bantu. Ne bu mùndì mumanyè aci munda mwà mwoyi wànyì, ne mumanyè ne nebùikalè nànkù! Nènku dîbà adi tudì tumòna babèèdì búngì cyanààna, bàsukuma ne bàkoka.

¹⁰ Ki mémè kudyàmbidila ne: “Dilòòlò edi, bààbúngì bàà kùdìbo mbeena Kilistò.” Nènku lekèlaayi ngàmbè bwalu ebu, nwènù bàna bàà Nzambì. Cyònsò cyùdi wenza, lekèlè bikwàbò byònsò. Kwàcilà wèwè Nzambì mudimu, butùku ne muunyà, ne mwoyi wèbè wònsò. Wèwè, udi mwà kuumvwa ne kùdi cintu kampàndà cibì. Udi mwà kucyùmvwa paùdi wenda mu mìsèèsù apu, udi ànu . . . ne kwònsò kúyaaya aku. Udi mumanyè’s, wèwè wa nyumà; ne mémè ndi mumanyè ne ki cyùdi.

¹¹ Nènku mvwa nyiikila ne muntu kampàndà, Mwanèètù Stromei. Ncyèna mumanyè Tony ní ùdi kaaba aka, anyì kènàpu. Yèyè, yèyè uvwa . . . [Mwanèètù kampàndà ùdi wàmba ne: “Tony Salameh anyi?”—Muf.] Tony Salameh, Salameh, Salameh? To. Ndi ne Tony udi kàyi yèyè to. [Mwanèètù kampàndà ùdi wàmba cintu kampàndà.] To, awu n’Tony udi kàyi yèyè to. Ewu Tony yèyè ngwa mu—mu—mu Tucson. Dyèndè nganyì? [Muntu mukwàbò ùdi wàmba ne: “Stromei.”] Stromei! Ndi mumanyè ne n’Salameh, Stromei, anyì kampàndà. Ndi ne byònsò . . .

¹² Mu màkàjiiyì èndè, ditùku adi, mwàkabwela muntu, uvwa wa ùkòka ntèmà, ùvwa wàmba cintu kampàndà cyàkamvùlwijà, pàmvwà . . . musangu wà ndekeelu wùmvwà nsanganyibwa mu—mu Inde.

¹³ Mwómo amu, ngeela meeji ne mmwàkatùpèèsha Mukalenge musùmbù wà mutàmbe bunènè wutùkaadiku bapetè musangu wùmwè, mùvwa mmu Bombay. Katùvwaku mene mwà kupeta myaba yà kubàtèeka to, makùmi à binunu ne binunu byà bantu.

¹⁴ Ne ànu kumpàla kwà kukùfika, kùvwa cibèjibèji kampàndà cikùdimuna. Èè, cìvwa, Inde nditunga dyà bààkula myakulu yìbìdì, cìvwa—cìvwa cibèjibèji cyà mu Anglais. Nènku cyàmba ne: “Èè, dikanka dyà buloba dìdì ne cyà kwikala dijikè, nyuunyi yìkaadi yìbùuka yàlukila kwàyì ku maswa.”

¹⁵ Ndambu wa matùkù kumpàla kwà dikanka dyà buloba adi kwenzekadi, òvwa dyupùle mpangu ne bikwàbò adi. Tunyuunyi tukesè tùdi tùdipetela bisokomenu mu mbwebwe, ne twibaka maswa àātu; ne mu mapingaja anyì mu nkànkala, pàdi dībà dyòshà bikolè menemene apu, nyama yònsò yìdi yimanyina ku myelelu yà bimanu byà mabwe abi, bwà kubwela mu ditalàjà. Kàdi munda mwa matùku abidì, nyuunyi yàkashàadila mu mìci, kayiyikù mwà kwalukila mu maswa àyi to; ne munda mwà matùku abidì, nyama, mìkòòkò ne ngombe, kayìvwakù mwà kusemena pabwìpì mu mapingaja amu, anyì kushààla kacya yìmana pabwìpì ne bimanu abi to. Yà—yàkashààla pambèlu mu madimi ne myeyèmènàngàne ewu ne mukwèndè, bwà kupeta dilèji.

¹⁶ Pashìishe dyàkamwè, ki dikanka dyà buloba edi pwàà, aci kàdi kunyùkushaci bimanu ne kuupulaci nzùbu. Nènku, nwamònu’s, bu ne tunyuunyi tukesè atu tuvwa túsanganyibwa muntwwamu, nùnkù’s ntufwè. Bu ne ngombe ayi yìvwa mishààle

miimànyine mwînshì mwàbì amu, ne mikòòkò, nùnkù's mmifwè. Nzambì ùdìmwija bufùkì's!

¹⁷ Kùkaadi ndambù wa matùkù, mu màkàjiinyi à Mwanèètù Tony mwàmwa, mvwa munkaci mwà kutèèleja muntu mwaba awu wàmba ne... Pààkenzekà dikanka dyà buloba edi mu Alaska, yèyè ùvwa munkaci mwà kulòba mu citùtù tubiikila ne Stony Point, mu Mexique mwàmwa. Ki kwambayè ne: “Nyuunyi kayivwakù mwà kudyà to, ne mishipa kayivwakù mwà kudìlìlà to. Kùvwa cintu kampàndà cyà kacìyi mu cyôci to. Nènku, dyàkàmwè, dikanka dyà buloba adi kukùtukadi.”

¹⁸ Nènku ditùkù adi, pààkenzekà dyôdi adi mu Inde amu, anyi kwónsò kùvwàbì aku, kwambayè ne ùvwa cyàkàbìdì munkaci mwà kulòba. Yèyè kudyàmbidila ne: “Èè, s'mwalu bwà dikèma. Mishipa ayi's yitu yidìlìlà lwà pa díbà edi. Kakwèna divwala pa màyi to, mwaba nànsha wùmwe. Màyi àdi ànu matalàle, cikondo cimpè cyà mishipa yidìlìlà, kàdi kayivwakù yidìlìlà to. Ne nyuunyi yónsò yitù pa ciibidilu yisanganyibwa pambèlu apu ayi, byambula-mishipa, yitù yàngulangana ne mishipa ayi ne bikwàbò abi, yivwa yónsò yènda yìnyùngulukila ku mwelelu wà màyi, myeyèmènàngàne. Mu katanci kakesè, ntutu ya mwînshì mwà mbù kubangayi kubànda mùshindù ewu, dikanka dyà buloba divwa dyenzèkèle dyàmwàmwa ku luseke lukwàbò lwà buloba.” Nwamònu's, mishipa ayi yivwa mimanyè ne kùvwa cintu kampàndà cibì, cintu kampàndà cìvwa pabwìpì ne kwenzeke. Nyuunyi ayi yàkamanya byà mwomùmwe.

¹⁹ Cyà bushùwà, piikalà Nzambì ùpèèsha mushipa ne nyuunyi dijingulula, mmùshindù kaayi mutàmbidile wiikalàYe ne cyà kupèèsha bânà Bèndè—Bèndè! Tudi bamanyè ne tudi ku cikondo cyà nshìkidilu, ne cilumbulwidi ncindile, pa nànkù twikalàayi ne kaneemu kàa menemene. Nyeemènaayi kùdì Nzambì ne mwoyi wènu wónsò! “Éyi Kaapènùmà, wèwè udi mubàndishìibwe too ne mu dyulu awu, neùpwekeshiibwè too ne mu ifernò,” kàdi leelù ewu yèyè's ùdi ùsanganyibwa mwînshì mwà panshì pàa màyi. Ikàlaayi ànu bavùlùke, ne nusambila.

²⁰ Mpindyewu, dilòòlò edi, ndi muswè kubala kaaba mu Mifundu emu, bwà katanci kakesè cyanàànà. Netwikalè mwà kusambidila babèedi. Billy mmwambè ne mmwabànye mushikì mujimà wà twarta twà disambila. Ne mmufile tukwàbò makèèlèlè awu, kàdi ncìvwa kù mufikè nànsha ku umwe wa kùdìbo makèèlèlè dilòòlò awu to. Ki mèmè kudikonka, pàalu Nyumà Mwîmpè... Cìdi ànu... Kwèna mwà kuMufikisha ku dikwàtà dyà mudimu to. Mbyenzè ànu mùdì kakombo kakesè kampàndà, kàudi ukòka udyela wèwè mwinè mu biteshì. Nwènù mbàdì bàfikishà Nyumà Mwîmpè ku dikwàtà dyà mudimu, kì mmèmè to. Nwènù biinà mbàdì bènza nànkù awu. Pa nànkù mèmè, makèèlèlè dilòòlò, mvwa mumòne mene mu dijingulula amu ne, kadivwa nànsha dyendè bîmpè menemene kùdì bantu to. Kabàvwa bamwèke bu ne bàvwa bacyàngata ne mushinga to.

Ndi mucijandùle, kaaba aka pashiishe ne, bidi bîmweka bu ne, too ne mu mûshindù kampànda, ànu mûmvwà ngaakula, bwa ditentekela dyà babèèdi byanza, bôbô's bàvwa bamanyè.

21 S'бивва bikèngela bwà twètù kufika ku dyumvwa ne
tudi bapèèbwe mu twètù emu, twètù bàdi biitabùùje Yesù
Kilistò ne balediibwe kùdi Nyumà Wendè ne buujiibwe tètè
ne bukolè bufuùluludi abu aba, bukolè bùdi munda mwènù
abu. Ku ditentekelangana dyà byanza, pa bakwàbò, mwàkènzà
bayiidi ne munda mwà bikondo, Kakùyi mpatà to Wàkondopa
babèèdì, kubiisha bafwè, Wàkaleeja bikèènà-kumòna, bipròfetà.
Ne Nyumà mene umwèumwè uvwa musòmbèle munkaci mwà
bàpostòlò bàà ku cibangidilu awu ùdi ne mwoyi mu èkèleeziyà
leelù ewu, wènza bintu ànu bimwèbimwè abi. Patùdiku mwà
kucijingulula ne lùkàsà lwònsò! Nwamònu's, nànsha ciikàle
ciikwàa mudimu bishi, bikèngela ucijingululè ne ucitabùùje.
Kacyàkukwàcishakù to nànsha kakesè, paudi kuyi mucitabùùje.
Kàdi dìbà dyùdi ànu ucitabuuja, ntàtù yèbè yàjikì. Aci ncilelèlà.

²² Mpindyewu tubuululààyaaku mu Mifundu. Mwawa musömbe mwaba awu, kùkaadi katanci, mèmè kufundà ndambù mukwàbò wa Mifundu, bwà kushintulula cyena-bwalu cyànyì bwà dilòòlò edi. Nènku ndi mushe kupalakù ndambù mu Dîyì dyà Nzambi, mu Mukàndà wa Luukà Munsantu, nshapità wa 8, kubangala ku mvensà wa 40. Tèèlejààyaaku mpindyewu, nêmbalè byàbùngi.

Nènku byàkenzeka, ne, pààkaalukilà Yesù, bantu bààkamwakidila ne disànkà, bwalu bônso bàrwa bamwindile.

Aci kî ncifwànyìnekù kwikala lwìdì lwìmpè bwà musùmb'ewu dilòòlò edi anyì?

Nènku, mònaayi, kulwakù muntu dìnà dyèndè Yayilò,
ne yéyè awu úwà mukòòkeshi wa nsunàngòngà:
ne wàkadyèla panshì ku makàsà à Yesù, ne
wàkamusèngeleela bwà àbwelèkù mu nzùbu mwèndè:

Bwaly yêyê ùwwa ne mwânà wa bakàjì umwèpelè, wa bidimu bitwè ku dikùmi ne bìbìdì, ne ùwwa mulàadika ùpùnga ne lufù. Kàdì pàvwàye ùyakù bantu bààkamukùngwila.

Nènku mukajì kampàndà mwikàle ne disaamà dyà mashi àlwa munda kùkaarwa bidimu dikùmi ne bibidì, ùkaarwa mutuùle byèndè byônso ku bangàngàbukà, kàyi mwà kwondopiibwa nànsha kùdì umwè to,

*Wakalwila paanyimà pendè, ne kulengayè luzemba
lwà civwàlù cyèndè: ne dyàkàmwè dîsaamà dyèndè dyà
mashi àlwa munda adi dyàkakàma.*

Ki Yesù kwambayè ne: Nganyì wândengì awu? Pààkavilà bônso, Peetèlò ne bàrwàye naabò kwambabò ne, Mulongeshi, musùmbà ewu's mmukukùngwile ne

wùkusàkila, kàdi wêwè wamba ne, Nganyì wândengi awu?

. . . Yesù wàkamba ne: Muntu kampànda mmundengè, bwalu ndi njingulula ne bukolè mbupàtùke mu mèmè.

Nènku pààkamònà mukàji awu ne kàvwa musokòme to, wàkalwa wènda ùzakala, ne wàkudyèla panshi kumpàla kwèndè, ne wàkamwambila kumpàla kwà bantu bònsò bwà cinyi wàkamulenga, ne mwàkondopiibwàye dyàkamwè.

Ki yêyè kumwambila ne: Mwanàànyì wa bakàji, kolà mwoyi: diitabuuja dyèbè dyàkwondòpù; ndààku mu ditalala.

Nènku pàrvwàye . . . wàkula, mwaba awu kulwakù muntu kampànda ùfùmina kwà mukòòkeshi wà nsunàngòngà awu, ùmwambila ne: Mwanèèbè wa bakàji wáfù; kùtácishi Mulongeshi nànsha.

Kàdi pààkacyùmwà Yesù, wàkamwandamuna, wamba ne: Kucìinyi nànsha: itàbùùjà nàka, nènku yêyè neàsangajìbwe.

Nènku pààkalwàye kubwela mu nzùbu amu, kààkiitaba bwà muntu nànsha umwe àbwelè to, pa kuumusha Pèetelo, . . . Yakòbò, ne Yònè, ne tatwèndè ne mamwèndè wa mwàna wà bakàji.

Ne bònsò bàvwa bàdila myádi, . . . bànyingalala bwèndè yêyè: kàdi kwambayè ne: Kanùdidi to; kì mmufwè to, kàdi mmulààle tulù.

Ki bóbò kumuseka byà bàmudyombola, bu mùvwàbi ne yêyè ùvwa mufwè.

Kàdi yêyè kubàpàtula bònsò pambèlu, ne kumukwàtayè ku cyanza, e kubùikilayè nsongààkàji awu, wamba ne: Nsongààkàji, juukà.

Ki nyumà wèndè kwalukilayè, ne yêyè kujuuka dyàkàmwè: ne yêyè kutùma dìyì bwà kumupèèshabò cyàkudyà.

Ki baledi bèndè kukèmabò, kàdi kubàtùminayè dìyì bwà kabàmbidi muntu nànsha umwe cìvwà cyenzèke aci to.

²³ Mpindyewu tùsambilàayi. Taatù wa mu Dyulu munanga, patùdì tubala Dìyì edi apa, tudi bamanye ne aci mbulelèlè. Eci ncyenzèke. Kì mbwalu kampànda bukwàtakaja butùdì bafwànyine kubala pàmwàpa mu cibèjibeji anyì mu mukànda kampànda wà maalu mafwikakaja to, kadi eci ncifùmìne mu Mukànda wutùdì bamanyè ne n'Dìyì dyà Nzambì. Tudi twitabuuja ne ncyenzèke. Tudi twitabuuja ne Yesù uvwa mwenze cintu cyà cikèmesha eci ewu, misangu yìbìdì kaaba aka, cyà

mukàjì uvwa ne mashi àlwa munda awu, ne mwânà mufwè awu, tudì twitabuuja ne Yêyè ùdi Mwânà wa Nzambi, ne Nzambi wàkaMubiisha ku bafwè ne muMulèèje kutùdì, dilòòlò edi, mu mupersonà wà Nyumà Mwîmpè.

²⁴ Ne tudì twitabuuja ne Ùdi neetù kaaba aka dilòòlò edi. Ne biikàle twitabuuja ne Yêyè ùdi umwèumwè awu makèèlèlè, leelù, too ne kashidi, luse Lwèndè lùdi lùya kùdi bantu. Ne pàdi bantu bàMwolwela byanza apu, bipeta bîmwèbîmwè byàkafidiibwà mu ditùkù adì abi nebifidiibwè mu ditùkù edi. Enzàku nànkù cyàkàbìdì, Taatù, bwà twamònakù mwà kupeta dilaabibwa dipyadiyà. Ànu mwàlòmbu Mwanèètù Shakarian ne meeji matòòke ònsò, katancì aka, ne mulòmbè batèèleji bwà kwitabuujabò amu, tudì tulòmba kàbìdì mu Dînà dyà Yesù Kilistò. Amen.

²⁵ Ndi muswè kwakula ànu bwà katancì kakesè cyanàànà, ne neciikàlè bushuwa ànu bwà katancì kakesè cyanàànà, bwalu ndi muswè kufikisha bantu bàdi ne twartà twà disambila abu lwà kùneeku bwà kubàsambidila. Ne mwikàle nteeka cyònsò cikwàbo ku luseka ànu kusambidila kwà babèèdì. Kàdi kumpalà kwà twètù kusambidila babèèdì, bikengela tùfikishè bantu mu lwidì alu. Lwidì kî lùdi misangu yònsò lùtwàla bipeta. Ndwidì lùdi uya naalù kumpalà kwà Nzambi.

²⁶ Muntu mukàji kampàndà nyêyè ewu mulengè civwàlù Cyèndè, kwondopiibwayè, ku mashi àlwa munda. Disàlaayi dyàkaMutwila matè mwisù ne kuMwasa cifulu cyà mèbà ku mutù, kàdi kàyi mwà kuumvwakù bukolè abu nànsha bùmwe to.

²⁷ Mmùshindù wùdi usèèmena. Lwidì lwèbè ndùdi lùkèngela. Ne cyòci aci kî cidiku dilòòlò edi, mulundà wanyì munanga, bìdi bikèngela lwidì. Tudì, ne twitabuuja ne tudì, mu Bwikadi bwà Yesù Kilistò, kàdi lwidì lwèbè ndùdi lùtwàla bipeta. Byamù bilamakaja bìdi apa, ne kî mùdi kàbìdì bukolè bwendeshi. Bu nwènù ànu mwà kubanga cynàànà, Nzambi neénzè bìdi bishààla.

²⁸ Mpindyewu, cyena-bwalu cìndi njinga kwakulapù eci, munda mwà katancì kakesè emu, cidi ne: *Újààdika Dìyì Dyèndè*. Mpindyewu aci's ncintu cinènè, cyà kwela meeji pa bwalu abu ne: *Újààdika Dìyì Dyèndè*.

²⁹ Mpindyewu Nzambi ùdi ne bukolè bwà kujaadika Dìyì Dyèndè, dilòòlò edi, ànu mùkaadiYè mujaadikèjàadike. Ne Bible kàbìdì mmwambè ne: "Nùkenketè bintu byònsò. Nùkwatè bikolè ku cidi cîmpè."

³⁰ Mpindyewu nukààdiku bumvwè, kakùyì mpatà to, bumvwè lusùmwinu lwà kale alu lwà ne: "Úcìjaadikè, nènshiishè kuciitabuuja." Kàdi aci kacỳèna cikumbana to. Nkààdikù mumònèmòne bintu bijaadikiibwe misangu ne misangu, byà bwalu bijaadikiibwe bilondèshile maalù à mamanya kabiyi

dyela mpatà to, kàdi nànsha nànkù bantu kabàiyikù babiitabuuja to nànsha bishi.

³¹ Mwva nyiikilangana ne muntu kampàndà, ànu àbìdì àdì panshì àà. Tuvwa twakula bwà dyondopa dyà kùdì Nzambì. Yèyè ne: “Mémè ncyèna mufwànyinekù kuciitabuuja to. Cidì cìfwànyine kwenzeka nànsha ciikàlè cinganyì, nànsha wèwè mwà kucileeja ne bijaadiki búngì munyì, mémè ncyèna ànu ncìitabuuja to.” Èè, cyà bushùwà, cyùdì mufwànyine kwenzela muntu awu nànsha ciikàlè cinyì, yèyè’s—yèyè’s mmujimine. Kèna mwà kwitabuujakù to. Kakwèna cintu nànsha cimwè munda mwèndè amu to, bwà kwitabuujayè.

³² Ndi mfùma ku dyenza kaa—kaadilabula kakesè mwab’ewu, kùkaadi bu lumingu lujimà nànkù awu, ànu munùdì bônso bamanyè ne mémè ntu—ntu ngenza bulembi. Nènku pàngálùkidì mfùma ku disangisha dyànyì, mwva muyè kalemba nyama wa ntambwe. Nènku paanyimà pàà mémè mumwàngèèle mu Arizona, mbìmpè, ntu muswè kuya kalemba nyama minènè, ne ntu munangè kupàtuka kuya mu bufùkì bwà kubùbandila.

³³ Mpindyewu, mémè ncyèna muyishebeyi to. Ntu ànu nya kulemba. Pa nànkù, ncì—ncìtu muswè kubùtula nyama yà mwitu to, ncyèna—ncyèna ngeela meeji ne mbìmpè to. Ndi ngeela meeji ne cidì ànu mpèkaatù bwà kushipa nyama yà mwitu, paùdì kùyi ne cyà dyenza naayì ne kùyi naayì mudimu mu kiipàcìlà kampàndà to, ànu mùdìbì bifwànyine kwikala bwà kushipa bintu bikwàbò byònsò ebi. Ndi ngeela meeji ne mbìbì. Kabìvwa bìkèngela twètù kwenza nànkù to. Nzambì mmutùpèèsheyi bu byàkudyà ne bwà twipàcìlà kampànda, kàdi kabìvwa bìkèngela twètù kubìbùtula to. Kàdi mpindyewu cidì mikenji yàmba ne nudi mwà kwangata aci, mbìmpè. Kanùcinyangàkàjì ànu cyanàànà to.

³⁴ Nènku mémè kuntwaku, muvù awu wùkaadi mujikè bwà bintu bikwàbò byònsò. Ntambwe yitu yishebeya ngombe búngì cyanàànà. Ne ntu mumanyè beena mudimu batàngidi bàà bimunà mu maafermè mu ditunga emu. Ne musangu wònsò wùdìbò bàsangana bimunà bishebeya, mòna’s, bàdì bàmbiikila, pàdì nyama wa ntambwe mubwelè munkaci mwà mìkòòkò. Mulundà wanyì kampàndà, dilòlòlò adi, mmujimije ndola mitwè ku binunu bisatù ne nkàmà yìtaanu, mu dilòlò dimwèpelè, bwà nyama wa ntambwe mwèpelè mushebèye ànu twànà twà mìkòòkò pa twòtù. Yèyè kuditwamù, nènku, mu bushùwà bwà bwalu, nebikengelè bwà nyama mikwàbò yà ntambwe yònsò ayi yiyoochè bwà mpèkaatù wa yèyè awu. Nènku ki mémè kupeta nyama wa ntambwe awu’s, kàdi ùvwa ntambwe wa katankù’s, wa bule bwà mètres ipacila àsàtù, ne bujitu bwèndè bwipacila cintu cyà kilo lukàmà ne byà munjila, pa nànkù cìvwà—cìvwà ntambwe munènè be.

³⁵ Ki pashiishe mêmè kuumuka ku ditùngà dyà Arizona, kubwela mu Utah, bwà kulemba nyama. Ne pa nànkù bààkangambila ne kùvwa bantu kuntu aku, ne muntu ùmvwà nya kalemba nendè awu, ùvwa mwedi wa matèyi wa mbùlāmātadi, “Nènku, bwà dinanga dyà Nzambi, kwàkudikù cintu nànsha cimwè cyà citàngila ntèndeleele to, pabwipi nendè.” Yèyè ne: “Ùvwa bulelèlè mulùmyàna mukàyàbàle.”

Ki mêmè ne, èè, mêmè kwambila muntu ùmvwà nya nendè awu, mêmè ne: “Ncyàkucitèèlakù to.”

³⁶ Yèyè ne: “Kwàmbikù ne ‘muyiishi’ to. Wèwè mwambè, kwàkupetakù mwà kuya kalemba to. Kààkukwitabilakù to.” Yèyè ne: “Mvwa mulembè nendè matùkù àsàtù, ne mulàale pàmwè nendè bufùkù bwònsò, mudyè nendè ditùkù dyònsò, kàdi kàvwakù nànsha wàmba ne: ‘Mwoyi awu. Wetwàwu! Udi dijinga ne cyàkudyà anyi? Sukulà mālòngò.’ Kantu nànsha kamwè!” Yèyè ne: “Mpindyewu kwàmbikù kantu nànsha kàmwè pa bwalu abu to.”

Mêmè ne: “Ncyàkwàmbakù mwàkù to.” Pa nànkù ncivwa mumwambile ne ncivwa mwà kusambila to, kàdi mêmè mvwa ànu mutùngùnùke ne kumwambila ne ndi. . . Nènku ndi nsambila.

³⁷ Nànkù pàtwakafikà kuntwaku, mwabilaayi awu’s ùvwa wa maalu makolè, nènku ncivwa ngeelakù meeji ne ùvwa wìtabuujakù cintu nànsha cimwè to. Nènku ùvwa ùfuma ku dijìmiya mwànà wa mu dibòkò mu malòlò ndambù kumpalà kwà aci, mwànà mulwè mufwile munda. Pa nànkù, twètù kuya kalemba nyama. Ne pa ditùkù díbiidì, muntu ùmvwà ndemba nendè nyama awu ùvwa mumwambile, mwambè ne ntu nyà kalemba nyama myaba yònsò mu citùpà cyà buloba aci. Nànkù pàvwà cilembi mukwàbò, uvwa nàanyi awu, muumùke, tukàävwa ntantà mule lwà ku nsongo yà mikùnà; kutùvwà anu tulumbatangana ne nyama wa ntambwe, too ne mutwàkamubwejà mu mbwebwe, ne yèyè kuya. Nènku tuvwa basòmbe mwaba awu bindile bwà mbwa àpinganè. Ki muntu ewu kungambilayè, kwamba ne: “Cilembi mukwàbò, mulundà webè awu, ùdi ùngambila ne wèwè ùtu ufika ku diya kalemba myaba yònsò. Udi ne mfrangà yàbùngì?” Yèyè ne: “Ngeela meeji ne aci kî ncintàngile to.”

Ki mêmè kwamba ne: “To,” mêmè ne: “kî mfrangà yàbùngì to.” Mêmè ne: “Bàtu—bàtu bàntùùdila mfrangà.”

Ki yèyè ne: “Kaa, ndi mmòna.” Yèyè ne: “Èè, ngeela meeji kàbìdì ne aci kî ncintàngile to, kàdi,” yèyè ne, “utu ne cyapù cìdì cikutùùdila mfrangà anyi?”

Ùvwa munkacì mwà kucìmpàtwishà ku mishiku. Mêmè mvwa mulayè ne ncivwa mufwanyine kucyàmba to, nwamònu’s. Ki mêmè, èyo, mêmè kwamba ne: “To, mukalenge. Mêmè ntu muyiishi, mpandanjila.”

Yèyè ne: “Cinyi?”

Mémè ne: “Mpandanjila.” Ki kushààlayè mwimàne muntàngile ndambu wa tusunsa.

Mémè ne: “Udikù ne ditèkemena bwà Mwoyi paanyimà pàà mwoyi wà pànù anyi? Dyèbè ditèkemena dīdi cinyi?”

Yèyè ne: “Mémè ntu mwena Jack Mormon.”

Ki mémè ne: “Mwena cinyi?”

Yèyè ne: “Mwena Jack Mormon.”

Mémè ne: “Ki wa mùshindù kaayi awu?”

Yèyè ne: “Ewu udi udicìpa ne ùnwa kàfê, ne ùnwa mfwankà.”

Mémè ne: “Èè, ditonda dyà meeji matòòkè dītu dīmpè bwà musùkà's.”

³⁸ Ki pashìishè kwambayè—kwambayè ne: “Ndi muswè nkukonkèku bwalu.” Yèyè ne: “Mbandondèle ne èkèleeziyà wa beena Mormon ki èkèleeziyà umwèpelè mulelèlè udikù.” Yèyè ne: “Udi witabuuja nànkù anyi?”

³⁹ Mémè ne: “Bwà bìdì bìtangila èkèleeziyà, ngeela meeji ne ùdì anu mwîmpè mùdì mikwàbò yònsò eyi amu. Ndi mumanyè Bulelèlè ànu bùmèpelè, ne bwinè abu n'Yesù Kilistò.” Mémè ne: “Ndi mumanyè ne Yèyè ki udi Mulelèlè.”

⁴⁰ “Èè,” mwàkambàye, “ndi mupetè mwànà mulela dilòlòlò adi, mufwile munda.” Yèyè ne: “Mbangambile ne mwànà mwinè ewu ne, bu mùvwàye mufwile munda, Nzambì kàvwakù mumwelè mupùùyà wà mwoyi to, ne ncyàdyàkumumònakù kàbìdì to.” Yèyè ne: “Udi welakù pèèbè meeji bìshi bwà ciinè aci?”

⁴¹ “Èè,” mémè ne, “Kwakumumòna to wèwè bu mwena Jack Mormon, ncyà bushùwà ne kwakumumòna to. Ki cintu cìmwèpelè cyà bushùwà ncyòcì aci, kwakumumònakù to paùdì ànu mwena Jack Mormon apu.” Ki kwambayè. . . Èè, yèyè ùvwa ùnsàka's, nènku ki mémè kumutwà pàànyì cibwa ndambù, nudi numòna's. Twètù kupeta—kupeta dībà dyà kutwàngana bibwa's. Ki yèyè kwamba—yèyè kwamba. . . Mémè ne: “Bwalu bùdì cinyi?”

Yèyè ne: “Kaa, ncyèna mumanyè to.” Ki yèyè ne: “Èè, udikù pèèbè wela meeji bìshi?”

Mémè ne: “Ntu mumanyàngàne ne bààbúngì bàà bîmpè. . .”

⁴² Ncìvwa mumanyè ne yèyè ùvwa mwena Mormon to. Nènku mvwa menemene. . . Ndi mumanyè ne, bu mùdìci ne mmu Utah, mmùvwàbì pàmwàpa, kàdì ndi mémè. . . bwalu bantu bààbúngì bàà muntwamu mbeena Mormon, mu nyùngulukilu mujimà wa Salt Lake City amu. Nànsha nànkù, emu kamùvwa mmu Salt Lake City to. Ki mémè kudyàmbidila ne: “Èè, nkààdikù mupetè balundà bîmpè bàà cyena Mormon, bakààdikù balwè mu milongo yà babèèdì, bantu bîmpè.”

43 Ki mémè kwamba ne: “Nkààdikù mutwilèt-wilàngàne ne bàmwè bantu bímpè biikàle—biikàle beena Mormon.” Ki yêyè, èè, yêyè ne... Mémè ne: “Ncyèna mumanyè dyàbò dilongesha pa bwalu abu to, nènku ncyèna muswèku kwamba cintu cibèngangana ne dilongesha dyàbò to, bwalu’s ki cyùdi wèwè, ne ndi nnèemeka aci bikolè be.” Ki mémè ne: “Èè, nènku wèwè udi witabuuja nàнку anyi?”

Yêyè ne: “Èyowà’s, mukalenge, ki cindi ngiitabuuja. Kàdi,” yêyè ne, “ncitu ne nsòmbelu waacì to.”

44 Mémè ne: “Èè, mémè ndi ngiitabuuja ne Bible ùdi ùlongesha ne Nzambì ùvwa mumanyè mwànà awu, kukàadi mĩlyò yà bidimu, kumpàlà kwà difùkà dyà dyulu ne buloba.” Mémè ne: “Nzambì wàkambila Yelèmiyà ne: ‘Kumpàla mene kwà wèwè kwimiciibwa mu difù dyà mamwèbè, kumpàlà mene kwà wèwè kupàtuka mu difù, Nkààvwa mukumanyè, mukujidilè, ne mukutèèke mu mudimu bu mupròfetà wa bisàmbà.’” Mémè ne: “Mùshindù awu ki wùvwà Yè mumanyè mwànà awu, wamònu’s.”

Yêyè ne: “Èè,” yêyè ne, “twasàkidila.”

45 Kubangayè wènda ùpweka kakùnà aku. Ki pashìishè kutwilanganayè ne mulùmyànà mukwàbò ewu, ki kwambayè ne: “Bwà cinyì kùvwa mungambìle ne mwabìlaayi wàwa mmuyiishi?” Nènku ki twètù... Kuyiikilayè nendè ndambù ne kubangayè kumulondela maalu à mu masangisha.

46 Mpindyewu, beena Mormon bàtu bìitabuuja bipròfetà. Ncyèna... nkufwànyine kubèngakù kwikale umwe wabò kaaba aka, kàdi bóbò—kàdi ncyà bushùwà ne bóbò bàtu bìitabuuja mu—mu bipròfetà. Kàdi, pa nàнку, pàmwàpa ndi ngaakwila mu dipanga, kàdi ndi... Èyo. Èyo. Kàdi, nànsha nàнку, bàtu bìitabuuja.

Ki kwambayè, kwalukilayè kùndi, kwambayè ne: “Ndi ngumvwa ne wèwè ewu udi mupròfetà.”

Mémè ne: “To, mukalenge.” Mémè ne: “Ndi... Mukalenge mmundeejèku ndambù wa bintu bìdi bilwa kwenzeka.”

47 Ki kumba kukàtamukayè, dyàkàmwè, kwambayè ne: “Tùbwelè.” Ki kubwèlayè mu kàshinyì kèndè, ne kupwekayè ku... kaacimenga kèndè kakesè mùvwàye musòmbele amu. Mu tunsunsa tukesè, kujìminayè. Tuvwa munkacì mwà kulongolola mbwa, bwà kuya kalemba kàbìdi dyàkàmwè paanyimà pàà didyà dyà mundaamuunya. Ne patùvwà twenza nàнку apu, mona’s, kutukayè ne kàshinyì è kuyayè.

48 Mu katanci kakesè emu, ki nsongààlùmè wa mmwènekèlu mulenga kwalukilayè, wa bidimu bitwè ku dikùmi ne mwandamutekète, nsongààlume mwena Kilistò mulelèlè wa mmwènekèlu wa cijila. Yêyè ne: “Ewu mmwanètù wa balùme.” Yêyè ne: “Yêyè kì mmwena Jack Mormon to. Mmwena Mormon wa menemene.”

Mémè ne: “Wetwàwu, mwanàànyì wa balùme!”

Ki yêyè ne: “Ngũmvù, mùdì mwanèètù mundondèle, ne wêwè udi mupròfetà.”

Mémè ne: “To, mukalenge.” Mémè ne: “Ki nne ndi mupròfetà to.” Mémè ne: “Mukalenge mmundeejè bintu bìdì bilwa kwenzeka.”

⁴⁹ Yêyè ne: “Mbantwè lushingì mu dibòkò mpindyewu mene, ndi ne cyà kwikala ku mèèsà à dipandiibwa.” Yêyè ne: “Kàdi mwanèètù kungambilayè cyôci eci. Ki mémè kwamba ne: ‘Pìikalàbì nàнку, kabyèna binkèngela dipandiibwa adi to.’” Kuntàngilayè buludì mu mèsù, lutàngilu lwà kweyemena, lulelèlè, lwà meeji matòòkè, yêyè ne: “Ntentèkèle byanza. Pìikalà maalu àà nàнку, kabyàkunkèngela dipandiibwa to.” Kwalukilaye kumbèlu musàngàle.

⁵⁰ Mwanèètù wa balùme ewu, mulundà wanyì mwena Kilistò ewu, ùvwa wèna naanyì bulembi, wa ku Phoenix. Kungambilayè, kwamba ne. . . Yimwè yà ku nsongàalùme eyi mmisòmbe mwab’ewu mene mpindyewu. Umwe wa kùdìbo ndi mumanyè ne ùdì kaaba aka. Twètù kwalukila pambèlu. Yêyè ne: “Mwanèètù Branham, bu Mukalenge mwà kukulèejakù cìkèèna-kumònà ne kwenzakù bwà wàmbilè beena Mormon abu ànu cìikalà mwà kwenzeka, aci’s necyènzè bwalu, bwalu ki cìdìbo bindìle.”

⁵¹ Pa nàнку, mémè kusambila byà byangàtàngàne. Kàdi mu dyalukila dyànyì dyà pambèlu, ngenda mbànda, mu dimwè dyàkalondà, dyàlumingu adi, bu pa dībà dikùmi nàнку, Mvwa mwimàne mu cibambalu, paanyimà pàà disangisha mu dindà adi, mvwa mutàngile pambèlu.

⁵² Ki mémè kumòna myèndù yà toolòshì yipenya, anyì bukènkè bwà mùshindù kampàndà bùpenya. Ki mémè kumòna nyama wa ntambwe uvwa kuulu kwà mucì, kàdi—kàdi uvwa mukesè be bwà mémè kumwasa cingoma. Ncivwa mumuswè to. Kàdi ki muntu mukwàbò kumwasayè, nènku, pààkamwasaye, wàkamwasa ne cingoma cipitèpìte bunène. Kusùnsulaci ntambwe awu. Ncyàkaanyisha mù—mù—mùshindù wàkenjiibwàci awu to.

⁵³ Pàngààkafikà ku Phoenix, mémè kulondela Mwanèètù Dawson bwalu abu, ne Mwanèètù Mosley. Ndi mumanyè ne yêyè udi kaaba aka. Mvwa mumumòne ditùkù adi, apa mwaba kampàndà. Nènku ùvwa ùya mubànde pàmwè naanyì, yêyè ne mukàjèndè. Ki mémè ne: “Nùtangilè nùmonè, cidi ng’EMU MMÜDÌ MUKALENGE WÀMBA. Necyènzekè mùshindù awu.”

⁵⁴ Twètù kwindila mafùkù, mafùkù ànaayi anyì àtaanu, atùvwa benzè bulembi, anyì matùkù. Nku mpùùkàpùùkà kùdìku mwà kupeta nyama wa ntambwe kuulu kwà mucì bufùkù. Kwenzekabì ne, mu dyalukila dyà kumbèlu, kulekelelabò mbwà, cilembi ewu’s, nsongàalùme mwena Mormon ewu. Ki nta—ntambwe kulondayè mupwà, to, mbwa kulondayè mupwa wà

ntambwe's wè, kumunyeemesha è kubàndayè kuulu kwà mucì. Nènku pa dībà dikùmi wa bufùkù bôbò kulwa, kutùjuulabò mu bulàalu. Twètù kupàtuka kuya kuntwaku, ki ntambwe umwèumwè awu uvwa kuulu kwà mucì wàwa. Ùpenyesha bukênkè, Mwanèètù Mosley kumwasayè ne kàlibrè kàà makùmi ànaayi ne ìnaayi, mwambè kutaayisha ntambwe awu mu bitùpà bìbìdì. Nènku's ki cyôci aci, ànu menemene mùvwàci cyambiibwe.

Ditùkù dyàkalondà, mèmè kutwilangana ne mfùmù wa bakùbì bàà nyama yà diitu wa province awu, mwena Jack Mormon mukwàbò's. Mèmè kwangata nsongàalùmè ayi pàmwè, kuyilombola kuyàaluja kùdì Kilistò.

Ndi nnwàmbila ne, Yèyè ùdi umwèumwè awu makèèlèlè, leelù, too ne kashidi. Nzambì ùtu ùjaadika ne Dìyì Dyèndè dìdì nàнку.

Nukààdikù bumvwè bantu bàmba ne: “Kumòna ki kwitabuuja.” Aci kaciyèna ànu cyònsò cilelèlè to. Bantu bààbùngì bàtu bàmona kàdì kabàyi bìitabuuja to.

⁵⁵ Matùkù àvwà Yesù pa buloba awu, bwà cinyì kabààkaMujingulula ne, Yèyè nguvwa Dìyì dyà Nzambì adi dimwènèshùibwe? Bwà cinyì bantu kabààkajingululakù ne Mòsà wàkamba ne: “Mukalenge Nzambì wèbè neàjuulè mupròfetà mufwànàngàne naanyi”? Ne Yèyè wàkuuja Dìyì dyònsò dyàkambà Bible ne Neénzè, kàdì bôbò kabààkaciitabuuja to.

⁵⁶ Kàdì Nzambì, mu cikondo ne cikondo cyònsò, ùtu mujaadikèjààdike ne Dìyì Dyèndè ndilelèlè. Ùtu misangu yònsò ànu ùjaadika Dìyì Dyèndè. Pashùishè míngà misangu bàtu bàmba, ne: “Kumòna ki kwitabuuja.” Kabyèna nàнку to. Kàdì twètù tudi bamanyè ne Nzambì ùdi ùtùngunuka ànu ne kujaadika Dìyì Dyèndè mu cikondo ne cikondo cyònsò.

⁵⁷ Tudi bamanyè ne Yèyè wàkacijaadikila Adàmà ne Evà, pààkambaYè ne: “Ditùkù dinwàkùdyà, ditùkù adi ndinwàfwà bulelèlè.” Bìkèngela twitabè cyôci aci ne, mbulelèlè. Tudi twitabuuja aci, bwalu Yèyè mmutùjaadikileci, ne tudi bamanyè ne cidi bulelèlè.

⁵⁸ Mpindyewu netwàngatè ànu myaba kampàndà yàkajaadikà Nzambì Dìyì Dyèndè. Twàngatààyi, cileejilu, mu matùkù à—à Noà. Nzambì wàkambila Noà mukenji wùvwà bulelèlè wùbèngangana ne maalu à mamanya ne kawùyikù mwà kwitabuujiibwa to. Muntu nànsha umwe kàvwakù mufwànyine kwikala muwitàbùùje to. Kacya mvùla kàvwakù mwanji kulòka pa buloba to. Kabikùyi bìpetangana ne maalu à mamanya to!

⁵⁹ Pàmwàpa bàvwa cikondo cyà citàmbe bunènè cyà maalu à mamanya musangu awu kutàmbe mutùdì mpindyewu emu, bwalu bàvwa biibàkà bipaapu byà misàkà ne mpìngù yà ntambwe yà mitù yà bantu, ne bikwàbò, mu miinè matùkù awu, bitùdì twètù katùyi mwà kwibakakù mpindyewu to. Bàvwa

biibidilàngàne ne bukolè kampànda, bukolè bwà mùshindù kampànda bwà byamù, pàmwàpa bwà tupwishipwishi anyi cintu kampànda, mu mùshindù wà ne bàvwa mwà kwambula mabwe manènaanènààlè awu, bitùdi twètù katùyikù bafwànyine kwenza leelù ewu to. Kàdi bàvwa bènza bintu binènè byà maalu à mamanya. Bàvwa ne cintu kampànda cìvwàbo mwà kwela mubidi wà citàlù kawùyi mwà kubola to, bwà kuwùpa mmwènekèlu wà mu bufùki munda mwà nkàmà yà bidimu. Tweètù tudi bajimije ngenzèlù awu.

⁶⁰ Yesù wàkamba ne: “Ànu mwàkadìbi mu matùkù à Noà amu, ki mwikalàbi kàbìdi ku dilwa dyà Mwànà wa muntu.” Ne tudi bamanyè ne bidi bikèngela bwà twètù kubwela mu cikondo cikwàbò cinènè cyà maalu à mamanya.

⁶¹ Nènkù mpindyewu mukenji wùvwà nààwù Noà wùvwà wùbèngangana bikolè ne diitabuuja dyà ditùkù adi, mu èkèleeziyà, ne ùvwà kàbìdi ùbèngàngàne bikolè menemene ne bukebikèbi bwà maalu à mamanya. Kàdi Nzambì wàkajaadika Dìyi Dyèndè ne didi bulelèlè. Nzambì wàkajaadika ne cyàkambà mupròfètà awu aci cìvwa bulelèlè.

⁶² Netwàngatè mukwàbò kàbìdi bwà katancì kakesè cyanààna. Abraham ùvwà mukwàbò mupròfètà wa Mukalenge, uvwa Dìyi dilwè kùdiye. Ne wàkamwambila, pàvwàye ne bidimu makùmi mwandamutekètè ne bitaanu apu, eku Sarah ne bidimu makùmi àsambòmbò ne bitaanu, ne ùvwà ne cyà kupetela mwànà kùdi Sarah. Mpindyewu, aci's cìvwa cikùminà cyèbè cyà menemene kùdi mwena bupidyà. Nudikù mwà kudifwànyikijila, leelù ewu, cintu bu nànkù cyènzèka mene mu ditùkù edi, ne byenzedi byètù byònsò byà bulòbò byà maalu à mamanya bitùdi bakùmbàje ebi, ne byònsò byà bânà baleleshila mu byamù bàdibo bamba abu, ne bikwàbò? Kàdi mukàji mukùlākàji ewu, mpindyewu ne bidimu makùmi àsambòmbò ne bitaanu, ne mulùme mukùlākàji wa bidimu makùmi mwandamutekètè ne bitaanu, kàdi Dìyi dyà Mukalenge dyàkalwa kùdi Abraham òmwambila ne eci necyènzekè. Ne Abraham wàkiitabuuja Nzambì. Mpindyewu, nànsha Nzambì mwakùle bishi, ne nànsha cyòci cilelèlè cyà bishi, byàkàkèngela bwà Abraham kwitabuuja cìvwà Nzambì mwambè aci, bwà kwenzekaci nànkù. Mpindyewu tàngilààyaaku mwàkeediibwà muntu awu ku diteeta, ne bujaadiki bwèndè bwà ne, yèyè wàkiitabuuja.

⁶³ Muntu umwèumwè wàkenza dijikula adi ne, wàkiitabuuja Nzambì awu, s'mmuntu ànu mùdi wèwè, wèwè udi musòmbe kaaba aka dilòòlò edi ewu. Twètù tucidi ànu twitabuuja Nzambì. Bikèngela twitabuuje ne Dìyi Dyèndè ki Bulelèlè. Ne Yèyè ngwacijaadika ne, Didi Bulelèlè, bu twètù ànu mwà kuciitabuuja.

⁶⁴ Mpindyewu tàngilàayi cipùmbishi cyàkapetà Abraham. Cintu cyà kumpalà cìvwa mbidimu byèndè, ne bidimu makùmi

mwandamutekètè ne bitaanu, ne Sarah mwikàle ne bidimu makùmi àsambòmbò ne bitaanu. Ùkaavwa mupite kale cikondo cyà dishintuluka dyà mwoyi, cyà kàciyi ùya kàbìdì ku mashi aci. Kakùyi mpatà to cìkaavwa ciimàne, kùkaavwa bidimu byàbùngì kumpàlà. Yèyè ùkaavwa mushààle nendè bu mukàjèndè. Ùvwa mmwakùnyèndè mukwàtatwèndè, pàmwàpa mumwangàte pàcìvwàye ànu ne bidimu dikùmi ne byà mu njila, ne mumusèle. Kàdi kàvwa mupetè bânà to. Mukàjì awu kakùyi mpatà to ùvwà nkumba. Nènku mpindyewu tudi tusàngana ne, bwà kwenza cyòci eci, byàkakèngela bwà àtapulukè ne bantu bònsò bàvwa kabàyi bacìtábùùje abu to, bwà kucifikisha ku dyenzeka.

⁶⁵ Ncyèna njinga kwamba ne bìdi bikèngela bwà ùtapulukè ne bantu to. Kàdi bìdi bikèngela bwà wèwè kutàpuluka ne dijaanangana dyònsò dyà bupidyà, ne kushààla kule ne byà nànkù. Pàdì bantu bàmba ne: “Kya, abi bintu kabìtu byènzeka to! Awu mmusùmbà wa bantu bàà katombòtombò! Kakùtukù cintu cyà bwena aci cyènzeka to,” jika wèwè ànu macì ùkebè kwà kuya ùye. Kùtèyikù ntèmà ku byòbì to.

⁶⁶ Bible mmwambè ne “Abraham kààkatènkakanakù ku mulayi wà Nzambì, ku bupidyà to; kadi ùvwa ne dikàndà, mwikàle ùpa Nzambì butùmbi.” Dìna dyèndè dyàkashintuludibwa kuumuka ku Abram kulwadi Abraham, dishintuluka dyà dìna dyàkavwija dìna dyèndè, “taatù wa matùnga.” Nudikù mwà kudifwànyikijila muntu musòmbè ne mukàjèndè, munanga wèndè, ùvwayè musòmbè nendè mpindyewu mu bidimu byònsò ebi awu, ne mpindyewu mu bidimu byà ku makùmi mwandamukùlù, ne mukajèndè ne bidimu makùmi mwandamutekètè, ne mucìkàle kàyi ne mwànà nànsha umwe anyi ditèkemena dyà mwànà to, kadi nànsha nànkù wàmba mùvwàye “taatù wa matùnga.” Nudikù mwà kudifwànyikijila didyula dyà kùdì bakwèndè bàvwà bàpita abu bafwànyine kwamba ne: “Taatu wa matùnga, mpindyewu bânà biinè bàukaadi naabò pa dībà edi bàkaadi bùngì kaayi?” Ki didyula dyònsò òvwà dikèngela bwà kupìcilayeku ndyòdì adi’s!

⁶⁷ Kàdi Abraham kààkatènkakanakù mwaba nànsha wùmwè, ku bupidyà to. Ùvwa mwitábùùje ne Nzambì ùvwa ne bukolè bwà kwenza ciwvayè mulayè aci, ne Nzambì ùvwa mwà kujaadika Dìyì Dyèndè, nànsha byòbì byangàte ntantà bule kaayi. Kàdi pamutù pàa kwenda kuteketa dībà dyònsò, mutùdì twètù tutàmba kwenza amu, yèyè wàkatàmba kukolakana dībà dyònsò. “Cyòci kaciyi cyènzèke leelù, mààlabà neciikalè cishimà citàmbe bunène, bwalu cyàkolù ne ditùkù dijima.” Ùvwa n’Nzambì, ùvwa n’Nzambì munda mwà Abraham, bwalu yèyè ùvwa mumanyè ne Nzambì ùvwa ùjaadika Mèyi Èndè ònsò ne àvwa nànkù.

Bu bâna Bèndè ànu mwà kwangata Dìyì Dyèndè, bwà Wàmòna mwà kuDijaadikila kùdi wèwè aku! Kì mùshindù wùmwèpelè wùdiYekù mwà kujaadika Dìyì Dyèndè awu's.

Yèyè katù uDijaadikila beena bupidyà to. Bòbò kabèèna mwà kubàjaadikila to; bòbò mbeena bupidyà. Kàdi, ki nCitùmina beena bupidyà to. KaCyèna bwà beena bupidyà to.

⁶⁸ Cidi bwà ewu udi witabuuja. Ne bu Yèyè mwà kupetakù kampàndà wíkala mwà kwitabuuja Dìyì Dyèndè, Yèyè's neàjaadikilè Dìyì Dyèndè kùdi. Ne mîngà misangu màsaamà ne bikwàbò bitu bitùfikila mùshindù awu, bwà Nzambi wàmònaku mwà kudijaadika Yèyè mwinè.

Nudikù nuvùluka mpofo wàkasangana Yesù awu anyi? Bàakamba ne: “Udi mwenzè mpèkaatù nganyì, n'yèyè anyi, peeshì ntatwèndè, anyi mmamwèndè?”

⁶⁹ KwambaYè ne: “Mu ebu bwalu, nànsha umwe, kàdi mbwà byenzedi byà Nzambi bîmanyishiibwè.” Nwamònu's, byàkenzekela mwànà wa balùme ewu bwà Yesù wàmòna mwà kutùmbishiibwa. Mîngà misangu bubèèdi kabùtu mulawu to, bùtu dibènesha, bwà twamòna mwà kuzànjika diitabuuja dyètù ne kubiikila bintu bìdi kabìyikù abi, bu ne bìdikù. Nzambi ngudi mwambè nànkù, ne Yèyè neàjaadikè ne bìdi nànkù bu wèwè kùyi ànu mutekèshiibwe kùdi dìtèeta adi.

⁷⁰ Ûvwa mwà kujaadikila Yobò, musangu awu ne, kàvwa mufwànyine kuMwela mulawu muMutàngile mu mpàla nànsha. Tàngilàayi diteeciibwa dyàkapìcilà Yobò adi. Kàdi mu mbàngà yà lufù mene, nànsha nànkù kwambayè ne: “Mukalenge ngwàkafila, Mukalenge ngwangàci, Dìnà dyà Mukalenge dibèneshiibwè!” Ncyà bushùwà ne yèyè wàkaciitabuuja. Nzambi wàkajaadikila Yobò Dìyì Dyèndè. Wàkacijaadikila Abraham. Wàkacijaadika nànkù.

⁷¹ Yèyè wàkacijaadikila kàbìdì Mòsà. Nènku Mòsà, pàakatàmbà lutàtù kumulwisha, Mòsà ùvwa nààci mu meeji ne, pàmwàpa, bwà kwikala musùngidi, ne pàmwàpa mamwèndè ùvwa mumulondèle ne yèyè ùvwa mulediibwe mwànà wa pabwèndè. Yèyè—yèyè ùvwa ndeeji wèndè wàkamukoleshila mu nzùbù wa bukalenge wa Pàlò awu, kakùyi mpatà to ùvwa mumwambile ne: “Mwànàanyi, tùvwa basambile bwà twamòna mwà kusùngidiibwa, nènku tudi twitabuuja ne wèwè ki mwànà ùvwa Nzambi ne cyà kukwàta nèndè mudimu bwà kusùngila.” Kì pashiishè pàvwàye. . .

⁷² Nwamònu's, wàkakola ne byàkakèngela bwà kwikalayè mwànà wa—wa mwànà wa bakàjì wa Pàlò, ne tudi tusangana ne yèyè nguvwa ne cyà kwikala mupyànyi wa nkwasà wa butùmbi. Mòna's, kakùyi mpatà to cìvwa mu meeji àbò dìbà adi ne, yèyè nguvwa mwà kushààla Pàlò uvwa ulonda awu, “Nènku mùshindù awu ki wùvwàye mwà kusùngila cisàmbà, mu kwikala Pàlò uvwa ulonda.” Kàdi Nzambi uvwà ne. . . Bu ne

bìvwa nànkù, nùnkù yéyè's mmucyènzèlè ku cyamù kampàndà cyà mudimu, mu cye—cye—cyenzedi cyà cidìidì. Kàdi Nzambi kàtu ànu ùkwàta mudimu nànkù misangu yònsò to.

⁷³ Nzambi ùtu ne Yèndè mìshindù sungasunga bwà kwenza mudimu, ne Wákamba ne Yéyè nguvwa mwà “kubàpàtula.” Wákambila Abraham ne: “Paanyimà pàà bidimu nkàmà yinaayi,” Yéyè ùvwa mwà “kubàpàtula, ne cyanza cyà bukolè,” Ùvwa mwà “kuleeja bimanyinu ne maalu à kukèma.” Pa nànkù kàvwa mwà kucyènzà mùshindù awu to, pa nànkù Abra-... Tudi tujandula ne Abraham wàkiitabuuja Nzambi, kàdi ki Mòsà nyéyè ewu mpindyewu wìtabuuja Nzambi.

⁷⁴ Nènku Mòsà wàkatàngidila pambèlu ku dídidiishì dimwèdimwè kwàkatàngidilà Pàlò aku, kumònaye cisàmbà cìmwècìmwè aci. Cyàkabàtàngila Pàlò pambèlu apu, bu ne: “Cisàmbà cyediibwè mulawu, cisàmbà cìvwa ànune musùmbà wa dikolesha dyà maalu, bu wabù Nzambi, ne Nzambi kampàndà wa mu cipèèlà mu mwaba kampàndà uvwabò kabàyi bamanyè mu kantu nànsha kàmwè to; dikunji kampàndà dyà kadiyi dimwèneka divwàbo basambila, kùvwa kakùyi bwà nsongo to. Mmusùmbà wà bakolessi bàà maalu. Ne bàvwa musùmbà wà bapika. Ne mùvwa Nzambi wàbo mubàlekèlè biikàle bapika, cìvwa cijaadika ne Yéyè kàvwa Nzambi to.”

⁷⁵ Kàdi ànu munkaci mene mwà byònsò abi, Yéyè ùvwa munkaci mwà kujuula muntu mwena diinà. Nzambi ùtu wènza maalu mu mìshindù yà pabwàyi, ànu mu mikòlù yàbò mene. Kàyi mwena tèlòlòjì, kàyi mulongeshi, kàyi mwakwidi, kàyi nànsha umwe wa ku bantu bààbò bàà cijila abu to; kàdi ànu muntu wetù wa pàtupù ewu, mulela bwà mudimu awu. Ki Nzambi kumubiikila bwà kwikalayè mupròfeta Wèndè, ne kumutùma kuntwaku. Ne kàyi cintu nànsha cìmwè mu cyanza to ànu dikombo dikònyàngàle, bwà kakùngamangana ne cilwilu kampàndà, misùmbà yà bantu badyènzè cìmùkù yìvwa micìmunè buloba bujimà ayi. Kàdi ne dikombo adi mu cyanza, mwàkamwambila Nzambi bwà kukwàtayè dikombo adi mu cyanza ne yéyè nguvwa mwà kusùngila Izàlèlèlà, ki kupwekayè ne kucyènzà bwalu Nzambi nguvwa mucilaye. Neàcyènzè munyi? “Mèmè nèngiikalè neebè.”

Kwambayè ne: “Ndèèjèku butùmbi Bwèbè, Mukalenge. Mèmè ndi ne lujòòkò mu dyakula. Ncyèna mwà kwakula bimpè to. Ne ndi...” Ùvwa ne tubingila mùliyò mujimà.

⁷⁶ Kadi Yéyè ne: “Mèmè nèngiikalè neebè.” Nènku ki cyònsò cyàkakèngediibwà ncyòci aci. Wákaya, mwangàte Díyì dyà Nzambi. Nànsha mùvwa mudimu awu wùmwèka wà njìwù amu, Mòsà wàkatàngunuka ànu ne kwitabuuja Nzambi. Ne Nzambi wàkajaadikila Díyì Dyèndè, kùdi Mòsà ne, mbulelèlè. Bwalu,

nànsha bivwà byènzekà abi biikàle binganyì, Mòsà wàkashààla anu ne Dìyì. Mu cikondo cyà lwendu . . .

⁷⁷ Nzambì wàkabàmbila, mu Ejiipitù mwàmwa, kàbìdi, bwà ne Yèyè ùvwa ne cyà kubàsùngila, “kubàbweja mu buloba bulaya, buloba bwîmpè, bùle tètè ne mabèèle ne bwìci.” Ne kakùyì mpatà to bùvwakù. Kabàvwa bamanyè ne bùvwakù to, kàdi Wàkamba ne: “Budikù, ne Mèmè Ngánùpèèshibù. Bùkàadi bwènù, ndàayi ànu cyanààna nùkabùnanè!”

⁷⁸ Nènku mu cipèèlà, pààkapàtukà bààbùngì bàà kùdùbo, bàja maja mu Nyumà, pàvwa Mìliyàmà ùtuuta ngoma; biikàle bàdya manà à mu Dyulu; bàtèèleja Mòsà wimba misambu mu Nyumà; bàtàngila bishimà ne bimanyinu bìpàtuka. Kàdi pààkafikàbi ku diteetangana dyà makàndà, bwà kwitabuuja Dìyì dyà Nzambì mu kaabujimà, mulayi wònsò awu, bôbô bààkapangila.

Ànu bàbìdi bàà kùdìbo mbààkawitabuuja, bàvwa n’Yoshùwà ne Kaalèbà. Bôbô bààkaalukila ne cileejì cyà ne buloba abu bùvwa bwîmpè.

⁷⁹ Kàdi, maalu àvwa ènzekà awu, ôwò awu ki àkabàpangishà. Bwalu, bààkamba ne: “Katwèna bakùmbàne bwà kukwàta buloba abu to, bwalu bimenga byàbò mbyela mu bimanu, baamìnyàmpalà bààbò—bààbò—bààbo abu kuntwaku. Kì mbaamìnyàmpalà bààbò to, kàdi bantu bààbò—bààbò mbanènè bàà mfyondo. Mòna’s, twètù tudi tumwèka bu tupasu, ku luseke lwàbò aku.”

⁸⁰ Yoshùwà ne Kaalèbà kwambabò ne: “Twètù tudi batàmbe bukolè bwà kubùkwàta.” Bwà cinyì? Nzambì nguvwa mubàpèèshebù, nànsha bantu bàà mfyondo abu biikàle banènè bàà bishi. Cipùmbishi aci kacìvwakù ne cìvwaci cùmuvwija bwàbò bôbò to. Nzambì nguvwa mwambè nànkù! Ne Nzambì wàkacìjaadikila kùdìbo. Nènku bààkasabuka cyà bushùwà ne kukwàta buloba abu, mùvwà Nzambì mwambè ne nebàbùkwàtè amu. Yèyè wàkabàjaadikilaci.

⁸¹ Mpindyewu, pààkafikàbo mu ngondo mwinâyì, pàvwa màyi àpweka àfùmina ku mikùnà, pa mishiki yà nêjè apu, ne bikwàbò, ne kumwèkabi bu ne Nzambì uvwà kalààlà kàà màsàlaayi kabi’s, bwà kulombwela cilwilu Cyèndè buludi ne ku mwaba kampànda, kùvwàYe mukabàcìncimikile kule ne buloba bulaya. Ne ànu dîbà diinè dyàkabàsabwishàYè, dîvwàYè muswè bwà kubàsabwisha adi’s, s’cìvwà ngondo mutàmbe bubì wa mu cidimu. Ngondo uvwa Yadènè mùle mupita ne myeelelu, màyi matangàlàke ne mu mpàta mwònsò. Mòna’s, bu ne bàvwakù ne cyà kubàsabwisha, s’bìvwakù bifwànyine kwikala mu muvù wa luuyà, mùvwàbo mwà kusabuka bèndela mu màyi bitekètèbitekètè. Kàdi Yèyè wàkindila too ne pààkuulà màyi kulwawù à ndondo mule. Yèyè ùtu munangè kuleeja ne Ùdi Nzambi. Ùtu munangè kujaadika Dìyì Dyèndè, nànsha byà munyì.

⁸² Kùcyùku to nànsha ngàngàbukà mwambè ne: “Udi upùnga ne lufù bwà kànsèrè.” Aci ki cyònsò cidiyèku pèndè mumanyè. Pàmwāpa mâyì àdi à ndondo mule bwà bàmwè bàà kunùdi, dilòòlò edi. Kàdi, vùlukà ne, Nzambì ngudi mwenzè mulayì. Nzambì ùtu ùshààla mukwàte ku Díyì Dyèndè, ne Nzambì ùtu ùjaadika Díyì Dyèndè. Dyòdi didi Bulelèlà.

⁸³ Wàkindila too ne pààkalwà mâyì awu ne bitoci, too ne mwàkalèèpawù kwondoka kupita ne mitù yàbò, ne bikwàbò, ne pashìishè Yèyè kukàngula njila. Wàkaya kumpàlà kwàbò ne kukàngula njila.

⁸⁴ Mmunyì mwàbwelàbo, mu Yelèkò amu, pàvwàmu mukànga mwònsò? Yoshùwà ùvwa ùdikonka. Ùvwa mumanyè ne Nzambì ngukààvwa mumulombòle too ne mwaba awu, cidya civwà cìlondà civwà ncyà Nzambì.

⁸⁵ Dìngà ditùkù, pàvwàye wènda wèndakana, ùbandila bimanu abi, kumònayè Muntu mwimàne ne mwelè Wèndè wà mvità mupàtula mu cimànga. Ki kupàtulayè wèndè pèndè mwelè wà mvità mu cimànga ne kuyayè bwà katwilangana ne Muntu awu, kwambayè ne: “Wèwè udi bwà nganyì? Udi bwètù twètù anyi Udi bwà mulwishì wetù?”

⁸⁶ Yèyè ne: “Mémè ki Kàpíteenà kàà bilwilu byà Mukalenge.” Ki kumwambila Yè cyà dyenza. Mmunyì mwèlaye mpungi ne lumbu kuupukalu, lwinè alu bafwànyine kunyeemeshilapù matempu à mbilu yà dipiiyangana? Ndipetangana kaayi divwàku difwànyine kwikala ne mpungi?

⁸⁷ Nzambì ùtu ùkwàta mudimu ne ngenzèlù mipwekèle yà nàнку. Bidi nàнку, bupwekèlè bwàci, ki bùdi bwènzà ne cìikalè Nzambì bwànyì mémè. Twètù tutu misangu yònsò ànu tuteeta bwà kupeta cintu kampàndà cyà cinène, cìikalà mwà kwenza cintu kampànda, kàdi Nzambì... bulongolodi kampàndà bunènè nebwàngatè cintu cyònsò aci mu kaabujimà ne kucitòòkesha cyònsò tòò. Pààbi's, Nzambì ùtu wàngata muntu umupwekèle, ànu muntu umwèpelè udi Yè mwà kukwàta mu byanza Byèndè, ne Yèyè neàjaadikè Díyì dyònsò dyàkambà Ye, ku Dyòdi adi. Wàngata ngenzèlù mipwekèlè yà nàнку awu ayi's!

⁸⁸ “Elà mpungi.” Kabìyi ne tùbulà disòsò mu cimanu to, kàdi: “Elà ànu mpungi cyanààna, ne bimanu abi nebyùpukè. Mwadi mukolè wà mpungi awu newùbyankulè bimanu abi panshi.” Mùshindù mwinè wùdibi bikùtākàne bwà meeji à musunya's wè! Kàdi Nzambì wàkajaadika ne Díyì Dyèndè divwa dilelèlà, bwalu bimanu abi byàkuupuka, byambàtàngàne. Kubàndabò buludi ne kukwàtabò cimenga aci.

⁸⁹ Kaa, Nzambì ùtu munangè bwà kujaadika Yèyè mwinè ne n'Nzambì! Yoshùwà ùvwa mumanyè aci. Dìngà ditùkù, ne pàvwàye mwimàne mwab'awu apu, cimwè cyà ku bidikà byà bitàmbe bunènè bikaadiku byenzekè, pa kuumusha lufù, dijiikiilbwa, ne dibiikà dyà ku lufù dyà Yesù Kilistò. Pàdi

mwenà lukunà... Ûvwa mubàyiishè bimpàmbàmba, ne bilwilu bishiilleshiiilàngàne biywa ku mikunà aku. Ûkaavwa mumanè kubàyiisha bimpàmbàmba, ne dîbà dikaavwa dyàmba kubwela. Kaa, ekèlekèle, cìvwa ncikondo kaayi bwà Kalààlà kàà masàlaayi Yoshùwà awù's wè!

⁹⁰ Vùlukàayi ne, yèyè wàkalwangana ne ditunga adi too ne ku ndekeelu, kàyi ne lùpitaadi, anyi mungàngà, nànsha musumbà wà benji bàà dyondopa dyà lùkàsàlukàsà, anyi ne muntu mutàpika mputa to. Ngambilaanyaayaaku cintu cidiku mwà kutàmba aci. Eyowà's, mukalenge. Kàvwakù nànsha ne mpitaadi, nànsha baamingàngà to, kàdi kaàkajimija muntu nànsha umwe to, bu mùvwàbò ànu bèndela mu diswa ne Dìyì dyà Mukalenge. Nzambi wàkajaadika ne Yèyè ùvwa naabò. Ncyà bushùwà. Mònaayaaku mpindyewu.

⁹¹ Ne tudi tusangana ne Yoshùwà ùvwa mumanyè ne, bufukù bôbô ànu bwilè, bàvwa bafwànyine kudifinda eku ne eku ne kutwilanganabò muntu ne mukwèndè, ne—ne kudisangabò ne kwenza cilwilu cinènè, ne yèyè mufwànyine kupeta naabò lutàtù lukolè ditùkù dyà pàvwàbu bùyà. Kàvwa mumanyè cyà dyanza to, ki kutàngilayè muulu kùdi Nzambi. Ûvwa dijinga ne dikwàcisha, ne ùvwa ujinga bwà dîbà kushààladi diimàne tèndé. Ki kutùminayè ànu dîbà dîyì bwà kushààladi kacyà diimana tèndé, ne...kwambilayè “ngondo bwà kushààlayè mulembèlèle pa Ayàlònà,” ne kàtentemuku to too ne pàvwàye mwà kumutùmina dîyì. Ki ngondo ne dîbà kushààlabi biimàne tèndé munda mwà mèbà makùmi àbidì ne ànaayi, pàvwà Yoshuwa ùlwangana mvità apu, too ne pàakacimunàye mwena lukunà awu, bwalu ùvwa ànu mu njila wa mudimu. Ûvwa ne bukenji bwà kucyènza, bwalu ùvwa munkaci mwà kutùmikila mèyi matùma à Nzambi.

⁹² Ne wèwè paùdi ànu mu njila wa mudimu, mulamè Dìyì dyà Nzambi, wenza ànu cidiYe mukwambile bwà kwenza aci, wènda bilondèshile mèyi matùma à Nzambi, wèwè udi ne bukenji bwà kwambila mukunà awu ne: “Tentèmùka!”

⁹³ Nzambi ùtu ùshààla mukwàte ku Dìyì Dyèndè. “Wèwè mwambile mukunà ewu ne: ‘Tentèmùka,’ kùyi wela mpatà mu mwoyi wèbè to, kàdi witabuuya ne ciwàmbi aci necyènzekè, udi mwà kupeta cyôci ciwàmbi aci.” Yesù ngwákamba aci, mu Maakò Munsantu 11:22. Ki Bulelèlè mbwôbò abu. Ndi mumanyè ne aci m'Bulelèlè. N'Dìyì dyà Nzambi, ne cidi cijaadika ne m'Bulelèlè. Tutu ànu tuumvwa bwôwà mînga misangu. Tutu tufika mu mùshindù wà ne, tudi tuumvwa bwôwà bwà ne Yèyè kààkushààla mukwàte ku Dìyì adi to. Yèyè's neàshaalè mukwàte ku Dìyì adi. Yèyè wàkamba ne Neàcyènzè. Mpindyewu, tudi tusangana ne aci ncilelèlè. Wàkacìjaadika.

⁹⁴ Cipròfètà cyà Yesàayi, musangu kampàndà, ncintu kampàndà cìvwà kacyà kaciyikù cyanji kwenzeka to; kacyà

kwônsò eku, ne kacitukù cyanji kwenzekà kacyà to. Wákamba ne: “Virgò neimitè difù.” Nudikù mwà kudifwányikijila mukàji wetù ewu, kàyikù mumanyàngàne ne mulùme, mufwányine kulela mwànà anyi? Yeshàayi wákamba ne: “Virgò neimitè difù.”

Ki Nzambi kwenza ne virgò ìmitè difù, bwà kujaadikayè bulelèlà bwà Dîyi Dyèndè. Wákajaadika Dîyi Dyèndè adi, bwalu virgò wàkiimita difù bulelèlà ne kulelayè Mwànà wa balùme.

⁹⁵ Mpindyewu, Dîyi adi divwijiibwe mubidi, tàngilàayi cyàkenzàDi. Pààkalediibwà Mwànà wa balùme awu, Ùvwa Dîyi Dyòdi diinè. “Ku cibangidilu kwàkadi Dîyi, ne Dîyi dyàkadi ne Nzambi, ne Dîyi dyàkadi Nzambi. Ne Dîyi dyàkavwijiibwa mubidi ne dyàkasòmbela munkaci mwètù.”

⁹⁶ Yèyè ùvwa Dîyi dyà mwoyi adi. Wákajaadika ne Yèyè nguvwa Dîyi dyà mwoyi adi. Wákambila balongeshi bàà mu ditùkù adi abu ne: “Nganyì udi mwà kuMpiisha bwà mpèkaatù?” *Mpèkaatù* ùtu “bupidyà.” “Nganyì udi mwà kuNgambila ne Ndi mwena bupidyà? Dîyi dyônsò ditù difùndiibwe bwà bwalu Bwànyì adi, s’ndyùle.” Mèyi madyànjila kwamba mwandamutekète à ndekeelu à mu nsòmbelu Wendè àkuujiibwa mu mèbà mwandamutekète à ndekeelu, pa nkùrusè. Byônsò byàkafùndiibwà bwà bwalu Bwèndè abi, byakùjiibwa, bwalu Yèyè ùvwa Dîyi. Wákajaadika ne ki cìvwàYe, èyowà. Wàkondapa babèèdi. Wàkabiisha bafwè. Wàkacimuna lufù, ifernò, ne lukità. Wàkajaadika ne Yèyè ùvwa Dîyi.

Mònaayi bwalu bwà ku nzùbu kwà Yayilò eku ebu. Yèyè ùvwa. . . Ùvwa mubàmbile bulelèlà. Tudi tuMumòna pàvwàYè ùkòsolola ùsabuka mbù. KubwelaYè.

⁹⁷ Kùvwa mukàji mutekète pa kakùnà apu, ùvwa mutùule mfrangà yèndè yônsò ku bangàngàbukà. Kakùyi mpatà to, bangàngàbukà bàvwa benzè mwàbò pààbò mwônsò mwà kwenza amu, bwà kwondopa mukàji awu; pàmwapa bangàngàbukà bàà beena Ebèlù, ne yèyè awu ùvwa mukàji wa beena Ebèlù, nènku bàakenza mwàbò pààbò mwônsò mwà kwenza bwà mwanààbò wa bakàji awu. Nànsha nànkù, kabààkapeta cintu nànsha cìmwè bwà kwimanyika mashi à àlwa munda aa to, cìvwà, pàmwàpa, cikondo cyà diimana dyà diya dyà ku mashi ne mashi èndè àvwa matuutè nkòkà mu mùshindù wà ne yèyè. . . kakwàcikwètù aku kàkaavwa kalwè katekètàngàne mu mùshindù wà kakàciyi kàbìdì kakùmbana mwà kwendakana to. Nènku yèyè ùvwa muumvwè bààkula bwà Yesù. Ne mmwenzè ànu ùmòna kaabwàtù kakesè aku kènda kàdisàka mu micì yà ku dilobo, kupwekayèku bwà kudìmwènayè.

⁹⁸ BaMudyudi bùngì cyanààna bàvwa biimàne mwaba awu. Ne Yèyè kî mmupangè badyudi leelù ewu to. Bìikalapù nànsha bamanyè ne Ùvwa Nganyì, nùnkù kabàvwa mwà

kwikala baMudyudi to. Kàdi bàvwa baMudyudi bwalu kabàvwa bamanyè ne Yèyè ùvwa Nganyì to.

Nènku ki mùshindù wùdibi ne Mukenji nàнку leelù ewu, bantu bààbùngì bîmpè balùmè ne bakàji bàdi bàdyula Eci bwalu kî mbamanyè cidiCi to.

⁹⁹ Yesù wàkamba ne: “Bu ne nuvwa bamanyè Mòsà, nùнку nudi baMmanyè Mémè. Mòsà wàkaakula bwànyì Mémè. Bantu banènè bààbùngì bàvwa bàjinga bikolè kumòna ditùkù edì. Mémè ncìyì ngenza byenzedi byà Taatù Wanyì to, díbà adi kanùNgiitàbùùjì to. Mémè ndi ne bujaadiki butàmbe bunènè,” mwàkambàYè, “kutàmbe bwà Yone, bwalu byenzedi bìndì Mémè ngenza, bìdi bijaadika ne Taatù ùdi Naanyì.” Ùvwa ne byenzedi bitàmbe bunènè, bwalu Yèyè nguvwa Mumanyishiibwe awu. Yone wàkamanyishiibwa pèndè, bu dìyì dyà ewu uvwa wela lubilà mu cipèèlà. Kàdi pààkalwàYè, Yèyè nguvwa mupròfètà uvwa Mòsà mwambè ne nguvwa mwà kujuudiibwa awu.

Ànu mûmvwà ngamba dilòlòlò adi amu ne, Yèyè mmulwè mu mènà àsàtù; dìnà dyà Mwànà wa Nzambi, Mwànà wa muntu, ne Mwànà wa Davidì.

¹⁰⁰ PàvwàYè pa buloba apa, musangu wà kumpàla, Ùvwa Mwànà wa muntu. Kàvwa mwà kwikala Mwànà wa Nzambi díbà adi to; Yèyè kààkambakù ne ncìvwàYè to. Wàkamba ne Ùvwa “Mwànà wa muntu.” Pàvwa muntu kanà yònsò mwà kuMwela mpatà, Ùvwa wàmbe ne: “Udi umòna Mwànà wa muntu; Mwànà wa muntu.” Mpindyewu, “Mwànà wa muntu” ùdi *mupròfètà*. Bìvwa bikèngela bwà kulwaYè mùshindù awu, bwalu, Mufundu, Yèyè kèna mwà kulwa bibèngàngàne ne Mifundu nànsha.

¹⁰¹ Ki bwà cinyì, leelù ewu, bìdi ne Mukenji wètù—wètù wà cikondo eci kawèna mwà kulwila kùdi beena tèlòlòjì ne ku tèlòlòjì nànsha, bikèngela cyàlukilè ku cintu cìmwècìmwè cyàkalayàci bwà kwenza aci. Bidi ne cyà kwikala mùshindù awu.

¹⁰² Pa nàнку tуди tusangana ne, mu Muntu ewu, bìvwa bikèngela kwikalaYè mupròfètà. Kì m’Mwànà wa Nzambi apu to, bìvwa bikèngela bwà kwikalaYè Mwànà wa muntu. Yèhowàh Yèyè wwinè wàkabiikila bapròfètà, Yelèmiyà ne bakwàbò abu ne: “Mwànà wa muntu.” “Panùdi numòna Mwànà wa muntu. . .” “Mwànà wa muntu Nganyì’s?” mwàkatùngunukàbo ànu ne kwela lukonko.

¹⁰³ Pashiishe, Wàkakwàta mudimu ne mwânzù Wèndè awu bu Mwànà wa muntu. Pashiishe mMukwàte mudimu ne mwânzù Wèndè awu mpindyewu bu Mwànà wa Nzambi. Nzambi ùdi Nyumà, ne pàdiYè mpindyewu mukwàte mudimu mu Bikondo byà Èkèleeziyà, bu Mwànà wa Nzambi. Mpindyewu, mu Bukalenge bwà bidimu cinunu, Yèyè neikalè Mwànà wa Davidì, pààsòmbàYè pa nkwasà wa butùmbi wa Davidì. Yèyè ngwìkala mupyànyì wa nkwasà wa butùmbi awu, Mwànà wa Davidì.

Mwânà wa muntu, Mwânà wa Nzambi, Mwânà wa Davìdì, kàdì m'Muntu ànu umwèumwè awu díbà dyònsò.

104 Ànu mùdì Taatù, Mwânà, ne Nyumà Mwîmpè; mudimu wà Nzambi. Yêyè ùvwa Nzambi Taatù, pashiishè kulwaYè Nzambi Mwânà, mpindyewu Ùdì Nzambi Nyumà Mwîmpè. Kaciyi Nzambi yisàtù to; Nzambi umwèpelè, mamwèneshiibwa àsàtù, byambiibwà bisàtù byà Nzambi umwèumwè awu.

Mpindyewu tudi tusangana ne, ne mu díbà mene ditùdì ne mwoyi mpindyewu edi, Nzambi mmushààle mukwàte ku Díyì Dyèndè byà mwomùmwe ànu mwàkenzàYe musangu awu awu.

105 Tudi tusangana ne Wàkakòsolola mbù. Mukàjì ewu ùvwà muMwitàbùùje, kùvwa cintu munda mwèndè amu cyàkabangà kutuuta bikolè. Kàvwa naaci ne Mufundu to, ànu mùvwàbi ne Yoshùwà kàvwa ne Mufundu bwà kwimanyikayè díbà to, kàdì mukàjì ewu ùvwa mwitàbùùje munda mwà mwoyi wèndè ne Yêyè ùvwa Mwânà wa Nzambi. Pa nànkù kwambayè ne: “Bu mèmè ànu mwà kulenga ciwàlu Cyèndè, nèngòndopiibwè.” Ki kudifindayè mu musumbà wà bantu awu too ne mwàkalengàye ciwàlù Cyèndè, nènku mashi àvwà àlwa munda awu kwimanawù.

106 Mpindyewu, Yêyè kutàngila mu batèeleji amu, bwà kujandula ne wàkaMulenga awu ùvwa nganyì. Kakùyì mpatà to, kùvwa ànu muntu kampànda. KwimanaYè. Bantu bònsò baMungwile; ne bamwè bàMwelulwila, bàmwè bàMuseka; mwàkwidi mwimànyine pa bule ùMwela nkonko, ne balombodi bàà èkèleziyà, ne bakwàbò. Kàdì kùvwà bàmwè bàvwà baMwitàbùùje. Nènku, ki paanyimà pàà katanci kwimanaYè, dyàkàmwè, kukùdimuka, kwamba ne: “WàNdengi awu nganyi?”

107 Bamwè bàà kùdìbo kwambabò ne: “Mòna's, Mulongeshi!” Ngeela meeji ne ùvwa m'Peetèlò wàkamba awu, “Mòna's, musumbà mujima ewu's mmuKungwile. Mòna's, ne udi 'muKulengè' nganyi? Mòna's, bantu bònsò's bàdì mukanci mwà kuKulenga!”

Yêyè ne: “Kàdì's Ndi muumvwè ne bukolè mbupàtùke mu Mèmè emu.” KushààlaYè mutekètàngàne. Dìvwa ndilenga dyà mùshindù mushiilàngàne.

108 Twìkalapù nànsha mwà kumòna aci's, mwanèètù wa balùme, mwanèètù wa bakàjì! Bu wèwè mwà kuMulengaku ne dilenga dyà mùshindù kampànda's wè! Kaa, nwènú babèèdì, nkààdì ndìlongolola bwà kunùsambidila, ànu mu tusunsa tukesè cyanààna emu. Ndi cyà bushùwà ngiitabuuja ne ndi ne Nyumà Mwîmpè, kí Nyumà Mwîmpè mupite unùdì nendè kunùdì aku awu, anyi udibò nendè kùdì bantu aba to. Nyumà Mwîmpè ànu umwèumwè awu, kàdì's ndíyì ditùma dyà Nzambi; ne nwènú mwà kwitabuuja ne ndíyì ditùma dyà Nzambi, dyà kusambidila babèèdì, ne kubàtentekela byanza, ne kwipata nyumà mibì, ne

milayi yidiYe mwenzè, neciikalè cintu cimècimwè aci bwènù nwènù. Neùpetè cyùdi ulòmba aci, bu wèwè mwà kuciitabuuja.

“Udi mwà kwitabuuja ne Ndi ne bukolè bwà kwenza cyôci eci anyi?” mwàkambà Yesù.

¹⁰⁹ “Èyowà’s, Mukalenge, ndi ngiitabuuja,” mwàkambà muntu uvwa ne mwànà ne ciseki awu, “Ndi ngiitabuuja ne Wèwè udi Mwànà wa Nzambi uvwa ne cyà kulwa pa buloba awu.” Mpindyewu, tudi bamanyè ne bìdi mwà kukèngela ànu lwidi alu bwà kutwàla bipeta.

¹¹⁰ Mpindyewu, lùkàsàlùkàsà, twèlààyibi meeki kùdiYe mu katanci kakesè, ki Yèyè ewu wènda ùbanda ne njila Wendè buludì. Mwakwidi mukesè kampàndà kulwayè, kakùyi mpatà to kakwàcikiwètù aku kàvwa keena kwitabuuja kàà ku mikàlu.

¹¹¹ Bàdiku búngi cyanààna pa buloba leelù ewu, twena kwitabuuja twà ku mikàlu. Mbaswè kwitabuuja Aci. Mbaswè kwitabuuja ne Nyumà Mwimpè ngwa cyà bushùwà. Mbaswè kwitabuuja ne eci ki nkwaka wa bàpostòlò awu, mwàkalayà Nzambi ne mu matùkù à ndekeelu Úvwa mwà kupòngolola Nyumà Wendè. Tudi...mmuswè kwitabuuja mu Maalàki 4 ne, Wàkalaya ne, mu matùkù à ndekeelu Diitabuuja dyà—dyà Mpenta dyà ku cibangidilu òvwa mwà kwalujuludiibwa cyàkàbìdi kùdi—kùdi èkèleeziyà.

¹¹² Maalàki 4 ngudi ucyàmba. “Mònaayi, Nènnùtùminè Eliyà mu ditùkù dyà ndekeelu,” ncyà bushùwà, “ne yèyè neàlujululè Diitabuuja dyà bânà kùdi baataatù,” nwamònu’s, “kàbìdi, Diitabuuja dyà baataatù kùdi bânà.” Nwamònu’s, ki cidi ne cyà kwikalakù.

Wèwè udi wamba ne: “Èè, awu’s ùvwa n’Yone Mubàtiji.” Bwàlà, bwàlà.

¹¹³ Yone Mubàtiji ùvwa Maalàki 3. Ncyà bushùwà. Maatààyì 11 ngudi mwambè nànkù ne: “Bu nwènù mwà kucyàkidila, yèyè ewu ki wàkambabò ne: ‘Mònaayi, Ndi ntùma mùsànjeelà Wanyì kumpàlà Kwànyì.’” Úvwa Eliyà, cyà bushùwà. Yesù mmwambè ne ncìwàye. Kàdi kí ng’Eliyà wa Maalàki 4 to, nànsha kakesè.

¹¹⁴ Bwalu: “Dyàkàmwè paanyimà pàà Mukenji awu, bìkèngela buloba bwòshiibwè ne kapyà, ne baakàne bèndelè pa butù bwà beena lwonji.” Pa nànkù kacýàkenzeka mu cikondo cyà Yone to. Bìkèngela tùpetè Mukenji wà wàlukila wùpàtula bantu mu ngiikàdilù yònsò yà cyena-màngumba eyi, wùbààluja ku Diitabuuja dyà ku cibangidilu, dishùwashùwàlè dyà beena mpenta. Ne tudi tucimòna cyènjiibwa, ciikàle cyùja Mufùndù wùdi wùkèngela bwà wènzekè. Mifùndu yònsò yidi ne cyà kuula. Mùshindù mwinè wutùdi bafwànyìne kwangata mikwàbò yàbùngi ku yòyi, mbifwànyìne kungangata dìmà dyàbùngi kutàmba dindì nàadi mpindyewu, bwà kuleeja. Kàdi nudi nuumvwa bintu ebi ne, bìkèngela byènzekè ànu menemene

mùshindù ewu, kùdì bânà bàà Abraham, ànu mwàkalayàYe amu.

115 Tudi tumòna Yesù ùbanda mpindyewu bwà kuya kondopa mwânà mukesè wa bakàji awu. Bwalu, taatù awu, mwena kwitabuuja mukesè wa ku mikàlu awu, cintu kampàndà cyàkafika mu mùshindù wà cìmukèngela bwà àjingululè Yesù, pa nànkù, ngàngàbukà ùkaavwa mumwèlè làà. Ki kwasaye kafulu kèndè kafìke aku ne kuyayè kuntwaku bwà kakeba ní ùvwàkù mufwànyine kapeta Yesù. Nwamònu's, Yèyè ùtu ànukù misangu yònsò paùdì Nendè dijinga. WàkaMupeta mucikàlè ùfùminakù ku dibwela ku mwelelu wà màyi aku.

116 Ki yèyè ne: “Lwà kwókò kùdì mwanàànyì mukesè wa bakàji eku, Ùmutentèkèlèku byanza, nènku neàsangalè.” Yèyè ne: “Mmulààlè ùpunga ne lufù. Mmwanàànyì mulela umwe.” Yèyè ne: “Ùdi ne bidimu dikùmi ne bibidì. Katwèna ne bânà bakwàbò to. Mèmè ne mukàjàànyì,” pàmwàpa, “tukàadi twenda tukùlakaja. Ne ewu ki mwânà umwèpelè utùdiku pèètù nendè, kàdi nyewu mulààlè ùpunga ne lufù. Mukalenge, ndi muKwitàbùùje. Bu Wèwè ànu mwà kulwa kamutentekelakù byanza, yèyè neàsangale.”

Nwamònu's, cyàkajingululàye ncinyì? Wàkajingulula ne Dìyi dilaya dyà Nzambì adi òvwa dimwènèshìibwè mu Muntu ewu.

117 Ànu byà mwomùmwe ne mwàkamba Nìkòdemè ne: “Laabi, mulongeshi, tudi bamanyè ne Wèwè udi mulongeshi mufùmìne kùdì Nzambì. Bwà aci kaayi tudi bamanyè. Bàfaalèsà mbacimanyè.” Bòbò kabàakacijikula bwà cinyì? “Muntu nànsha umwe kì mmufwànyineku kwenza bintu byùdì Wèwè wenza ebi to, piikalà Nzambì kàyi Nendè. Tudi bamanyè ne Wèwè udi mufùmìne kùdì Nzambì.”

118 Apa tudi tusangana ne Yayilò ùvwa mwitàbùùje cintu cìmwècìmwè aci. Wàkamba ne: “Lwàku Ùmutentèkèlè byanza.” Ùvwa mumanyè ne Nzambì ùvwa munda Mwèndè. “Tentèkèlè mwanàànyì byanza. Nànsha yèyè ùpunga ne lufù, neikalè ne mwoyi.”

119 KuyaYè ànu nendè. Ne pàcivwàye wènda ùya apu, ki mutùmìibwè ne mukenji ùlwàlwa ewu pwàà, wàmba ne: “Lekèla kuMutàcisha, kùtácishi kàbìdì Mulongeshi to. Mwânà wa—wa bakàji awu, wáfù, wàmanyì kufwà patùdì twakulangana apa. Ùkaadi mutùùle nkindà.”

Yesù kukùdimuka kùdì Yayilò, kwamba ne: “Ncyènakù mukwambile ne: ‘Wèwè mwitàbùùje ànu nàka, neùmonè butùmbì bwà Nzambì’ anyì? Wèwè ànu mwitàbùùje nàka!”

120 KubwelaYè mu cibambalu amu, ki bòbò abu, bònsò bàdyàbakeena bàdila myadi, bàtwa mikèmù, ànu mùtù bantu kanà bònsò aba bafwànyine kwenza's. Mwânà wa bakàji mukesè mulenga, mmwânà wa bakàji wà mpaasàtà, nguvwa mufwè, ne mumàne kuumushiibwa ne pa buloba ebu. Kàdi pàmwàpa

ùvwa mufwè kùkaavwa ndambu wa mēbà, ne pashìishe bamanè kumulààdika ne mu nkwasà wa fòtèyè, ne bàkaavwa ne pabwìpì ne kwela mubidi wèndè bwanga bwà kubèngawù kubola, pāmwāpa, ne bakamutèèke ku luseke, bwà kumujiika.

Pashìishe tudi tusangana ne Yesù wàkabwela mu nzùbu amu. Bòbò bònsò bàvwa munkaci mwà kutwà mikēmù. KwambaYè ne: “Anji pùwayi.” Yèyè ne: “Ki mmufwè to, kàdi mmulààle tulù.”

¹²¹ Mpindyewu nudikù mwà kudifwànyikijila cìvwàbo bòbò bàdyāmbidìle anyì? “Mòna’s, twàmanyì muntu ewu, bwà mpindyewu. Tutu tuumvwa ne Yèyè ewu mmwānà mulela mu masandi. Ne tutu tuumvwa bwà bwalu Bwèndè, bwà maalu Èndè ònsò à mafi àtùYe mudyànjlile kwamba awu. Bwà mpindyewu kaayì twàmanyì ne mwakwidi ùvwa wàmbilamù ne, ‘muntu ewu mmupāle,’ bwalu twètù tudi bamanyè ne mwānà wa bakājì ewu mmufwè. Ngàngàbukà’s mmujikùle ne ‘mmufwè,’ s’nyèyè wàwa mulààdika panshì. Mufwè mwinè, ne twètù bamanyè ne mmufwè.” Kwambabò, kuMusekabò byà bàMudyombola, mu ngaakwilù mukwabò ne, kwenzabò bwà kuMufwisha bundù, mu diMudyula amu.

¹²² Kàdi Yèyè ùkaavwa mumanè kwamba ne kì mmufwè to. Ki cyònsò cìvwà cikèngelà. “Mmulààle tulù.” Nànsha badyūdi biikàlekù búngì kaayì, Yèyè neàjaadikè Dìyì Dyèndè! KubàpātulaYè bònsò mu nzùbu amu, mwipàte beena bupidyà bònsò abu. KwangataYè Peetèlo, Yakòbò, ne Yone, beena kwitabuuja abu, bantèmù bàsàtù, ne taatù ne maamù, kubwela e kukwata mwānà wa bakājì awu ku cyanza, ne kwakula mu ngaakwilù wàkabiiikila musùùkà wèndè kuwàlujila mwāmwa mu mwaba kampàndà mu Cyendèèlèlè. Ki mwānà wa bakājì kwikalayè ne mwoyi.

¹²³ CyàkenzaYè ncinyì? Wàkajaadika Dìyì Dyèndè. Wàkajaadika cyàkambaYè aci. Kāvwa mufwè to. Ùvwa mulààle tulù. Mpindyewu tudi tujandula ne, mu kwenza kwà cyòci eci, tudi tujandula, ne Yèyè wàkajaadika cintu kampàndà cikwàbò kuntwaku. Mpindyewu Wàkajaadika ne Ùvwa Nzambi. Wàkajaadika ne Ùvwa ne didyànjlila-kumanya. Tàngilāāyi nūmonè cìvwà Dìyì Dyèndè dyambè mpindyewu. “Ki mmufwè to, kàdi mmulààle tulù.” Nwamònu’s, kāvwa mufwè to, twamb’eku twamb’eku. Ùvwa mulààle tulù. KuleejaYè didyànjlila-kumanya Dyèndè. Mpindyewu, kùvwa kufwānyine kwikala bānà bàà bakājì batekètè bààbúngì bafwè mu dindà dimwèdimwè adi, kàdi bwà ewu kaayì kāvwa mufwè to. Ùvwa mulààle, ànu mùvwà Lazàrò amu. Ki kumubiikilaYè bwà àpatukè mu tulù atu, bwalu kāvwa mufwè to.

¹²⁴ “Ne ewu udi ungiitabuuja Mēmè, nànsha byòbì ne mmufwè, kàdi neikalè ne mwoyi; ne ewu yònsò udi ne mwoyi ne ùngiitabuuja Mēmè, kàadyàkufwàku to.” Ànu aba bàdì mu Mukàndà wà Mwoyi wà Mwānà wà mùkòòkò, bààkapikulāYè

pàākafwàYe apu abu, ki bààbikilàYe bwa kupatukabò mu tulù atu, mu ditùkù adi, aba bàdi bafùùlùlùdiibwè kùdi bukolè Bwèndè, bàdi ne bukolè bufùùluludi abu búsanganyibwa munda mwàbò abu. Ànu mene mûngâmbi makèèlèlè dilòlò awu amu; nànsa paanyimà pàà Elishà mumanè kufwà, ne mifùbà yèndè yisanganyibwa mu lukità, bukolè bufùùluludi abu bùcìvwa ànu pa mifùbà yèndè ayi's.

¹²⁵ Bushùwà, Wàkajaadika ne Ùvwa Nganyì. Mpindyewu tudì tusangana kàbìdi, byà mwomùmwè, Yèyè wàkajaadika kàbìdi, ne, mu Ebèlù nshapità mwi4 ku mvensà wa 12, Wàkajaadika ne Yèyè ùvwa Dìyì dyà Nzambì. Wàkenza nànkù cyà bushùwà. Mònaayi cyàkenzàYe. Ebèlù, 12, Ebèlù 4:12 ùdi wàmba ne: “Dìyì dyà Nzambì nditàmbe bukolè, ditwè kutàmbe mwelè wà mvità wà nseke yìbìdi, ne—ne Didi kàbìdi Dijinguludi dyà meeji ne mapàngadika à mu mwoyi.” Tàngilàayi ànu katanci kakesè cyanàànà mpindyewu.

¹²⁶ PàcìvwàYe ùbangilakù mudimu Wèndè wà bwambi, paanyimà pàà Yèyè mumanè kupàtuka bwà kuleeja ne Yèyè ùvwa Dìyì, pààkapàtukàYe mu cipèèlè ùmukila ku diteeciibwa Dyèndè, kùvwa muntu dìnà dyèndè Peetèlò, dìnà dyèndè dìbà adi dìvwa Simonà. Ki kulwayè kùdi Yesù ne mwanààbò wa balùme, Andèlè. Kàdi mmwenzè ànu ùbwela mu Bwikadi bwà Yesù Kilistò anyì, Yesù kwambaYè ne: “Dìnà dyèbè n'Simonà. Ne dyà tatwèbè ùvwa n'Yona. Kubangila ku mpindyewu nebakubiikilè Peetèlò.” Aci's cyàkajaadika ne Yèyè ùvwa Dìyì, bwalu Dìyì n'Dijinguludi dyà meeji ne mapàngadika à mu mwoyi. Yèyè ùvwa Dìyì.

¹²⁷ Filipò wàkamòna eci cyènzeka. Kuyayè mu nyùngulukilu wa mukunà, muyè ditùkù dijimà, ne kwalukilayè. Ki kulwayè ne mulundà wèndè dìnà dyèndè Nàtànàèlè. Ki yèyè ne: “Maalu àà's àdi cyà bushùwà munkaci mwà kwenzeka. Mòsà wàkàmba ne 'Mukalenge Nzambì wetù neàjuulè Mupròfetà' bu yèyè, kàdi's ki Muntu nyewù. Mòna's, Yèyè's mmwambile Simonà ne ùvwa nganyì, ne tatwèndè mene ne ùvwa nganyì, ne twètù tudì bamanyè ne cìdiYe wàmba aci mbulelèlè. Bwalu, Nzambì mmucyambè mu Dìyì, nènku's ki cyôci eci cijaadikiibwe ne Yèyè nguvwa ne cyà kwenza cyôci aci, ne aci's ncidi cijaadika ne awu m'Maasiyà.”

Nènku mmwenzè ànu ùbwela mu Bwikadi Bwèndè, Yesù kumwambilaYè, wàmba ne: “Mònaayi mwena Izàlèèlè, mwena munda mùdi kamùyì lubombo.”

Awu ne: “Laabi, Udi mummanyè dìbà kaayi?”

Yèyè ne: “Kumpàlà kwà Filipò kukubiikilayè, paùvwà mwinshì mwà mucì apu, Mèmè mvwa mukumòne.” KujaadikaYè Dìyì Dyèndè. KujaadikaYè Dìyì dyà Nzambì. Ki cyàkenzàYe.

¹²⁸ Mukàjì wa ku ciinà cyà màyi awu, pàvwàye ne...Èè, Wàkamulòmba bwà kuMupèeshilayè màyi à kunwà mu mulòndò

wùvwàye ùsunyina mâyi mu ciinà awu, ki yêyè ne: “Kacìtu ciibidilù cyènù nwènù beena Yudà bwà kutùlòmba twètù bakàjì bàà beena Sàmaalèyà cintu bu nànkù to, bwalu katùtu neenù malanda to.”

Yêyè ne: “Kàdi bu wêwè mumanyè ùdì wakula nendè ewu ne Nganyì, nùnkù wêwè's nguvwa mufwànyì kundòmba Mémè mâyi à kunwà.”

Yêyè ne: “Ciinà cyà mâyi ncile be.”

Ki muiiiki awu, pàvwàwu wùtùngunuka, ndekeelu wa byònsò kujandulaYè ciwà lutàtù lwèndè. Ki Yêyè ne: “Ndà ùkàngàtè bàyeebè, ùlwe mwaba ewu.”

Yêyè ne: “Ncìtu ne bàyaanyì bwalà.”

Yêyè ne: “Wambì bulelèlè, bwalu ukààvwa naabò bàtaanu, kàdi ùdì musòmbe nendè mpindyewu awu kî mbàyeebè to.”

¹²⁹ “Mòna's,” mwàkambàyè, “mukalenge, ndi mmòna ne Wêwè ewu udi mupròfetà.” Yêyè . . . “Katùvwakù bapetè mupròfetà to kùkaavwa bidimu nkàmà yìnaayi, udi mumanyè's.” Yêyè ne: “Ndi mmòna ne Wêwè ewu udi mupròfetà. Mpindyewu, tudi bamanyè ne pààlwà Maasiyà, udi ubiikidiibwa ne n'Kilistò awu, pààlwàYe, Yêyè neàtwàmbilè bintu byà mùshindù ewu ebi. Ki cìikalà cimanyinu Cyèndè ncyòci aci.”

PàakambàYe ne: “Mémè ki Yêyè udi wakula neebè ewu,” s'Wàkajaadika Dìyì Dyèndè. Yêyè . . . tudi tujaadika cyàkambaYe ne ncìdìYe. Yêyè nguvwa Maasiyà awu, Mwànà wa Nzambì.

¹³⁰ Mpindyewu tudi kàbidì tusangana, ne, mukàjì mukesè uvwa ne disaamà dyà mashi àlwa munda edi, wàkalenga ciwàlù Cyèndè awu, aci cyàkamujaadikila kàbidì ne Yêyè ùvwa Dìyì dyà Nzambì.

¹³¹ Mpindyewu vùlukàayi, dilòòlò edi ne, Yesù wàkamba . . . Kàbidì, mu Ebèlù, 1, Ebèlù nshapitè mwi3, ngeela meeji nyèyè, Mmwambè ne: “Yêyè ùdì mpindyewu Mwakwidi Munènè,” cikondo citùdì ne mwoyi mpindyewu eci, “Mwakwidi Munènè musòmbe mu Ngiiakàdilù mutàmbe bunènè wa Nzambì, mu Maulu, udi mwà kulengiibwa kùdì mateketa etù.”

Ebèlù 13:8 mmwambè ne: “Yêyè ùdì umwèumwè awu, makèlèlèlè, leelù, too ne kashidi.” Yêyè ùdì Nzambì umwèumwè awu ànu mùvwàYe amu. Ùdì umwèumwè awu dilòòlò edi.

¹³² Yone Munsantu 14:12, Yàye mmwambè ne: “Ewu udi ungiitabuuja Mémè, byenzedi bîNdì ngenza yêyè neàbyènzè pèndè. Neènzè mene ne bitàmbe ebi, bwalu Ndi nyà ku Taatù Wanyì.” Nwamònu anyi? “Ewu udi ungiitabuuja Mémè, byenzedi bîNdì ngenza ebi yêyè neàbyènzè pèndè.”

¹³³ Mu Maatàayi 28, Yêyè mmwambè ne: “Katancì kakesè aka bàà pa buloba kabàakuMmòna kàbidì to, kàdi nwènù

nenùMmòne, bwalu nêNgùikalè neenù mene too ne ku ndekeelu kwà buloba.”

¹³⁴ Yesù Kilistò ùdi umwèumwè awu makèèlèlè, leelù, too ne kashidi. Mmwimàne, dilòòlò edi, bwà kujaadika Dîyì Dyèndè. (Dìbà dyànyì dyàyi.) Kàdi Yèyè wàkajaadika ne Ùvwa mwà kucyènza. Wàkajaadika Dîyì Dyèndè dìbà adi, cyàkalayàYe bwà ditùkù adi aci. Wàkajaadika mèyì à Yeshààyì. Wàkajaadika mèyì à Noà. Wàkajaadika mèyì à Mòsà. Wàkajaadika mèyì à yònsò wa ku baprófetà.

¹³⁵ Yèyè wàkalaya ne mu ditùkù edi, ditùkù ditùdì twètù ne mwoyi edi ne, bàà pa buloba nebùikalè mu ngiikàdìlù wa Sodomà, balùmè ne balùmè bàsèlangana. Cìtàngìlaayi ànu pa buloba leelù ewu, pa buloba bujimà kùnyaaya mu ngendu; kî ng’ànù muneemu to, myaba yònsò. Mbyà njiwù mikolè. Mu Suède, nsongààlùmè ne nsongààkàjì yìyaaya kenza manàyi à skî pa nèjè, ànu butakà bwà pulupulu ebu. Nènku bàdì mu Alèmanyè ne mu France, ne myaba mikwàbò yònsò, bìdì ànu bantu bàà lukutukutu lwà menemene lutùdì naalù mùnu mu États-Unis emu. Ncikondo’s. Mémè, mémè mupetè mùshindù wà kwalukila, ndi njinga kwakulakù pa bîmwè byà ku bintu byà ciprófetà, kwakula neenù, bwà kunùleeja ne, cikondo citùdì ne mwoyi eci. Bible mmwambè ne: “Bànà nebàkookeshè baledi bààbò.” [Katùpà kàà mukaba wà mèyì munda mutupù—Muf.]

¹³⁶ . . .Dîyì. Kàdi, vùlukàayi ne, Abraham ùvwa ne dimiinu, òvwa dimiinu Izàkà. Ùvwa ne mamiinu makwàbò paanyimà pàà lufù lwà Sarah. Nènku ùkaavwa ne bidimu lukàmà ne makùmi ànaayi ne bitaanu, kusèlayè mukàjì mukwàbò, kupetayè bàna bàà balùmè mwandamutekète pa kuumusha bàà bakàjì, bwalu Nzambì ùkaavwa mumwalùje nsongààlùmè pàkaavwayè ne bidimu lukàmà apu. Ùkaavwa dìbà adi kàbìdì ànu ne bidimu makùmi ànaayi ne bitaanu, ki pashìishè yèyè. . . Tudi bamanye aci. Nkàadi munùyiishèci mu Californie emu, kukàadi bidimu.

¹³⁷ Nènku mpindyewu tudi tuumvwa ne Dimiinu dyà Abraham adi kadìvwa dimiinu dilelèlè dyà ku disangila dyà mulùme ne mukàjì kùdì Sarah to, òvwa Izàkà, dyàkènza ditùnga adi, kàdi Dimiinu dyà bukalenge òvwa nku mulayi, òvwa n’Yesù Kilistò. Nènku ku Dimiinu adi, Yèyè wàkajuula Dimiinu dyà bukalenge. Kaa, ekelekele! Mpindyewu twètù tudi bwakwidi bwà bukalenge, ditùngà dyà bukalenge, ditùngà dyà cijila, biikàle tulàmbula butùmbi kùdì Nzambì, mulàmbù wà mishikù yètù yidi yifila butùmbi kùdì Dìnà Dyèndè. Nzambì wàkajaadika Dîyì Dyèndè, Wàkiicia Nyumà Mwímpè pambidi pètètù.

¹³⁸ Wàkamba ne: “Ànu mwàkadìbì mu matùkù a Sodomà, ki mwikalàbì kàbìdì mu ditùkù diikalà Mwànà wa muntu munkacì mwà kubuuludiibwa.” Mpindyewu nwamònu anyi? Kuumuka ku Mwànà wa Nzambì, ànu pabwìpì menemene ne kulwa Yè Mwànà

wa Davidi, Ûdi uDibuulula cyàkàbìdì bu Mwànà wa muntu. Nwamònu Mufundu awu anyi?

¹³⁹ Bwalu, ki mùtùYe wènza misangu yònsò, Kàtukù wènza cintu nànsha cìmwè to Kàyi mwanjì kucìmanyisha basadidi Bèndè bapròfetà. Mmwòmò menemene. Ki cìwà mulayi Wèndè. Nwamònu anyi? Yèyè kàtukù wènza cintu nànsha cìmwè... Nzambi kèna mwà kushima to. Ûtu misangu yònsò ànu wànji kucibuulula, dyàmbedi, kumpàlà kwà Yèyè kucyèna.

¹⁴⁰ Tàngilàayi mu nsòmbelu utùdi tusanganyiibwa leelù ewu ewu. Tàngilàayi kutùkaadi. Yònsò wa kunùdi neitabèku ne tudu mu Sodomà wa cyèna-leelù. Nudi bamanyè ne ditunga edi ndimanè kubwelakana. Kùdi...kakùcyèna ditèkemena to; kakùcyèna kushààlè lupàndù bwà ditunga edi anyi nì mbwà dikwàbò ditunga kampànda to. Tukàadi bapite apu mpindyewu. Bipròfetà bitù byamba bwà bwalu ebu, bikaadi byùle. Nzambi ùdi munkaci mwà kupumbulula, ùkèbangana ne kàkòòkò kàà ndekeelu mwaba wònsò wùdiku awu. Yònsò neyibwelè, dīngà ditùkù. Tukàadi ku cikondo cyà nshìikidilu. Tàngilàayi, bilondèshìle myaba.

¹⁴¹ Ndi nkulòmbakù wèwè, ànu bu mwanèètù wa balùme anyi wa bakàji, bwà ùtambèku kudyundisha diitabuuja ànu bwà katanci kakesè kumpàlà kwà twètù kusambidila bantu aba. Ne ndi mumanyè ne kabyèna bìkèngela bwà twètù kuya pa dībà kampànda to. Kàdi ndi—ndi—ndi muswè kubanga mulongo wa babèèdì, pashìishè nwènù bàdì ne cyà kuya abu nenùye dībà adi. Nwamònu anyi? Nwènù bàdì baswè kushààla mu mulongo wà babèèdì abu nudi mwà kushààlaayi. Kàdi anjì ngaanyishilaayikù, ànu bu mwanèènù, nnùfunkwinèku ànu cintu kampànda mu katanci kakesè cyanaànà.

¹⁴² Tàngilàayi Yesù, mu Luukà 17:30, nwamònu's, pàvwàYe wamba mwaba awu bwà cikondo cyà nshìikidilu, mùvwàbi mwà kwikala bu mu matùkù à Noà. Pashìishè kwambaYè ne: "Ne bu mùvwàbi, byà mwomùmwe kàbìdì, mu matùkù à Sodomà," yèyè ne, "piikalà Mwànà wa muntu munkaci mwà kubuuludiibwa." Mwànà wa muntu cyàkàbìdì, kàyi Mwànà wa Nzambi to. "Mwànà wa muntu," nwamònu's, aci cìdì citwàla cyàkàbìdì Maalàkì 4, twalukilamù buludì. Bipròfetà bikwàbò byònsò ebi bidibwinkamù buludì, mùshindù wùvwàbi ne cyà kwenzeka. Yèyè ùtu ùjaadika ne Dìyì Dyèndè dìdì nànkù. Ncyà bushùwà.

¹⁴³ Nènku mònàayi, mu kwenza kwà nànkù, mwikalàYe mwà kwicikija Nyumà Wèndè pa musunya wònsò, ne ciikalà mwà kwenzeka aci, mwikalà dyalujulula mwà kwalukila. "Nènku bānà bèènù balela bàà balùme ne bàà bakàji nebāmbè bipròfetà. Pa basadidi Bāānyì balùme ne bakàji Mēmè nēngicikijē Nyumà Wānyì. Ne Nēndeejē bimanyinu mu maulu muulu."

144 Ndi ne fòtò kaaba aka, wa Mwanèètù Lee Vayle udi mwab'ewu ewu. Ndi njinga kunùleeja ànu cìdì cyenzèke pa mukùnà, ditùkù adi, pàvwàbo bapàtule bânà balongi bônso mu tulaasà, pabwìpì menemene ne cyena-bwalu cinènè eci cyà dikàngula, Bitampì Mwandamutekète abi. Pààkapàtulàbo bânà balongi apu, mèmè mvwà kuulu aku mwikàle nsambila, ki Kapyà kàdì kàpwekà aka mu mmwènekèlu wa mùlòngojì, pashiishè kààlukila kàbandà ne kàbwayika, ne kànyùnguluka ne kàpweka cyàkàbìdì. Ki pàkambaYè cyà kuya kambila bantu. Twètù... Kì Cyôcì aci's, mwaba wùvwa tulaasà twà ku Tucson... ne kwàkabàndàCi mu mpèèpele aku.

145 Ki beena maalu a mamanya kukwàtabò fòtò, ne bikwàbò, ne kwelabò nkonko pa Cyôcì. Kwambabò ne: "Cìdì kwèpì? Cìdì cyenzèke ncinyi?" Kabèènakù mwà kucyùmvwa to, nwamònu's. Kaa, kì ncyenzela mu musokoko to, ànu kondo kàà mwoyi kabweja mu mîdimà's. Kacya... Yesù, pàvwàYe pànwapa apu, kùvwa miliyò yà bantu bàvwà kabàyi bamanyè ne Yèyè ùvwa pa buloba to. Eyowà. Nekwikalè miliyò leelù ewu bìikalà kabàyi mwà kuumvwakù to, makùmì à miliyò yà bantu.

146 Kàdì nekwikalè, kùdì aba bàdìCi citùmina, bôbò abu ki bìikalà mwà kuumvwà. "Beena meeji nebàmanyè Nzambì wabò mu ditùkù adi, ne bôbò nebènzè byenzedi byà bulòbo." Aci tudi bamanyè, dîbà ditùdì ne mwoyi mpindyewu edi.

147 Tàngilàayi mpindyewu Sodomà, tàngilàayaaku cyàkenzekà aci. KwambaYè ne: "Ànu mwàkadibi mu matùkù à Sodomà." Kùvwa kasùmbù kàà bantu bàvwà bindile mwànà mulaya. Twètù tudi twitabuuja nànkù. Ùvwa ng'Abraham ne kasùmbù kèndè aku. Kùvwa musùmbà wà bàà civùmvù, Lotà, mutwè ndambù cimpingà, nànsha nànkù mwena kwitabuuja; mu Sodomà mwàmwa. Bitùpà bisàtù byà bantu.

148 Kùtù misangu yònsò ànu bitùpà bisàtù abi. Beena Ham, beena Sem, ne beena Yafètè. Kàbìdì, beena kwitabuuja, beena kwitabuuja bàà budìngìbudìngì, ne beena bupidyà. Bàdì myaba yònsò, ne tudi—tudi tubàsangana mu kasùmbù ne kasùmbù kònsò. Nènkù, myaba yònsò, udi ubàsangana. Ne tusùmbù atu tùcìdì ànu mwab'ewu. Bìkèngela ùbitàpùlùlè. Udi mwà kubìlondeshila mu Mifùndu mwònsò amu, bìdì bìnwàngana ànu pyòpyopyò.

149 Tèèlejàayi eci. Tàngilàayi mwaba wutùdì twètù basòmbe, bilondèshile myaba ne mèyì à cipròfetà, dilòlò edi. Mpindyewu, yònsò wa kutùdì mmumanyè ne buloba bùdì mu ngiikàdìlu wa Sodomà.

Tudi bamanyè bipròfetà byònsò byà Izalèèlà, ùdì mu buloba bwèndè. Nwènù baswè kumanya bilondèshile matùnga mwaba wutùdì biimànyine, tàngilàayi Izalèèlà, mwaba wùdiye ùsanganyibwa.

¹⁵⁰ Nwênù baswè kumanya ne mmu ngiikàdìlù kaayi mùdì èkèleeziyà, tàngilàayi nùmonè mùshindù wùdì bakàjì bènza maalu. Mukàjì ng'èkèleeziyà. Mumònaayi, mùdiye ne nsòmbelu wa masandi, mupangè maalu; tàngilàayi, nùmonè kùdì èkèleeziyà ùsanganyibwa. Anjì mutàngilaayi, nwamònu's, nwamònu's, tàngilàayi ànu bakàjì. Nudi numòna mwaba, mùdì bakàjì bèenù bàdìpwekesha milongo ne bàlwa bakooyike bikolè, ki mùdì èkèleeziyà wenù nànkù, nwamònu's, cimfwànyì.

¹⁵¹ Tàngilàayi mwaba wùdì Izàlèlèlà ùsanganyibwa, nudi numòna cimfwànyì cyà cikondo menemene citùdì. Nwamònu's, tàngilàayi ànu bimanyinu abi ne maalu à kukèma. Bu nwênù—bu nwênù, anyi mèsù ènù wòwò makàngula, nenùmonè mwaba wutùdì tusanganyibwa.

¹⁵² Mpindyewu tàngilàayi bilondèshìle myaba mwaba wutùdì tusanganyibwa, buloba bùdì mu ngiikàdìlù wa Sodomà. Mpindyewu mònaayi ne: “ànu mwàkadibì.” Mpindyewu mònaayi, kùvwa muntu, mu ditùkù adi, mwindìle dila dyà mwànà mulaya. Abraham ne Sarah, bàvwa bindìle mwànà mulaya mu kasumbù kàà Abraham amu. Bòbò kabàvwa mu Sodomà to. Kàdì ànu pa dībà edi mene, nshapità wa ndekeelu wa bwalu abu, pabwìpì menemene ne mwànà mulaya awu kulwayè, kwàkatùluka bantu bàsàtù mu Dyulu, Mwanjèlò... Banjèlò bàbìdì ne Nzambì. Ne bààkatùluka ne kuyiikila ne Abraham, mwìnshì mwà mucì wà nsànga awu. Ncyà bushùwà anyì? Kàdì bàbìdì bàà kùdìbo bààkapweka e kubwela mu Sodomà ne kwela lubilà bwà kupiisha mpèkaatù yà cimenga. Ne pàvwa ànu pabwìpì menemene ne dyoshiibwa dyà bàà Bisàmbà byà bendè, mwinè musangu awu. Sodomà mujimà wàkabùtuka ànu piinè apu. Ànu bakesè menemene mbààkapàtudiibwà, Lôtà ne bàna bèndè bàà bakàjì bàbìdì. Mukàjèndè kààkangula mene mpasu to; wàkakùdimuka paanyimà. Mùshindù mwinè wùmvwàku mufwànyine kujinga kwikala ne dībà bwà kunùleeja cyòcì aci mpindyewu mene, mwaba wùdì èkèleeziyà awu mwimàne pa kaaba aku. Ndi muswè bwà nùmonè mpindyewu.

¹⁵³ Nènku Muntu umwe wàkashààdila paanyimà, wàkayiiikila ne Abraham awu, ne Wàkenzela Abraham cimanyinu. Nènku, tàngilàayi, Abraham ùkaavwa mumònèmòne Nzambì mu bimanyinu binènè byàbùngì. Tudi twitabuuja aci, kì mmwòmò anyì? Pabwìpì menemene ne mwànà wa balùme uvwa ulwa awu. Kàdì kumpàlà kwà mwànà awu kumwèneshiibwayè, kùvwa cimanyinu cyàkapèèbwàye.

¹⁵⁴ Bwalu, Mwànà awu, Mwànà mulelèlèlè awu, ùvwa ne cyà kwikala Mwànà wa Nzambì, ku diitabuuja dyà Abraham, nwamònu's, ùvwa n'Yesù. Twètù bu dimiinu dyà Abraham, bafwè mu Kilistò, tudi dimiinu dyà Abraham.

¹⁵⁵ Mònaayi mpindyewu kumpàlà menemene kwà aci kwenzekaci, kwà mwànà ewu kulwayè. Mpindyewu, Ewu

wàkashààla ùyiikila ne Abraham awu, Uvwa mwelè nyimà ku ntentà awu, wàkamba ne: “Abraham.” Mpindyewu, ànu ditùkù òm̀wè cyanààna kumpàlà kwà cyòci aci’s, yèyè ùvwa Abram. Mpindyewu Yèyè kwamba ne: “Abraham, mukàjèèbè Sarah, ùdi penyi?” kàyi Sarra, S-a-r-r-a to. S-a-r-a-h, mwànà wà bakàji wà mfumu. “Mukàjèèbè Sarah, udi penyi?”

Yèyè ne: “Ùdi mu ntenta paanyimà Pèèbè apu.”

¹⁵⁶ Yèyè ne: “Nèndwe kukumwènekela, nwamònu’s, bilondèshìle mulayi Wànyi wùNdi mukupèèshe.” Mu ngàakwìlù mukwàbò ne: “Cikondo cyà mwoyi, Sarah neàbangululè cikondo cyèndè cyà ciibidilu cyà mwoyi aci.”

¹⁵⁷ Kàdi Sarah, bu mùkaavwàye mununu, ne bidimu lukàma lujimà mpindyewu, mu ntentà amu, kusekelayè mu dyàpà. Nwamònu’s, wàkafùkisha mimwemwe mu yèyè mwinè, wamba ne: “Mmunyi mùdi Muntu wàwa mwà kwikala wàmbilamu? Wamònu’s, mèmè mukàji mukùlàkàji, mukalenge wanyi Abraham wàwa, mukùlkàji pèndè, maalu à bwena nzùbu mamanè kuya kùkaadi bidimu.” Yèyè ne: “Mmunyi mùndiku mwà kwikala kàbìdì ne milòwù ne mukalenge wanyi? Yèyè pèndè mukùlàkàji, eku mèmè mukùlàkàji, bapicishe cikondo cyà dilela, mijilu yà mabèèlè myumìnyine, yònsò... ‘Yèyè’s ùkaadi mùme yònsò.’ Mmunyi mutùdiku bafwànyine kwikala kàbìdì ne milòwù?”

¹⁵⁸ Kàdi Muntu wàwa, ne nyimà Wendè mwela ku ntentà, kwambaYè ne: “Bwà cinyi Sarah wàsekì, wamba ne: ‘Biinè bintu ebi bìdi mwà kwenzeka munyi?’” Cìvwa ncinyi aci? Dijingulula, dyà cipròfetà! Nwamònu anyi? Nwamònu anyi? Ki cyàkamònàye ncyaci.

¹⁵⁹ Mpindyewu kwambaYè ne: “Aci necyàlukilè cyàkàbìdì, ne Mwànà wa muntu,” cìvwàci aci, ùvwà m’Mwànà wa muntu ànu mwaba awu mene. Èè, kuMubiikilayè ne ng’Elohim: “Mukalenge Nzambì.” Elohim, muntu yònsò mmumanyè ne aci ncyà bushùwà, Elohim awu m’Mukalenge Nzambì. “Ku cibangidilu Elohim wàkafùka maulu ne buloba,” Ewu udi udikumbanyina mu byònsò. Mwànà wa muntu muvwijìbwe mubidi, ki Yèyè uvwa mwimàne mwaba awu awu mu mubidi musangu awu, bu tèòfàni, mwimàne mwaba awu ùjingulula cìvwà Sarah wamba mu ntentà paanyimà Pèndè. KulayaYè. Tàngilàayi. Dimiinu dyà Bukalenge dyà Abraham ndilayìibwe bwà kumòna cintu cìmwècìmwè aci.

¹⁶⁰ Kàdi mònaayi ne Lôta, wàkapeta pèndè mùsanjeelà muntwamu, bàbìdì bààkapwekà muntwamu abu. Umwe wa kùdìbo kupweka, ne mukwàbo kupwekayè nendè, ki kuyiishabò ne kubiikila bantu bwà kunyeemabò ciiji cìkolè cìvwà ne cyà kulwa aci.

¹⁶¹ Bilondèshìle myaba, bàà pa buloba kacya kabàtukù banji kusòmba mu ngiikàdìlù awu to, kacya ànu ku ditùkù adi

dyàkafila Yesù mulayi awu adi, too ne mpindyewu mene. Ndi muswè kulòmba mulongi kanà yònsò wa maalu-malonda udi mufwànyinekù kwikala mu nzubu emu, anyi pawikala utèèlejila nànsha ku mukaba wà mēyì ewu, ne ucitèèleja dībà kanà dyònsò, swakù ùmfùndile. Mēmè ndi ndonga maalu-malonda kwēnjì mpindyewu bidimu bitwè ku makùmi àsàtù, bwalu-bulonda bwà mu Bible, kàdi kacya kakùtukù kwanjì kwikala muntu ùnkaadiku mumòne mu maalu-malonda ònsò a èkèleeziyà, munda mwà bikondo byònsò mwandamutekètè byà èkèleeziyà. Mutùdì mpindyewu mu Laòdikìyà, ne tudi bamanyè nànkù.

¹⁶² Kacya kakùtukù kwanjì kwikala musànjeelà, utu muyè ku èkèleeziyà mujimà, mwikàle ne dīnà dijika ne h-a-m to, too ne mpindyewu. G-r-a-h-a-m, Billy Graham. Kùkaadi baa Moody, Finney, Sankey, Knox, Luther, ne bakwàbò, kàdi kacypà ne h-a-m, “taatù wa matùnga.” Mpindyewu vùlukaàyi ne, yèyè ùdì G-r-a-h-a-m, mǎleetà àsambòmbò. Kàdi A-b-r-a-h-a-m ùdì yèyè mǎleetà mwandamutekètè. Mònaayi, bàdi muntwamu, Billy Graham, ùya mu bi—bitùpà byònsò byà pa buloba, ne ùbiikila bwa kupàtuka mu Sodomà ne: “Pàtukàayi, nyeemàayi ciiji cikolè cìlwalwà.” Kakwèna muntu nànsha umwe ùndiku mumanyè, mu budimi bwà bwambi, udi mushààle kacya wàkwata Nzambì, pa dīyì dyà dibingishiibwa adi, bu mùdì Billy Graham mukwàte to. Yèyè ùdì mwà kucilèèja. Yèyè kī mmwena tèlòlǝjì wa mùshindù wà...Ngeela meeji ne yèyè mmwena tèlòlǝjì, kàdi kī mmulongeshi wa bukolè menemene to. Kàdi Nzambì ùdì nendè. Muntu awu ùdì mwà kwimana mwaba awu mwikàle bu ne dileesònà dyà kàlaasà kàa Dyàlumingu, mulamè bantu abu bàshààla bu bakwàcìke ku nzembu. Yèyè mmusadidi wa Nzambì wa dībà edi. Mutùmina nganyì? Èkèleeziyà wa mubidi, udi mu Sodomà awu.

¹⁶³ Kàdi vùlukaàyi ne, kùvwa èkèleeziyà umwèpelè wa nyumà, uvwa kàyi mu cikòwelu cyà cyena-màngumba aci, to. Kasùmbù kabiikila bwà kupàtuka, ne bôbò bààkakidila pààbò mukenji kampànda, ne mùsànjeelà. Nènku civwa cinyi? Dijingulula dyà meeji àvwà mu mwoyi. Nzambì ùtu misangu yònsò ànu ùjaadika Dīyì Dyèndè.

¹⁶⁴ Tùsambilàayi. Taatù wa mu Dyulu munanga, dībà dyà ntàpè-nkutàpè edi, mùdì mapàngadika ne cyà kwangaciibwa, dībà nditùngùnùke ne kutuuta ku ntankù, katwèna bamanyè ne ndībà kaayi dīdì Mukalenge wetù mwà kulwa to. Kàdi patùdì tumòna bipròfetà byàkafidiibwà kùdìYe ebi, ku bapròfetà Bèèbè munda mwà bikondo, biikàle mpindyewu munkaci mwà kuvùnguludiibwa. Éyì Nzambì, mùshindù mwinè wùndì nKusàkidila bwà cyòci eci's, bwà ne nànsha mene bantu bàdì bakùmbàne, bantu bamanyi bapilùke mu—mu tèlòlǝjì, bàdì mwà kukandamèèna matèyì a bàà pa buloba ne beena bupidyà, ne mu miyiiki yà ku tèlèvizìyò eyi, ne kakùyi mpatà nànsha mikesè to bafwànyine kwimana ne dikima ne bukitù, bamanyè

mwaba wùdibo biimànyine ne bàjaadika ne Dìyì adi ndilelèlè, ku Mifundu. Ne dībà adi twètù bàdì bindile Dilwa Dyèbè aba, Mukalenge, twitabuuja ne bintu bikwàbò bikaavwà byamba mu bipròfeta ne nebyènzekè abi, bwà kajuuka ne kusànka patùdì tuKumòna wenda munkaci mwètù mene ne wenza cintu ciinè cyŨvwà mwambè ne necyènzekè aci, ujaadika Dìyì Dyèbè ne ndilelèlè. Nzambi wa Cyendèlèlèlè, bânà Bèèbè bàdì bàsaamà mbaabà basòmbe kaaba aka.

¹⁶⁵ Ncyèna mumanyè ne ndībà kàayi dikwàbò dīdī dikèngelà bwà twètù kwenza mudimu to. Dībà dyà dilòòlò ndyedi dyènda dibwela. Kàdi Wèwè wàkalaya, wambila mupròfeta ne: “Nekwikalè Bukènkè lwà pa ibaamulòòlò.” Ne tudi tumòna ne dībà dimwèdimwè dīdī dījuukà ku esètè adi, ndyòdī dīdī dikabwelà ku wesètè. Dishidimuka ndyenzè lwendu pāmwe ne dībà ne mpindyewu tukàadi ku Côte Ouest, ne Èvànjeeliyò mmwenzè lwendu pāmwe ne dishidimuka. Mpindyewu, Taatù, tudi bamanyè ne eci ki ndekeelu wa Èvànjeeliyò, ndekeelu wa dībà, ndekeelu wa cikondo. Cikaadi cijiminangana mu Cyendèlèlèlè. Kàdi Wèwè wàkalaya ne Mwàna úvwa mwà kupàtuka, Mwàna wa muntu úvwa mwà kubuuludiibwa. Mu matùkù à ndekeelu, cyòci eci ncìvwà mwà kwenzeka. Makènkè à dilòòlò àfikì, Taatù. Tudi tuKwela twasàkidila bwà cyòci aci. Ne didipwekesha dyònsò mùdibi emu, kàdi Wèwè utu ucyènza mu bupwekèle, misangu yàbùngì, mu mùshindù wà ne cìtu cipìcila banène pa mitu, bàdì bàdyàmbe ne mbeedi baà meeji à ndondo, ne ucibuulwila bânà bakesè bàdì baswè kulonga.

¹⁶⁶ Ndi ndòmbe, Nzambi, bwà Ũcìvwijèku nàunku, dilòòlò edi, bwà bânà Bèèbè babèèdī bàdī bakwàte ne byà luse aba bààmònakù mulayi wà Nzambi awu, nènku yònsò wa kùdibo òndopiibwè, ne àpatukè kaaba aka, mààlabà, ne mibidi mipyamipyà yà makàndà, ne bàsangalè kàbidī. Enzàku nàunku, Mukalenge, bwà bààmònakù mwà kutwàdilangana Mukenji muntu ne mukwèndè, too ne pàabwela wa ndekeelu mu cikumbi, ne dībà adi biibi nebikangiibwè. Tùkwàcisheku, Nzambi munanga. Ndi nKulòmbakù, dilòòlò edi, kumpàla kwà byònsò ebi, bu Wèwè mwà kwenzakù bwà musangu ewu kàbidī, Taatù, bwànyì mèmè.

¹⁶⁷ Bìvwa—bìvwa bìmwèka, dilòòlò adi bu ne, bantu kabàvwa batàmbe kucimòna to. Kàdi, ndi ndòmbe ne, cyènzekèku kàbidī dilòòlò edi, Mukalenge. Bwalu, nkàadi mupicishe ne dībà dinkòsela bwà kwakula, kàdi ncyèna mumanyè ne ntoo ne ku dībà kaayi kwàkèngelàbi bwà kwenza cyòci eci to. Pa nàunku, ndi ndòmbe, Taatù, Udikù mwà kungumvwila anyì? Ne umvwàku disambila dyà balùmè bàà difwàna dyà Nzambi aba ne bakàji bàdì basòmbe kaaba aka dilòòlò edi, bàdì bùle tètè ne Nyumà Webè aba. Mbeena kwitabuuja, Mukalenge, Wèwè udikù ànu mwà kukwàta mudimu munkaci mwàbò. Nènku tudi. . . Ndi ndòmbe bwà Ũshindikèku Dìyì Dyèbè dyŨdī mwamba ne, “Ewu

udi ungiitabuujja Mémè, byenzedi biNdi ngenza yèyè neàbyénzè pèndè” adi. Byènzèkèku cyàkàbìdì, Yesù, bwà kujaadika ne Wèwè udi umwèumwè awu makèèlèlè, leelù, too ne kashidi. Ndi ndòmba nànkù bwà butùmbi bwà Nzambi, mu Dîna dyà Mwân’Èndè, Yesù Kilistò. Amen.

¹⁶⁸ Mpindyewu, ànu bwà katanci kakesè cyanààna, ndi njinga kumanyà ne mbantu búngì kaayì mwab’ewu bàdì ne twartà twà disambila. Ndi—ndi muswè nwèlè byanza muulu, yònsò wa kunùdì udi ne kartà kàà disambila awu. Èè, mpabwîpì ne bònsò, ngeela meeji, ànu bu myaba yònsò.

¹⁶⁹ Ndi ndikonka ne mbantu búngì kaayì mwab’ewu bàdì kabàyi ne twartà twà disambila, kàdì pèèbè mwikàle usaama, nudikù mwà kwela byanza muulu kwamba ne: “Ncyèna ne kartà kàà disambila to, kàdì ndi nsaama. Ndi ne dijinga.”

¹⁷⁰ Ndi muswè kunulòmba bwà nwikalèku ne kaneemu bwà katanci kakesè. Mpindyewu, ntu munangè kwakula neenù. Ki lwànyì lutàtù misangu yònsò ndwalù’s, ntu ngaakula ntàntà mupitèpìte bule. Kàdì kumpàlà kwà nwènù kulwa, ndi—ndi mutèkèmèna ne mutwishiiibwe ne Nzambi neàjaadikè eci ne cingàmbì aci ne m’Bulelèlè, nenku Yèyè anji—nji àmonè tũng.

Mpindyewu, mbanganyì bàdì basòmbè aku biikàle bàsaama, bàdì bamanyè ne mèmè ncyèna mumanyè kantu nànsha kàmwè pa bidì binùtàngila, elàayi byanza muulu. Tàngilàayi ànu nùmonè. Èyo.

Ndi njinga nwènù bàdì kabàyi ne twartà twà disambila abu mpindyewu. Nebàbiikidishè twartà twà disambila atu. Ndi muswè nùsambilè.

¹⁷¹ Bible mmwambè ne: “Yesù Kilistò ùdì umwèumwè awu makèèlèlè, leelù, too ne kashidi.” Yèyè ùdì wamba ne: “Yèyè m’Mwakwidi Munène musòmbè mwaba awu útwa kwila bwà bitùdì tujikula.” Bidi bikèngela twànji kubijikùla, kumpàlà kwà Yèyè kwikala Mwakwidi Munène, bwalu Yèyè ùdì wàkwila ànu pa dijikula dyètù. Ncyà bushùwà anyì, nwènù bambi naanyì? Nwamònu’s, Útu wàkwila ànu pa dijikula dyètù, citùdì tujikula ne ncìdì Ye, cìdì Ye mutwènzèle aci. Kí ne ncìkàlè Ye mwà kwenza to. Úkaadi mumanè kucyènza. Butùdì naabù mbwà kujikula ne Yèyè úkaadi mucyènze. “Wàkatàpiibwa mputà bwà kushipa kwètù kwà mikenji, ku mibundàbunda Yèndè twàkondopiibwa.”

¹⁷² Mpindyewu, Taatù wa mu Dyulu mmumanyè. Nènku pàndì mukutàngile apa, mbwà kumònakù ne ndi mujìngùlùle mulunda wanyì mwîmpè wa ku Ohio kwàka, yèyè ne mukàjèndè basòmbè apa, m’Mukalenge Dauch ne mukàjèndè. Ne ndi ngeela meeji ne, udi musòmbè mwibìdì anyì mwisàtù kuumukila kùdìbo aku awu, n’kàbìdì Révérend awu, Mukalenge Blair ùngàmònu màkèèlèlè dilòòlò awu. Bwànyì mèmè, mu batèèleji mmubwicidile, bwa bukènkè bwà midilu yidì apa eyi yidì yìmpangisha ndambù bwa kumòna, nènku ncyèna—ncyèna nnumòna bimpè menemene to.

173 Kàdi ndi muswè bwà nùsambilè. Ne tèèka pa mwoyi wèbè cintu cyùdi naaci dijinga aci, ne lòmba Mwakwidi wetù Munènè, Udi mwà kulengiibwa kùdi dyumvwa dyà mateketa ètù awu.

174 Mpindyewu, mèmè ncìyì mukumanyè to, ne udi mufwànyine ànu kundenga pambidi pajimà, bu udi ulenga mwanèènu wa balùme, bàyebè, mpaasàtà webè, muntu kampàndà, kì mbifwànyine—kì mbifwànyine kwikala ne dikwàcisha to. Kàdi wèwè muMulengè Yèyè, ne twètù cyà bushùwà mu dipetangana ne Nyumà Wendè, díbà adi Yèyè ùdi mwà kukwàtà mudimu ne diitabuuja dyèbè bwà kuMulenga, ne dipà dyànyì bwà kwandamwinakù.

175 Nwamònu's, ndi mufwànyine kwikala ànu kamàmà ànu mùdi eci emu, cìdì *apa* eci, kakùyì díyì kampàndà dyàkwilamù to. Bìkèngela bwà . . . Eci, eci cìdì kamàmà pàdiku kakùyì cintu kampàndà kaaba aka bwà kwakwilamù to. Nènku ki mùdi kàbìdi muntu kanà yònsò ewu, nkamàmà, pa bìdi bìtàngila maalu aa, ànu Nzambi mwakwile mu yèyè.

176 Mpindyewu sambilà, nànkù tùmonebi bintu bìngàmbi ebi ní bìdi bulelèlè. Nzambi àkwacishèku bwà bìikalè nànkù. Ncyèna ngamba ne Neénzè to. Ndi ntèkemena ne Neénzè. Ndi mutwishiiibwe ne Neénzè. Kacyà Yèyè kàtukù mwanji kungeela màyi ku makàsà to, mu bidimu byònsò ebi, mu dikòsolola ne dinyùnguluka dyà buloba bujimà, mu matùngà à mìshindù yònsò, ne kùdi mìlìyò yà bantu. Kacyà Katukù mwanji kumfwisha bundù to. Ne mèmè ndi mutwishiiibwe, ànu mùndi mutwishiiibwe ne mwitabùùje ne ndi mwimàne kaaba aka emu, ne Yèyè kààkumfwisha bundù mpindyewu to.

177 Nènnùlòmbèku ànu bwà kwikala ne kanèèmu ne kushààla basòmbè, ànu bwà katanci kakesè cyanààna. Netùtantalajè citùpà cinènè cyà batèèleji bwà kusambidila babèèdi, ànu mu katanci kakesè cyanààna.

178 Kàdi ndi njinga bwà ne nwènù, nwènù beena kwitabuuja, bwà ne bu nwènù ànu mwà kubènga kuntàngila mèmè, kàdi kwitabuuja. Ambààyi ne: “Ndi ngiitabuuja ne cìdì muntu ewu mwambè m’Mufundu. Ncyèna mumanyè ní tukaàdi basemena kule menemene mu cikondo mùdiye wàmba ne mmutùkààdi emu to. Kàdi, byòbì nànkù, díbà adi bìdi ne cyà kwenzeka. Mèyi èndè òwò Mèyi à Nzambi, díbà adi, èndè mèyi’s neàpangilè kàdi Mèyi à Nzambi kààkupangilakù to.”

179 Nzambi mmwenzèjiiibwe bwà kutwà Díyì Dyèndè nyama ku mikòlò. Yèyè neàDijaadikè. Yèyè neàDijaadikè. “Ewu udi ungiitabuuja Mèmè.” Wàkajaadika ne edi nditùkù dyà ndekeelu. Wàkajaadika ciwà mwà kwenzeka. Wàkajaadika ne eci ncìwà ne cyà kwenzeka.

180 Nènku, vùlukaàyi ne, Abraham ne kasùmbù kèndè kabààkapeta kàbìdi cìngà cimanyinu cyà kùdi Nzambi to, too ne mwàkafikà mwàna mulaya awu. Mbanganyi bàdi bamanyè

ne aci ncilelèlà? Cimanyinu cyà dijingulula aci! Nènkù Dimiinu dyà bukalenge dyà Abraham, ngànjì nnùtèlèlèjèku. . . Lekelàayi nnwāmbilè, EMU MMÙDÌ MUKALENGE WĀMBA, nudi munkaci mwà kwakidila cyèù cimanyinu cyà ndekeelu. Aci mbilondèshile Mifundu ne dibuulula dyà Nzambi didi munda mwà mwoyi wānyì, diikàlè dyamba ne eci m'Bulelèlà. Ne ndi mutwishiibwe ne nenùcītàbùujè ne m'Bulelèlà.

¹⁸¹ Mpindyewu itàbùùjaayi. Bantu bōnsò biitabuuje, bamba ne: “Mukalenge Yesù, enzàku bwà nKulengè. Ndi ne dijinga munda mwà mwoyi wānyì, ne ndi mumanyè ne Mwanèètù Branham kī mmumanyè kantu nānsha kamwè pa bìdì bintàngilà to. Ncyèna nānsha mene mumanyè muntu awu to, yèyè kī mmummanyè to, kàdi Wèwè udi mumanyè. Ne piikalābi ne mmungambile Bulelèlà, bwalu ebu nebwenzekè.” Ndi nnulòmbaku ne, kanùtentemuku mpindyewu to, ànu bwà katancì kakesè cyanààna. Ikàlaayi menemene. . .

Nwamònu's, wèwè udi nyumà. Nènkù ndi ngangata nyumà yōnsò udi munda emu ku bukòòkeshi bwānyì mēmè, mu Dīnà dyà Yesù Kilistò, bwà Dīyì Dyèndè dyùlè.

Mpindyewu ikàlaayi ànu ne kaneemu. Sambilaayi. Tàngilāayi kùdìYe, nwamba ne: “Mukalenge, ndi ncitabuuja. Kwācishàku bupidyà bwānyì.”

Tùbàngàayi. Bikèngela bwà nshààlè mubùmbàkàjile meeji pa citùpà cyà nzùbu eci, bwalu, nwamònu's, nudi bààbùngì be, ne yōnsò wa kunùdì ùdì nyumà.

¹⁸² Ncyèna mwà kucyèenza to. Wèwè udi wamba ne: “Kàdi mēmè?” Ncyèna mufwānyine kukwambila to. Ncidishikāmine's. Byenzedi byōnsò byà Nzambi mbidishikāmine. Nekwikalè bantu bààbùngì bōndopiibwà bààpicilà pa cibumbà cyà ku cyambilu eku, dilòlòlò edi, pāmwapà nekwikalè bààbùngì bààbenga kwondopibwa. Byōnsò bìdì mu budishikaminyi bwà Nzambi. Nganyì udi mwà kuMwambila cyà dyenza? Nānsha umwe. Ùtu ùkwàta mudimu bilondèshile diswa Dyèndè Yèyè mwinè, ndongamu Wendè Yèyè mwinè.

¹⁸³ Kàdi wèwè itàbùùjā nāka. Ikàlā mudipwekèshe. Kwikadikù ubinduluka to. Olòlā ànu cyanza cyanààna ùlengè Nzambi, wāmbè ne: “Mukalenge Nzambi, ndi ncitabuuja.” Nwamònu anyi? “Lekèlàku ndengè civwàlù Cyèbè. Ndi nkèngela cikampànda. Ndi mumanyè ne mwanèètù ewu kī mmummanyè anyi mumanyè dijinga dyānyì to, kàdi mmutùlondèlè maalu aWākenzà, ne mmwambè ne Wèwè udi umwèumwè awu leelù.”

¹⁸⁴ Aci kacyèna cìnùùmusha nwènu bānà bèètù bàdì pa cibumbà cyà ku cyambilu apa to, muntu yōnsò wa kunùdì. Ndi ànu nnùlòmba cyanààna, nwènu bānà bèètù, bu beena mudimu naanyì wà—wà Èvānjeeliyò wa Kilistò. Ndi ngakula neenù ànu ne meeji matòòke ònsò mūndì paanyì mumanyè amu, bu—bu muntu ufwāfwā bu nwènu, nwamònu's, kushiyangana

ne buloba ebu. Nebikengelè bwà tùumukè. Ne ndi ne cyà kulumbulula ku Ditùkù dya Cilumbulwidi, bwà bîndi mwambè. Ndi mumanyè aci, mumanyè ànu menemene. Nènkù ndi nwanyisha nwènù balùmyàna, cinùdi aci, nwènù bàdì biimàne nàanyi apa aba, munkaci mwà kunkwàcisha. Mèmè ndi nteeta bwà kunùkwàcisha, bwà kwenza cyònsò cîndiku pàanyi mwà kwenza aci, bwà bwalu bwà Bukalenge bwà Nzambi.

Ndi nsambila ne ndòmba.

Mòna, mbanganyi bàkaadiku bamòne Bukênkè abu mu fòtò? Nukàadikù bamòne fòtò waBù anyi? M'Bwòbù bwàbwa bulembelèle *kwàka*. Kanwènakù mwà kuBùmòna anyi?

¹⁸⁵ Bùdi kumutù kwà inàbànzà udi musòmbè pàapa ne mùshwalà wèndè wàwa. Ùdi ùsambidila munanga kampànda. Ncyà bushùwà, inàbànzà. Munanga mwinè awu... Udi witabuuja ne mèmè ndi mupròfetà Wèndè, anyi mfwilèkù luse, musadidi Wèndè anyi? [Mwanèètù wa bakàji awu ùdi wàmba ne: "Ncyà bushùwà ne ndi ngiitabuuja."—Muf.] Udi witabuuja nànkù anyi? Èyo. Mpindyewu, bu Nzambi mwà kunsokolwela cìdi kacìyi cyènda bîmpè aci, mòna's, neùcìtábè ne ncyà kùdi Nzambi, ànu bu mukàji wàkalenga civwalù Cyèndè awu anyi? Mpindyewu, udi mumanyè ne udi—udi naanyi mu ntàntà wa mètres àsambòmbò anyi citèemà, anyi mapìte apu, kí mmèmè ùdiku mulengè awu to. Kàdi udi mulengè Cintu kampànda, cyùdi mumanyè ne udi mu dipetangana ne Cintu kampànda, Kampànda. Cìdici, mbwà mukàji kampànda, mwinè awu mmwanèèbè wa bakàji. Ncyà bushùwà. Udi witabuuja ne yèyè neàsangajiibwè anyi? Mmukwaciki wa maadrogues. Ncyà bushùwà menemene. Ndi mmumòna wòwela, mukwàcìke. Nwamònu anyi? Mpindyewu, mushwalà wùdi naawù mu cyanza awu, ùkamutèèkèwu pambidi, kàdi kwèdikù mpatà to. Ndi ngiitabuuja ne Nzambi neàmusungilè. Udi muswè kucìitabuuja pàmwè naanyi anyi? Amen.

Mpindyewu, mèmè ncìtu mumanyè mukàji ewu to, kàdi Nzambi mmumumanyè. Udi witabuuja mpindyewu ne mwoyi wèbè wònsò anyi?

¹⁸⁶ Muntu mulùme udi musòmbè pàapa wàwa muvwàle mutèèlù wa mishoonyimishoonyi, mwikàle ne kààmunda, udi witabuuja ne Nzambi mmufwànyine kukwondopa ne kukusangaja anyi? Udi witabuuja ne Yèyè neàcyènzè anyi? Kacya ncitukù mwanji kumòna muntu wàwa to kacya bàndela. Udi ne kartà kàà disambila anyi, mukalenge? [Mwanèètù wa balùme awu ùdi wàmba ne: "To, ncyèna naakù to."—Muf.] Kwèna naakù? Kwèna naaku dijinga to.

"Bu wèwè mwà kwitabuuja!"

¹⁸⁷ Mukàji kampànda nyewù musòmbè ùteeta bwà kutàngidila lwà pamutù pàa mukàji udi musòmbèle apa mene ewu. Mmwenyi kùndi. Kàdi ùtu ùbinduluka bikolè. Ncìtu mmumumanyè to.

Ncitu mwanji kumumònakù to, kacya bàndela. Kàdi Nzambi mmumumanyè, ne mmujingùlùle mpindyewu mene ne ùdi mu dipetangana ne Cintu kampànda. Wêwè uvwa munkaci mwà kusambila bwà bwalu kampànda. Kabingila, mbwalu kwèna mwà kushààla paanyimà pàà dilòòlò edi to. Udi ne cyà kushiyangana ne masangisha aa. Udi udilongolola bwà kwalukila kwèbè, mààlabà. Kùtu wa muneemu, anyi kwèna wa mu Californie to. Udi uya mutàngile ku esètè kuumukila apa. Uyààya ku ndèkè. Udi munkaci mwà kulongolola, bwà kuya ku ndèkè. Udi wa mu Oklahoma. Èyowà. Ncyà bushùwà.

¹⁸⁸ Udi kàbìdi mu ngiikàdilù wa ùpunga ne lufù. Udi mulwè apa bwà kukusambidilabò. Kwèna ne kartà kàà disambila to. Kàdi uvwa mwitabùuje ne newòndopiibwè, bu wèwè ànu mwà kufika apa. Ncyà bushùwà. Kàbìdi, disaamà dyèbè nkànsèrè. Kànsèrè aku kàdi mu mufùbà. Udi witabuuja ne newòndopiibwè mpindyewu anyi? Udikù witabuuja ne udi mu dipetangana Nendè anyi, mwanètù wa bakàji? Pàmwàpa Nzambi neàngambile ne wèwè udi nganyi, dîbà adi aci ncifwànyine kukwambulwisha anyi? Byòbì nànkù, elà cyanza muulu pawikalà witabuuja nànkù, ne (Nzambi) mbifwànyine kukukwàcisha. Èyo, Màndàmù Steel, udi mwà kwalukila ku Oklahoma.

Ncitu mumanyè inàbànzà ewu to. Ncitu mwanji kumumònakù to.

¹⁸⁹ Inàbànzà kampànda nyèyè ewu musòmbèle lwà paanyimà pèndè apa. Udi ùsaama mijilu myùle. Ne ùdi kàbìdi ne mwàni wa balùme udi mukwàciki wa maalà à kapyà, ne yèyè ngudiye ùsambidila. Bu yèyè mwà kwitabuuja, ùdi mwà kwondopiibwa. Màndàmù Mason, udi mwà kwitabuuja ne mwoyi wèbè wònsò, ne kwitabuuja ne Yesù Kìlistò neàkupèèshè dyondopa adi anyi? Udi witabuuja anyi?

Èyo, nànkù tentèkèlaaku inàbànzà udi musòmbè ku luseke lwèbè aku awu cyanza, yèyè ùdi ùsambidila bàyendè udi kàyi musungidiibwe. Nzambi neàfilè dyondopa adi.

Tùsambilàayi.

¹⁹⁰ Nzambi munanga, ndi ndòmba bwà Ùmupèèshèku dibènesha adi. Pèèshakù mukàji awu dijinga dyà mwoyi wèndè, Mukalenge. Diitabuuja dyèndè didi pabwipi Nèèbè, mu mùshindù wà ne dyàKulengi. Ne ndi ndòmba, Taatù, bwà Ùmukwàcishèku, mu Dîna dyà Yesù. Amen.

Mpindyewu itàbùùjà ne mwoyi wèbè wònsò, ne udi ucipeta. Udikù muswè kwenza nànkù anyi? Èyo. Nzambi àkubènèshè.

Udikù witabuuja ne bàyeebè neàsungidiibwe anyi, inàbànzà? Udi witabuuja ne mwoyi wèbè wònsò anyi? Elà cyanza muulu ne, udi witabuuja.

¹⁹¹ Bidi bîmwêka bu ne kùdi, kumpàlà kwànyì eku, mukàji wa bujitu bwàbûngì. Nyêyè udi musòmbe pààpa wàwa. Udi witabuuja ne ndi musadidi wa Nzambi anyi? Udi witabuuja ne ndi musadidi wa Nzambi anyi? Udi witabuuja. Èyo. Ncyêna mukumanyè to. Lutàtù lwèbè, ntujilu. Udi ne bujitu bupite bûngì. Ukaàvwa kwà ngàngàbukà, mwambè ne kèna ne cyà dyenza pa bwalu abu to nànsha cikesè, kàdi awu úvwa ngàngàbukà wa pa buloba. Wamònu anyi? Wèbè... Udi ufùma ku dipeta dibungama dyàbûngì. Udi mufwishe bàyeebè. Kwèna wa mûneemu to. Udi cyà bushùwà wa ku Arkansas. Kàbìdi udi wenda ukèba mudimu, kàdi kùyi mwà kupeta mudimu to. Uvwa ne bwôwà bwà ne, cintu kampàndà, ne nkwpèi kuwàbènga kubìikidiibwa. Kàdi diitabuuja dyèbè mpindyewu dyàlengì Nzambi. Mwanèètù wa bakàji, ndàaku, itàbùùjà. Nzambi àkupèèshèku mudimu, àkupèèshèku dijinga dyà mwoyi wèbè.

Nzambi ùtu ùjaadika ne Dîyì Dyèndè ndilelèlà. Nudi nwitabuuja ne mmwômò anyi? Mpindyewu ndi muswè ànu bwà nùsambilèku kàbìdi pàmwè naanyì.

¹⁹² Taatù Nzambi, Wèwè udi Nzambi umwèumwè wàkajaadika awu. PaWàkambà ne: “Mwànà wa bakàji awu kî mmufwè to, mmulàalè tulù,” dîbà adi's bìvwa bìkèngela bwà Wèwè kuciijaadika. Mpindyewu, Wèwè wàkalaya ne, ànu pabwîpi menemene ne dilwa dyà cikondo cyà nshiikidilu ne, Mwànà wa muntu úvwa mwà kuDibuulula mu mùshindù wùmfwèumwè wàkenzàYe ku Sodomà awu. Wèwè ngwàkacilaya, Mukalenge. Mpindyewu Wàlu pa buloba, mu mmwènekèlu wa Nyumà Mwîmpè, ne mubwelè munkaci mwètù, dilòlò edi, twètù beena kwitabuuja, ne mucijaadikè. Wèwè udi mujaadikè Dîyì Dyèbè muWàkenzà ditùkù adi. Mukalenge, katwèna dijinga ne cijaadiki cikwàbo to. Wèwè udi munkaci mwètù. Tudi baKunangè. Nènkù tudi tujingulula ne eci ki cimanyinu cyà ndekeelu pabwîpi menemene ne Dilwa Dyèbè, bilondèshile Mifundu. Ne mindìdimbì yònsò ne bimfwànyì kacya kabitukù bìpangila to. Bìkèngela bìikalè byà cyà bushùwà.

¹⁹³ Pa nànkù tudi tulòmba, Taatù, pàdì bânà Bèèbè bàlwa mpindyewu bwà kubàsambidilabò apa, bwà muntu ne muntu òndopiibwè. Swàku bwà kakùshàadikù mubèèdi munkaci mwètù, ku ndekeelu kwà mudimu wà dyondopa ewu to. Èyi Nzambi munanga, Udikù mwà kwenza bwà dilaabiibwa Dyèbè diikalè dyàbûngì pa cisàmbà Cyèbè mpindyewu mene, bwà yònsò wa kùdìbo wàmòna mwà kondopiibwaku anyi?

¹⁹⁴ Ne kwòkò kwikàle bàmwè kaaba aka, bàdì kabàyi banji kwikala bânà Bèèbè to, ne pa nshindameenu wa bintu ebi, bwà ne... Bâtèèleji Dîyì ne bàmònu cintu cyenzèke, cijaadikiibwe ànu menemene ku dileetà ne ku dileetà, ne Wèwè udi Nganyì ne CyÛdi, ne Wèwè udi kaaba aka.

¹⁹⁵ Kàdi, Mukalenge, Wêwê udikù mufwànyine—Wêwê udikù mufwànyine kubènesha mashimi anyi? Mòna's, nànsha kakesè, Mukalenge. Kàdi Wàkalaya cyà bushùwà bwà kubènesha Dìyì Dyèbè, ne kî nDifwànyine kwalukila kadìyi ne cididi dyenzè to. Divwa mwà kukumbaja civwàDi ditùmina. Nènku mpindyewu Wenjì aci kumpàlà kwètù, dilòlò edi, kakùyì mpatà nànsha mikesè to.

¹⁹⁶ Nènku ne mitù yètù miinyika, kùdikù bantu mwab'ewu bàtù kacya kabàyikù banjì kwitabuuja kwònsò eku, bàdì bafwànyine kuswa bwà kwela ànu cianza muulu cyaanàà anyi? Ne mutù wèbè mwinyika, elà wêwê ànu cianza cyèbè muulu cyaanàà. Nènku juukilaaku kuulu, wàmbe ne: “Ndi mpindyewu ngiitabuuja, ne mwoyi wànyì wònsò. Ne ndi muswè kwitaba Yesù Kilistò, mpindyewu mene.” Nudikù mwà kwenza aci, bantu kanà bònsò, bantu kanà bònsò bàdì kaaba aka, bàtù kacya kabàyikù banjì kwitaba Kilistò, kàdi biikàle baswè mwà kucyènza pa dībà edi anyi? Mémè Ncyàkukwambila . . . Ndà ku èkèleeziyà ùdì mudisungwile. Kàdi ndi nkulòmba bwà wêwê kwakidila Yesù Kilistò paucidi . . . Pàmwàpa kwàkutàmba kuseèmena pabwipi Nendè to too ne pawàMumòna ne èbè àbidi pààlwaYè mu mubidi Wèndè wà wùmweka ne mèsù awu ùfùmina mu Maulu. Udiku mpindyewu mwà kuMwitaba anyi pawikalà kùyì mwanjì kucyènza?

¹⁹⁷ Pa kumòna ne muntu nànsha umwe kaaba aka kî mmwimàne kuulu to, ndi ngiitabuuja dībà adi ne nwènù bònsò nudi ne meeji mu wòwò, bantu bàà luumvu, ne bajingulula cinùdì nwenza. Pawikalà musòmbè mwaba awu mwinshì mwà cyòcì eci, vùlukà ne: “Wêwê uMfwà bundù kumpàlà kwà bantu, Mémè nènku fwe bundù kumpàlà kwà Taatù Wanyi.” Kùvwa muntu mwimàne kuulu, pàmwàpa, èyowà, mu batèeleji amu, mundekeelu mwàmwa.

¹⁹⁸ Nzambì munanga, bàba bàdì mwà, ncyèna mmòna to, bàdì biimàne kuulu abu, mbaswè kuKwitaba. Mbajingulùle, Mukalenge, bwà ne eci kacitukù cyenjìibwe to too ne mpindyewu, nènku mpindyewu nyewù Ucishindika ne ucijaadika ne cidi nànkù. Ndi ndòmba, Taatù, bwà mu myoyi yàbò, yìdì minyungishìibwe mu mùshindù wùdì kawùyì wùmvwika pa dībà edi eyi . . . Mmuniyì mutwàmanyà ne ewu ki muntu wa ndekeelu udi ne cyà kubwela? Eci cidi mwà kwikala ndekeelu bwà Los Angeles. Ewu ùdì mwà kwikala musùukà wà ndekeelu wikalà mwà kulediibwa mu Bukalenge. Katwèna bamanyè ne cikondo aci necilwe dībà kaayì to. Kàdi pènzekàci, ciibi necikangìibwe, Mubidi newùkumbananganè. Kacyàkwikala Mubidi mulèma anyi Mukàji-musèla mulèma to. Newikalè ànu ne bidimba bùngì kampànda byena mènà àvwa mafùnda mu Mukàndà wà Mwoyi wà Mwànà wa mùkòòkò kumpàlà kwà difùkà dyà dyulu ne buloba, bààlwilà Yesù bwà kwangata, bu Àdàmà, ùpàtuka buludì bwà kusungila

mukàjèndè. Ndi ndòmba, Nzambi, bwà Ûbăkidilèku mpindyewu mu Bukalenge Bwèbè. Bàdi mu byanza Byèbè. Kwatàku naabu mudimu, Mukalenge, ndi ndòmba mu Dìná dyà Yesù. Amen.

¹⁹⁹ Nzambi àbeneshèku yònsò wa kunùdi uvwa mwimàne kuulu awu. Ncivwa mumanyè ne bamwè bàà kunùdi bàvwa biimàne kuulu to. Bàmwè bàvwa biimàne mundekeelu mwàmwa, bàmwè kuulu mu cisàsà. Mpindyewu ndi muswè ùngenzèlèku cintu cimwèpelè. Bu nwènù mwà kuswà ngumvwàyikù. Nutwilanganèku ne mwambi kampànda mwaba ewu ne nùyiikilanganè nendè, paanyimà pàà disangisha dimanè kujika. Nudikù mwà kwenza nàнку anyì? Kanùlekedikù cipangila to. Pawikala kacya kùyikù mwanjì kubàtìijibwa mu dibàtiiza dyà bwena Kilistò to, enzà nàнку pashìishè apa, ne pashìishe ùshaalè ne byanza byela muulu too ne paùdi upeta Nyumà Mwímpè.

²⁰⁰ Mpindyewu, bantu bààbúngì bàdi ne twartà twà disambila kaaba aka. Netùbàlòmbè bwà bàjuukilè kuulu, ne bàbandè kùneeku, ne ngeela meeji ne bàkosolwelè apa. Anyì nebikengelè bwà mèmè kulwa...[Mwanèètù wa balùme kampànda ùdi wàmba ne: “To.”—Muf.] Ncyàkupeta mùshindù to. [“Lwilàyi ku elu luseke.”] Kuumukila ku *elu* luseke, bàdi mwà kupàtukilaayi eku, lwà ku elu luseke, aba bàdi ne twartà twà disambila abu.

²⁰¹ Ne mpindyewu kwòkò muntu wa kunùdi udi ne cyà kuya, cidi...Dìbà dikaadi dimpìte. Mfwilaayikù luse. Nènteètè bwà kulengeja ndambù mààlabà dilòòlò. Ku...tudi dìbà dikùmi ne tusunsa dikùmi, ku ntankù ùdi ku cimanu wàwa's. Twasàkidilaayi wàbúngì bwà dilwa dyènù dilòòlò edi, ne Nzambi wa mu Dyulu ànùbènèshèku. Nwènù baswè kushààla bwà kutàngila mulongo wà babèèdi, tutu àmu ne disanka dyà kwikala neenù. Kàdi netùbangè kusambidila babèèdi mpindyewu, ne ncyèna muswè kunùlama ambà ànu nwènù baswè kushààla. Nwàtangàlàjìibù mu Dìná dyà Mukalenge Yesù. Ditalala dyà Nzambi dyèndè neenù ne dinùbènèshè, ne dinùpèèshè diikisha mu mibidi yènù, bufùkù bujimà ebu, ne dinùpèèshèku bukolè bwà mubidi bwà nwamònakù mwà kwalukila kàbidi mààlabà dilòòlò. Mpindyewu Nzambi ìkalèku neenù.

²⁰² Nènku bàdi ne twartà twà disambila abu bàjuukile kuulu bwà disambila mpindyewu, mutùdi tusambidila bantu cyàpàmwè. Mpindyewu tudi baswè bwà nùmanyè, mpindyewu, nwènù bàdi biimàne ne kartà kàà disambila abu, kùdikù mpatà kampànda mu nsòmbelu webè amu anyì? Kùdikù, nùmfwilè luse, mpèkaatù kampànda mu nsòmbelu webè ùdi kùyi mutondè anyì? Yèyèmu, indilà nkulòmbèku nùнку. Kùlukù mu mulongo wà babèèdi emu ne mpèkaatù kàyi mutonda munda mwà mwoyi webè to. Bwalu, udi ne cyà...Eci ndyàmpà dyà bânà, nwamònu's. Nènku pawikalà kùyi mwena Kilistò to, lekèlèlè mwoyi webè kùdi Kilistò, mu mulongo wa babèèdi amu, pashìishè ùlwe. Ndyà mwena kwitabuuja. Udikù muswè

kucyènza anyi? Mwitàbè Yèyè dyàmbedi bu Musùngidi webè, ne pashùishè ùlwe pa cibùmbà cyà ku cyambilu apa, bwà kukusambidilabò.

203 Mpindyewu nêngiikalè mwà kusambidila muntu ne muntu; nciyi anu mbàpicisha, byènze bu mushingà wutùtù twenzena to. Tudi mu èkèleeziyà mpindyewu. Ngeela meeji ne Mwanèètù wa bakàjì Wyatt wātùpèèshi kabingilà bwà ne tudi mwà kushààla ne kusambila. [Mwanèètù wa balùme kampàndà ùdi wàmba ne: “Èyo, bufùkù bujimà, ntàntà yònsò ùdi muswè awu.”—Muf.] Tudi mwà kushààla ntàntà yònsò utùdi baswè awu. Nènku ndi nsàkidila Mwanèètù wa bakàjì Wyatt ne musùmbà wà kaaba aka, bwà mùdibo batùlekèle twenza nànkù’s. Nzambì àmubèneshè. Bàyendè wa bukitù awu wàkiimana pa cibùmbà cyà ku cyambilu eci, kusambidila babèèdì, too ne pàakafwàye, bwà ku dyànyì pàànyì dimanya, dīsàlaayi dilelèlè dyà nkùrusè. Nènku mpindyewu ndi nteeta bwà kutùngunuka ne kwenza cintu cimwècimwè aci, kubènesha cisàmbà eci.

204 Nènku mpindyewu ndi ndòmba bwà yònsò wa kunùdi wapicila mwab’ewu awu...Kabyèna bikèngela bwà wèwè kujìkula cintu kanà cyònsò cyùdi muswè nànsha. Kabyèna bikèngela bwà wèwè kwamba cintu nànsha cimwè cidì cikutàcisha to. Lwàku ànu cyanààna mèmè nkusambidilè, kàdi wèwè itàbùùjà.

205 Nudi nwitabuuja ne Nzambì ngudi muntùme bwà mèmè kwenza cyòci eci anyi? Elàayi byanza byènù muulu. Nudi bavùlùke cyàkambà Mwanjèlò wa Mukalenge aci anyi? “Wèwè mufikishe bantu ku dikwitabuuja, mwikalè ne meeji matòòkè paùdi usambila, kakwèna cyàkàndameenà disambila to.” Ne nwènù’s nudi bamanyè ne aci ncilelèlè. Cìkaadi cijaadikiibwe, misangu ne misangu.

Mpindyewu nêndombè Mwanèètù wa bakàjì Rose, bu yèyè mwà kuswà, bwà kwimbaku, *Itàbùùjà Nàka*, anyi, *Ngàngàbukà Munènè Ùkaadi Mpindyewu Pabwipi*, anyi cintu kampàndà.

206 Ndi muswè bwà yònsò wa kunùdi mpindyewu ìkalè naanyì mu—mu bwobùmwè. Nenwikalèku, kàbidì, nwènù bàdì kabàyi mu mulongo wa babèèdì abu, nenwikalèku munkaci mwà kusambidila bantu aba anyi? Èè, balayàayikù nànkù awu, mu kwela cyanza muulu ne: “Nêngiikalè nsambila, nwamònu’s. Netwikalè bònsò tusambila.” Èyo. Èyowà’s.

Ndi muswè bwà nwìkalakù, byòbì bikèngela ne nùumukè, nwàyakù ne lutùlù lwònsò mpindyewu, bwà kabàyi bàtàcisha patùdi tusambila apu to.

Udi witabuuja ne necijikè mpindyewu anyi, mwanèètù wa bakàjì? [Mwanèètù wa bakàjì awu ùdi wàmba ne: “Ne mwoyi wanyì wònsò.”—Muf.]

Nzambi munanga, nyewù ntentekela mwanèètù wa bakàji byanza, ngèèla lutatù lwà mu mubidi wèndè kadyòmbò. Mu Dîná dyà Yesù Kilistò, swàku lùmuumùkè. Amen.

Àkubènèshè, mwanèètù wa bakàji.

Udi witabuuja ne mwoyi wèbè wònsò anyi? Mpèkaatù yèbè yònsò mmitonda anyi? Udi, bwà ku dyèbè dimanya, udi mudilongòlòle bwà kwakidila dyondopiibwa dyèbè anyi?

²⁰⁷ Nzambi munanga, nyewu ntentekela mwanèètù wa bakàji byanza, mu Dîná dyà Mwân'Èbè, Yesù Kilistò, ne ndòmba bwà ne lutatù lwà mubidi wèndè lwikalè luumùke luyè, mu Dîná dyà Yesù. Amen.

Mpèkaatù yònsò mmitonda, ne wèwè ukàadi mudilongòlòle bwà dyondopiibwa dyèbè anyi? Udi witabuuja anyi, mwanèètù wa balùme? [Mwanèètù wa balùme awu ùdi wàmba ne: “Ndi ngiitabuuja ne mwoyi wanyì wònsò.”—Muf.]

²⁰⁸ Nzambi munanga, nyewu ntentekela mwanèètù wa balùme byanza, bu mutùdi bamanyè ne Wèwè udi kaaba aka, Mukalenge. Ndi ndòmba bwà Wèwè kumwondopa, mu Dîná dyà Yesù Kilistò. Amen.

Mpèkaatù yònsò mmitonda anyi? To, kwèna umvwa to. Udi witabuuja ne neúmfwè anyi? [Mwanèètù wa bakàji awu ùdi wàmba ne: “Ndi ngiitabuuja. Kàdi's ntu mpudimaci.”—Muf.] Udi witabuuja.

Mpindyewu mukàji ewu m'mpudimaci. Netùsambilè kaaba aka.

²⁰⁹ Nzambi munanga, ndi ndòmba bwà Wòndopèku mwanèètù wà bakàji, ne ùmuushèku bumpudimaci ebu. Mmusòmbe pa buloba bupàtakàne, pàdiye kàyì mwà kuumvwa to. Ndi ndòmba bwà Ùmupèeshèku dyondopiibwa dyèndè, mu Dîná dyà Yesù.

²¹⁰ Nèndombè bantu bwà kulama mitu yàbò miinyika, katanci kakesè. Ndi muswè mmonèbi cidi cimwenzèkèle. Mpindyewu, bu nwènù mwà kuswà, mu Dîná dyà Yesù Kilistò, muntu nànsha umwe kajuulukù mutù anyi kàtabadi to. Mpindyewu, kanwèna ne cyà kwenza nànkù to too ne pàngàànwàmbilà bwà kucyenza.

²¹¹ Udi mwà kungumvwa mpindyewu anyi? [Mwanèètù wa bakàji awu ùdi wàmba ne: “Bikònyàngàle ndambù.” Mwanèètù Branham ùdi ùtuutakaja byanza musangu wùmwè. “Ndi mwà kuumvwa.”—Muf.] Udi unguumvwa anyi? [“Ndambù.”] Udi mwà kuumvwa anyi? Ùdi mwà kuumvwa mpindyewu. [Mwanèètù Branham ùdi ùtuutakaja kàbidi byanza.] Wamònu anyi? Udi umvwa mutooyi awu anyi?

²¹² Mpindyewu udi witabuuja ne mwoyi wèbè wònsò. Mmwòmò's? Wèwè witabuuja, apu Nzambi neàkusàngàjè mu kaabujimà. Mmùdiye mwambè. Ndi ànu mumusambidile ne mumutentèle byanza pa maci cyanààná, ne nyewù wàmbi ne ùdi mwà kuumvwa cintu kampànda. Èyo, tùngunukà ànu

cyanààna mpindyewu, witabuuja ne newikalè mwà kuumvwa bimpè menemene, nènku neúmfvwè.

Mpèkaatù yònsò mmitonda anyi, mwanèètù wa bakàji? [Mwanèètù wa bakàji awu ùdi wàmba ne: “Èyo.”—Muf.] Udi mudilongòlòle bwà dyondopiibwa dyèbè anyi? [“Èyowà.”]

²¹³ Nzambì munanga, nyewù ntentekela mwanèètù wa bakàji byanza, bu mudibi ne mu twètù emu kamwèna cyà nsongo nànsha cimwè, munda mwètù twètù biinè emu. Kàdi tudi bamanyè ne tudi beena Kilistò, balediibwè kùdi Nyumà wa Nzambì. Nènku tudi tutentekela mwanèètù wa bakàji byanza ne tulòmba dyondopiibwa dyèndè, mu Dìna dyà Yesù Kilistò. Amen.

²¹⁴ Mpindyewu udi witabuuja ne newikalè mwà kuumvwa bimpè anyi? [Mwanèètù wa bakàji awu ùdi wàmba ne: “Bimpè.”—Muf.] Èyo, mpindyewu udi—udi mwondòpiibwè. Ki mùshindù wà kucyènga ngwòwò awu. Ncyà bushùwà. Bushùwà.

²¹⁵ Mpèkaatù yònsò mmitonda anyi? [Mwanèètù wa bakàji awu ùdi wàmba ne: “Èyowà’s, mukalenge.”—Muf.] Ne wèwè udi mudilongòlòle bwà dyondopiibwa dyèbè anyi? [“Èyo.”] Udi witabuuja ne, ku ditentekelangana dyà byanza, Nzambì Udi mumanyè myoyi yà bantu awu, neàkwondòpe anyi? [“Ndi ngiitabuuja.”]

²¹⁶ Taatù wetù wa mu Dyulu, ndi ndòmba bwà Wèwè kwondòpakù mwanèètù wa bakàji, patùdi tumutentekela byanza ne tulòmba mu Dìna dyà Yesù Kilistò bwà Ùmwondòpè apa. Amen.

²¹⁷ Wetwàwu! Mu bushùwà bwà bwalu, wèwè’s udi mumanyè ne mèmè ndi mumanyè cidi cikutàcisha. Kàdi ncyèna ànu ncyàmba to; bwalu, wèwè mucyamba, neciikalè—neciikalè citungùnùke ànu kutungunuka. Kàdi bu wèwè mwà kuswà... Mpèkaatù yònsò mmitonda anyi? [Mwanèètù wa bakàji awu ùdi wàmba ne: “Èyowà’s, mukalenge.”—Muf.] Ne udi witabuuja ne Nzambì neàkusàngàjè anyi? [“Èyowà’s, mukalenge.”] Udi witabuuja ne binyòka abi... Ngààmanyi kucyàmba’s.

Nzambì munanga, ndi ndòmba bwà Ùmwambùlwishèku ne ùmwondòpè. Enzàku nànkù, mu Dìna dyà Yesù.

Kwàkucibukila panshi to. Ndààku, witabuuje ne mwoyi wèbè wònsò.

²¹⁸ Udi witabuuja ne Nzambì neàkusàngàjè anyi? [Mwanèètù wa bakàji awu ùdi wàmba ne: “Amen.”—Muf.] Mpèkaatù yònsò mmitonda ne udi mudilongòlòle bwà dyondopiibwa dyèbè anyi? Udi witabuuja ne nyimà wèbè awu neàsangalè anyi?

Taatù wa mu Dyulu munanga, ndi ndòmba bwà Ùmwondòpèku ne ùmusàngàjè. Mu Dìna dyà Yesù Kilistò, biikalèku nànkù. Amen.

Nzambi àkubènèshè, mwanèètù wa bakàjì. Ndàaku, mwikàle witabuuja mpindyewu.

Mpèkaatù yònsò mmitonda anyi, mwanèètù wa bakàjì, udi mudilongòlòle bwà dyondopiibwa dyèbè anyi?

Nzambi munanga, mpèkaatù yèndè, mùdiye wàmba, mmitonda. Nyewù ntentekela mukàjì ewu byanza, mu Dîna dyà Yesù Kilistò, ndòmba dyondopiibwa dyèndè. Amen.

²¹⁹ Mpèkaatù yònsò mmitonda anyi? Udi ne cyà kwamba bulelèlè, udi usaama bikolè, bwà aci's udi mumanyè. Udi mumanyè ne mèmè ndi mumanyè cidi cikutàcisha aci. Kàdi udi witabuuja ne Nzambi neàkusàngaje, kwondopa mwoyi wèbè ne kukusàngaja mu kabujimà anyi?

Nzambi munanga, ndi ndòmba ne mu Dîna dyà Yesù Kilistò, Wèwè ùmwondòpèku ne ùmusàngàjè. Swàku bwà eci ciumumùkè, Taatù, mu Dîna dyà Yesù. Amen.

Nzambi àkubènèshèku mpindyewu. Kwèdikù mpatà to. Ndàaku, mwikàle witabuuja.

Mpèkaatù yònsò mmitonda anyi? Udi mudilongòlòle bwà dyondopiibwa anyi?

Taatù wa mu Dyulu munanga, nyewù ntentekela mwanèètù wa bakàjì byanza. Mu Dîna dyà Yesù Kilistò, swàku bwà òndopiibwè. Amen.

Kwèdikù mpatà to. Ndàaku, mwikàle witabuuja.

Mpèkaatù yònsò mmitonda, udi mudilongòlòle bwà dyondopiibwa anyi?

²²⁰ Taatù wa mu Dyulu munanga, ndi ndòmba bwà Wòndòpèku mwanèètù wa balùme, ùmusàngàjè. Enzàku nàнку, Taatù. Nyewù mmutentekela byanza, mu kiipàcìlà aka, mu Dîna dyà Yesù Kilistò. Amen.

Nzambi akubènèshè. Ndi ncìitabuuja ne mwoyi wanyì wònsò.

Udi witabuuja mpindyewu anyi, mwanèètù wa bakàjì? Mpèkaatù yònsò mmitonda ne ukàadi mudilongòlòle bwà dyondopiibwa anyi?

Nzambi munanga, nyewù ntentekela mwanèètù wa bakàjì byanza, mu Dîna dyà Yesù Kilistò, swàku bwà òndopiibwè bwà butumbi Bwèbè. Amen.

²²¹ Mpindyewu ànu misangu yàbúngì nàнку awu, ànu dilenga cyanààna, mwàkambà Yesù amu ne: “Bimanyinu ebi nebìfilè bàdì bìitabuuja. Bòbò batentèkéle babèèdi byanza.” Ndi mubangè kumòna ne, mu masangisha, cidi cìfilà bipeta bìmpè ne byà lukàmà makùmi àtaanu kutàmba mùtùbi byèenza paùdì ubìikila bantu mu mulongo, wenza dijingulula, bwalu udi ufika ànu ku bantu bakesè cyanààna. Kàdi, ewu mùshindù wówò, kùdi bààbúngì batámbe bòndopiibwa.

222 Ûkààdi mutondè mpèkaatù yèbè yònsò yà bupidyà ne bikwàbo byònsò anyi? Udi witabuuja mpindyewu ne newòndopiibwe anyi? [Mwanèètù wa bakàji awu ùdi wàmba ne: “Èyo, ne musùngìdiibwe.”—Muf.]

Nzambi munanga, ndi ndòmba bwà Wòndopèku mwanèètù wa bakàji ewu pândi mumukwàte ku byanza ne ndòmba mu Dîna dyà Yesù Kilistò bwà dyondopiibwa dyèndè apa. Amen.

Nzambi àkubènèshè, mwanèètù wa bakàji.

Udi witabuuja mpindyewu anyi? [Mwanèètù wa bakàji awu ùdi wàmba ne: “Èyowà.”—Muf.] Mpèkaatù yònsò mmitonda anyi? [“Èyowà.”]

Nzambi munanga, nyewù ntentekela mwanèètù wa bakàji byanza, mu Dîna dyà Yesù Kilistò, bwà dyondopiibwa dyèndè. Amen.

Nzambi àkubènèshè, mwanèètù wa bakàji.

Cìdi cìmwèka ànu kantu kakesè menemene, kàdi Nzambi ngWàkacilaya.

Mpèkaatù mmitonda anyi?

Nzambi munanga, ndi ndòmba bwà Wòndopèku mwanèètù wa bakàji ewu. Pândi mmutentekela byanza mu Dîna dyà Yesù Kilistò apa, swaku bwà àye musàngàle. Amen.

Mpèkaatù mmitonda anyi?

Nzambi munanga, ndi ndòmba bwà Wòndopèku mwanèètù wa bakàji ewu, pândi mmutentekela byanza apa, mu Dîna dyà Yesù Kilistò. Amen.

Mpindyewu paùdi ulwa ne byamù bilamakaja apu, swàku bwà bidituutè ku bukolè bwendeshi, nebikwatè mudimu's.

Mpèkaatù mmitonda anyi? [Mwanèètù wa bakàji awu ùdi wàndamuna—Muf.] Ûkààdi mudìlongòlòle.

Nzambi munanga, ndi ndòmba bwà Ûmwondopèku ne ùmusàngàjè, mu Dîna dyà Yesù Kilistò. Amen.

Nzambi àkubènèshè, mwanèètù wa bakàji.

Mpèkaatù yònsò mmitonda anyi? [Mwanèètù wa bakàji awu ùdi wàmba ne: “Byònsò.”—Muf.]

Nzambi munanga, pàdi mukàji ewu muntàngile mwisù apa, ndi ngiitabuuja nànkù. Ndi ndòmba bwà Ûmwondopèku, mu Dîna dyà Yesù.

223 Udi mulwè ànu kumufila cyanààna, kî mmwômò anyi, mwanèètù wa bakàji? Udi mulwè ànu kumufila cyanààna's? Èyo. Udi witabuuja, mwanèètù wa bakàji, ne Nzambi neàkusàngàje anyi? [Mwanèètù wa bakàji awu ùdi wàmba ne: “Ndi ngiitabuuja ne Nzambi mmufwànyinekù kumpèèshulula lumònu lwànyi.”—Muf.] Nzambi àkubènèshè.

²²⁴ Taatù wa mu Dyulu, Wèwè utu misangu yònsò ànu ne luse kùdì mpofo, ne kùdì bàdì mu lukèngelu. Mpindyewu bàmònu ciWénjì dilòlòlò edi eci. Pa nànkù tudì twitabuuja, Mukalenge, ne cimanyinu cinènè cyà ndekeelu cìdì munkacì mwà kukwàta mudimu munkacì mwètù mpindyewu eci. Ndi ndòmba bwà lumònù lwà mukàjì mpofo ewu lumwalùkidilè, mu Dîna dyà Yesù Kilistò. Amen.

Mpindyewu, watùtùminakù mulubù mpindyewu. Watùtùminawù.

[Mwanèètù wa bakàjì kampàndà ùdì wàkula ne Mwanèètù Branham—Muf.] Kaa, èyowà's, udi witabuuja ne Nzambi neàkondòpè anyi? ["Alèluuyàh!"]

Taatù wa mu Dyulu munanga nyewù ntentekela mwanèètù wa bakàjì ewu byanza ne ndòmba bwà Ûmwondòpèku, mu Dîna dyà Yesù Kilistò. Amen.

Nzambi àkubènèshè, mwanèètù wa bakàjì. Watùmanyishakù muwikalà—muwikalà mudyūmvwè.

Udi witabuuja anyi, mwanèètù wa bakàjì? [Mwanèètù wa bakàjì awu ùdì wàmba ne: "Èyowà, ndi ngiitabuuja."—Muf.]

Éyì Taatù wa mu Dyulu munanga, nyewù ndòmba bwà mwanèètù wa bakàjì, mutwìshìibwe ne Wèwè neùmwendòpè mpindyewu. Nyewù mmutentekela byanza, mu Dîna dyà Yesù Kilistò.

Mpindyewu itàbùùjà. Ncyà bushùwà. Ndààku ànu cyanààna, mwikàle witabuuja.

Udi witabuuja anyi, mwanèètù wa balùme? [Mwanèètù wa balùme awu ùdì wàmba ne: "Èyowà."—Muf.] Mpèkaatù yònsò mmitonda anyi?

Nzambi munanga, ndi ndòmba bwà Wòndopèku mwanèètù wa balùme ne ùmusàngàjè, mu Dîna dyà Yesù Kilistò. Amen.

Udi witabuuja anyi, mwanèètù wa bakàjì?

²²⁵ Éyì Nzambi, ndi ndòmbakù ne, mu Dîna dyà Yesù Kilistò, mu kudipwekesha, mu kalolo kònsò ne bupòlè byà pa dibà edi, swàku bwà Nyumà Mwîmpè àsangàjè mukàjì ewu mu kaabujimà. [Mwanèètù wa bakàjì awu ùdì wàmba ne: "Ndi ndòmba kàbidì ne, ùsambidilèku mwanàanyi wa balùme. Ncyèna mumumòne to kukàadi bidimu makumi àbidì."—Muf.] Ndi ndòmba bwà Nzambi àkutùmine mwanèèbè wa balùme awu, mwanèètù wa bakàjì, munanga. Nzambi àkubènèshè.

Taatù munanga, ndi ndòmba bwà mwanèètù wa bakàjì ewu. Mu kalolo kàà Nyumà Mwîmpè, swàku bwà Àlwe mpindyewu ondopè mwanèètù wa bakàjì ewu, mu Dîna dyà Yesù. Amen.

Àkubènèshèku, mwanèètù wa bakàjì.

Nzambì munanga, ndi ndòmba bwà mwanèètù wa balume, pàdiye mwimàne mwaba ewu ne mèmè mumutentèkèle byanza apa, ne ndòmba bwà dyondopiibwa dyèndè, mu Dìná dyà Yesù.

Àkubènèshèku, mwanèètù wanyi wa balùme. Èyo.

Mwànà mukesè wa balùme?

Nzambì munanga, pàndi ntentekela mwànà mukesè ewu byanza apa, ndi mmubènesha mu Dìná dyà Yesù Kilistò, bwà dyondopiibwa dyèndè.

Udi witabuuja mpindyewu anyi, mwanèètù wa bakàji? [Mwanèètù wa bakàji awu ùdi wàmba ne: “Èyowà.”—Muf.] Udi pèèbè muswe bwà nkusambidilè anyi?

²²⁶ Nzambì munanga, nyewù mmusambidila, pàndi mumutentèkèle byanza apa. Mpindyewu, eci's mmudimu Wèbè mutùtùma naawù, eci's ki ciWàkambà bwà kwenza ne: “Bimanyinu ebi nebifile bàdi biitabuuja. Bòbò batentèkèle babèèdi byanza, babèèdi nebàsangalè.” Wèwè ngwàkacyàmba, Mukalenge. Amen.

Mpindyewu, Yèyè ngwàkacyàmba, kî mmwômò anyi? Bikèngela biikalè mûshindù awu, mwanèètù wa bakàji.

Nzambì munanga, ndi ndòmba bwà Wòndopèku mwanèètù wa bakàji ewu ne ùmusàngajè, mu Dìná dyà Yesù Kilistò. Amen. Nzambì àkubènèshè, mwanèètù wa bakàji.

Udi mulwè mwikàle witabuuja anyi, mwanèètù wa bakàji?

²²⁷ Taatù wa mu Dyulu munanga, ndi ndòmba mabènesha Èbè pa mwanèètù wa bakàji, mwikàle ànu ntùmikila ciWàkambà bwà kwenza aci. Wèwè wàkamba ne: “Bimanyinu ebi nebifile bàdi biitabuuja. Bòbò batentèkèle babèèdi byanza,” Wàkamba ne: “nebàsangalè.”

²²⁸ Swayi ngiìmanèku ndambù kaaba aka, bwà kwambaku mu cyôci eci, ànu bwà kulekelakù bantu biikishèku katancì, ànu bwà katancì kakesè cyanààna. Mudyudi kampàndà, wàkangambila musangu kampàndà ne, kacyèna nànkù to. Kàdi, nudi numòna's, Yèyè wàkamba ne: “Bimanyinu ebi nebifilè.”

²²⁹ Nukàadi bumvwè Diyiisha dyànyì pa *Dilumbulwisha*, batèèke Yesù ku dilumbulwisha. Nwamònu's, Yèyè wàkambila Noà ne: “Mvùla neàlokè.” Mvùla kààkalòkakù to munda mwà bidimu lukàmà ne makùmi àbidì, kadi's nanshà nànkù wàkalòka. KwambilaYè Abraham ne ùvwa mwà kupetele mwànà kùdi Sarah. Kwenzekaci bidimu makùmi àbidì ne bitaanu pashìishe. Yèyè kàvwakù mwambè ne ndìbà kaayì to. Wàkamba ànu ne bàvwa mwà kupeta mwànà wa balùme. Bidimu makùmi àbidì ne bitaanu pashìishe, kwenzekaci. Nwamònu's, Yèyè kàvwakù mwambè ne ndìbà kaayì to.

²³⁰ Yèyè wàkamba ne: “Disambila dyà diitabuuja nedisungilè mubèèdi. Nzambì neàmujjuulè panshi. bòbò batentèkèle babèèdi

byanza, babèèdì nebàsangalè.” Ki cyàkambàYe anyi? Yèyè kààkamba ne nebàtupikè e kusangala ànu piine apu to. Wàkamba ne: “Nebàsangalè.” Nwamònu’s, ki mulayi Wèndè ngwôwò awu. Ki citùdì twétù twitabuuja ncyôci aci.

Lwàku, mwanèètù wa bakàjì. Udi witabuuja ne aci ncilelèlè anyi? [Mwanèètù wa bakàjì awu ùdi wàmba ne: “Èyowà, ndi ngiitabuuja.”—Muf.] Dìbà adi kakwèna mùshindù wa kukupangisha kwondopiibwa to.

Ndi ntentekela mwanèètù wa bakàjì byanza, mu Dìná dyà Yesù Kilistò, bwà dyondopiibwa dyèndè. Amen.

Udi witabuuja anyi, mwanèètù wa bakàjì? [Mwanèètù wa bakàjì awu ùdi wàmba ne: “Èyowà.”—Muf.] Mpèkaatù yònsò mmitonda, ne wèwè mudilongòlòle anyi?

Nzambì munanga, nyewù ntentekela mwanèètù wa bakàjì byanza, mu ditùmikila dyà dīyì Dyèbè ditùma, ne ndòmba dyondopiibwa dyèndè, mu Dìná dyà Yesù. Amen.

²³¹ Ndi muswè bwà nwènú bàdibo bàsambidila abu, ndi muswè bwà nùngaanyishilèku bwalu kampànda. Ndi muswè bwà nwaflakù bujaadiki, kumpàlà kwà masangisha aa kujikawù, bwà cìdì cyènzekà; ne nwènzèku ànu bwà ne batèèleji, bantu bakwàbo abu, bàmonè cìdì cyènzekà bulelèlè. Pàmwàpa mààlabà, ditùkù dyàlondà, anyi nì ndìbà kaayi, nwatàngilàayi ànu cìdì cyènzekà aci.

²³² Mikàndà yìndi mpeta mmileejè ne mbi—mbishìilangàne bikolè kutàmba byà kubàlekela ànu batèèta, bàpima diitabuuja dyàbò sungasunga cyanààna. Bwalu, Yesù wàkamba ne: “Bàdi bàbàtentekela byanza. Bàdi bàbàtentekela byanza, babèèdì nebàsangalè.” Mpìndyewu ikàlaayi bumvwè cyàkambàYe aci. Kààkamba ne nebàtupikè bànyeemakananganè eku ne eku bàya muulu bààlukila nànsha. Mbafwànyine kwenza nàнку. Kàdi Yèyè wàkamba ne: “Nebàsangalè.” Ki cyàkambàYe anyi? Ki cyàkambàYe ncyôci aci. Ki cìndi mèmè ngiitabuuja. Ne Yèyè ùdi kaaba aka mpìndyewu, Yèyè wàkamba Dīyì awu ùdi kaaba aka bwà kucyènza nàнку.

Wèwè udi witabuuja anyi, mukalenge? [Mwanèètù wa balùme awu ùdi wàmba ne: “Amen.”—Muf.]

Taatù wa mu Dyulu munanga, mwimànyine pa dijìkula dyà diitabuuja dyèndè ne mwikàle wìtabuuja, Nyewù mmutentekela byanza, mu Dìná dyà Yesù Kilistò, bwà dyondopiibwa dyèndè.

Nzambì munanga, nyewù ntentekela mukàjì ewu byanza, mu Dìná dyà Yesù Kilistò, bwà dyondopiibwa dyèndè. Èyo.

Taatù munanga, nyewù ntentekela mukàjì ewu byanza, mu Dìná dyà Yesù Kilistò, bwà dyondopiibwa dyèndè. Wèwè wàkamba ne: “Mukàjì ewu neàsangalè.”

Udi mudilongòlòle bwà dyondopiibwa anyi, mwanèètù wa bakàjì?

Nzambì munanga, nyewù mmutentekela byanza, mu Dîna dyà Yesù Kilistò, bwà Wèwè kumwondopa.

Èyo, mwanèètù wa bakàji, munanga, byònsò mbilongolola bwà dyondopiibwa anyi? Diitabuuja dyèbè dyashùishì mpindyewu kukùmbana, udi witabuuja ne neùmvwè bîmpè anyi?

²³³ Nènku, Nzambì, nyewù mmutentekela byanza, bwà kutùmikila dîyì Dyèbè ditùma ne: “Pa buloba bujima, kùdì cìfùkùlìbwà cyònsò.” Nyewù mmutentekela byanza, mu Dîna dyà Yesù, bwà dyondopiibwa dyèndè.

Nzambì munanga, nyewù ntentekela mwanèètù wa balùme byanza, mu Dîna dyà Yesù Kilistò, bwà dyondopiibwa dyèndè.

Nzambì munanga, nyewù ntentekela mwanèètù wa bakàji byanza, mu Dîna dyà Yesù Kilistò, bwà dyondopiibwa dyèndè.

[Katùpà kàà mukàbà wà mêyì munda mutupù—Muf.]... mpweka ne kajila aku. Ncivwa ànu muswè kunùtácisha to. Neùsàngalè bu wèwè mwà kwitabuuja aci mpindyewu.

Nzambì munanga, ndi ndòmba bwà Wòndopèku mwanèètù wa bakàji, mu Dîna dyà Yesù Kilistò. Amen.

[Katùpà kàà mukàbà wà mêyì munda mutupù—Muf.]... kungambulwishakù bwà kasambidila bantu aba.

²³⁴ Mpindyewu tudi ne ndambù wa mishwàlà mwab'ewu, ne bikwàbò, mwómò emu, byà kusambidila. Nènku ndi muswè bwà nwènu kutùngunuka ne kusambila pàmwè naanyi mpindyewu, mpindyewu, tubùkì tukesè etu, mpindyewu. Ndi mumanyè ne eci cidi cimwèka cyà pabwàcì menemene kùdì bantu bwà kusambidila kaacintu kakesè bu nùnkù ewu. Kàdi bu wèwè ànu mwà kubwela mu birò byànyì, musangu kampàndà, ne kutàngila ànu cyanààna's wè. Bu twikalakù balamè majaaniki à mu bidimu byònsò ebi, ngeela meeji ne kanùvwa bafwànyine kwikala baàtentàkàje ónsò pa cibùmbà cyà ku cyambilu eci to, àà bàdì bondopiibwe ànu ku ditùminangana dyà tulàmbà tusambidila etu mùshindù ewu, mìliyò mijimà, pa buloba bujimà. Mpindyewu, nudi bamanyè ne ncinyi—ncinyi aci anyi?

Muntu kampàndà àngacilè nsongà awu—awu mushwàlà awu. . . Neùmanyè mushwàlà wèbè, kì mmwómò anyi, mwanèètù wa balùme? Èyo.

²³⁵ Ne mèmè nkààdikù mumòne bàna bakesè, bàà bikalàbà bondopiibwe. Nènku nudi numòna's, cidici's, cidi ànu mmwaba wà dipetangana cyanààna, mùvwà Oral Roberts ne ciibidilu cyà kwamba's. Mmwaba nàka wà dipetangana. Tudi tusambila. Mpindyewu, katwena tudyènzela eci mu twètù to, tudi tucyènza bwalu Bible mmutùtùme ne mudimu wà dicyènza. Tudi bònsò bamanyè ne aci ncilelèlè.

²³⁶ Mpindyewu, kùdì bantu bààbùngì bàdì bàlaabà mishwàlà maanyi, ne bikwàbò. Èè, mpindyewu, tudi twela meeji ne abi

bìdi ànu bîmpè, cyà bushùwà's, kàdi bu twètù ànu. . . Bible kí mmwambè ne bàvwa “beela maanyi” pa mishwàlà to.

237 “Kàdi bàvwa bàngata mishwàlà pambidi pàà Pòlò.” Mpindyewu nudi numòna cîmvwà ngamba aci anyi? Mpindyewu, cîvwàbo bamòne, bukolè bufùùluludi bùvwà munda mwà Pòlò abu, ki kumanyabò ne ùvwa musadidi wa Nzambì. Bàvwa bamanyè ne Nzambì ùvwa munda mwèndè. Bàvwa bamanyè ne byònsò bìvwàye mulengè bìvwà bibènèshìibwe. Mbanganyi bàdi bûmvwa nànkù? Ambàayi ne: “Amen.” [Disangisha dîdi dyàmba ne: “Amen.”—Muf.]

238 Nudi numòna's, ngeela meeji ne Pòlò ùvwa ànu mu Mifundu mu bìvwàye wénza. Kanwènaayikù nwela meeji nànkù anyi? Nudi baswè bwà nkwàmbilè kúndi ngeela meeji ne nkwaikapetèlaye lungènyi lwà dicyènza anyi? [Muntu kampàndà ùdi wàmba ne: “Kùdì Elishà.”—Muf.] Kùdì Elishà, ncyà bushùwà. Nwamònu's, Eliyà wàkamba ne: “Angàta dikombo edi ùye kaditenteka pa mwànà awu.” Nenku mupròfètà wàkatùma dikombo bwalu ùvwa mumanyè ne cintu cyònsò cîvwàye mulengè cîvwà cibènèshìibwe. Ùvwa mumanyè kaaba kèndè. Yèyè. . . bu yèyè ànu mwà kufikisha mukàji awu ku diitabuuja cintu cîmwècimwè aci.

Mpindyewu nwamònu's, mpindyewu, kacya Bible kàtukù mwambè ne: “Nebàsambidilè babèèdi to.” Mmwambè ne: “Nebàtentekèlè babèèdi byanza.”

239 Mpindyewu anjì elàayibì meeji, bantu bààkamòna, mu mùpostòlo Peetèlò, Bwikadi bwà Nzambì bumwènèshìibwe mu muntu ewu, mu mùshindù wà ne bôbò—bôbò bààkalaadika mene ne bantu mu mundidìmbì wèndè, ne bantu abu kwondopiibwabò. Mbanganyi bàdi bamanyè ne aci ncyà mu Mifundu? Aci's m'Mufundu menemene ànu mùdì Yone 3:16 amu. Nwamònu's, byònsò abi's n'Diyi dyà Nzambì. Mpindyewu, bantu abu, s'nudi bamanyè ne mundidìmbì wà muntu awu kí ngùvwà wòndopa bantu.

240 Kàdi, tàngilàayi, piikalàbi ne bukolè bwà Nzambì bùvwà pa mupròfètà awu, munda mwà bidimu ne bidimu paanyimà pàà yèyè mumanè kufwà, mu mùshindù wà ne muntu wetù ewu mufwè bamwimànshe pa mubidi wèndè, mifùbà yèndè. Mubidi kawùciyipù mene to; mifùbà nyìvwàpu. Kàdi Bwikadi bwà Nzambì mbùvwà pa mifùbà ayi, mu mùshindù wà ne muntu mufwè awu wàkaalukila ku mwoyi.

241 Mpindyewu kanwènaayikù bamanyè ne Nzambì umwèumwè wàkenza bintu byònsò abi awu ùdi mwab'ewu dilòlò edi anyi? Bwà—bwànyì mèmè, ndi ngeela meeji ne bìvwà bikèngela bwà twètù kwikala bantu bàà disànkà ditàmbe pa buloba bujimà. Anjì elàayibì meeji ku bwalu ebu.

242 Ndi—ndi ntèkemena ne ncyèna mukèmèshe batèèleji bàanyi bwà kwitabuujabò ne ncintu cîndi mèmè mwinè ndyènzela to.

Nudi—nudi bamanyè bîmpè kutàmba aci. Mêmè, ndi mwanèènù wa balùme, nwamònu's, ne ndi ànu mwanèènù cyanààna.

²⁴³ Kàdi ndi cyà bushùwà mumanyè, ndi cyà bushùwà mumanye eci ne, Nzambi ùdi kaaba aka. Ne ndi mumanyè ne Yèyè mmutùpèeshe cintu kampànda, citùdi katùyi mwà kuumvwija to, ànu ku Diyì dyà Nzambi, dìdì dyàmba ne bivwa bìkèngela kwikalaci apa pa díbà edi. Pa nàнку, cidi kàbìdì citùpèesha dimanyishiibwa bwà kumanya ne tudi ne mwoyi mu matùkù à ndekeelu. Cidi citùpèesha dimanyishiibwa bwà kumanya ne bantu aba, basungula, basòbola, babìikidìibwe bwà kupàtuka, badyànjila kulongolola aba . . .

²⁴⁴ Mpindyewu, aci's mmwakù munène, *didyànjila-kulongolola*, kàdi tudi bònsò bamanyè ne mbulelèlè. Tudi bamanyè kakùyi mpatà to ne Nzambi udi kàyi mikàlù awu wàkadyànjila kulongolola bintu byònsò ku didyànjila-kumanya kumpàlà kwà difùkà dyà dyulu ne buloba, nànsha Mwàna wa mùkòòkò mwìnè wàkashiibwa; ne dínà dyònsò divwàku mwà kwikala mu Mukàndà adi, dyàkafùndiibwa mu Mukàndà kumpàlà kwà Mukàndà awu kufùndiibwawù. Mpindyewu mbanganyi bàdi bamanyè ne aci ncilelèlè?

²⁴⁵ Nènku Yesù wàkalwa bwà—bwà kupikula aba bàvwà mu Mukàndà. Mu Bible, Mwàna wa mùkòòkò wàkalwila paanyimà pàà cilùlù cikùdika, ne kwangata Mukàndà ne kukàngula Bitampì bivwàWu mukànga naabi abi, bwalu Wàkalwa bwà kunana bònsò bàkààvwàYe mupikùle abu. Yèyè ùdi Mwakwidyanganyi mpindyewu, Mwakwidyanganyi mwikàle wàkwila aba bàdiYe mupikùle. Yònsò mwena dínà dyàkafùndiibwa mu Mukàndà wà Mwoyi wà Mwàna wa mùkòòkò awu, wàkapikudiibwa.

²⁴⁶ Ànu mùmvwà mwambè diyì dikesè dyà dikàyàbale dilòòlò adi . . . Ndi mwindile . . . mishwàlà yònsò eyi mwab'ewu. Ncyèna ànu nteeta bwà kuyiisha kàbìdì to, kàdi ngàmì ne kùvwà diyì dikesè . . . Ndi ntèkemena ne eci kacyèna cyùmvwika bu cyà cinyangakaja cijila to, nwamònu's. Kàdi ànu mùvwà cidimè wàkatèeka nzòòlò wa cikuka mu ciswa, kàdi kàyi ne mayi bùngì bukùmbàne to, ki kupetayè diyì dyà mukankù, e kuditéekelayè nzòòlò wa cikuka awu nènku yèyè kutooya mukankù. Kàdi kàvwà kalùmyàna kàà pabwbwàkù munkaci mwà tuzòòlò twònsò atu, bwalu katùvwakù tùmòna bintu mùshindù wà mwomùmwe to. Kàdi aci ki cyònsò cìvwàku pààkù kamòne, cìvwà nnzòòlò wa cikuka awu. Kàvwà kùmvwa ànu diyì kampànda, kadiyi dyùmvwika bu dyàkù kòkò adi to. Anyì kakàvwà mwà kupàtula diyì bu dyà nzòòlò wa cikuka awu anyì tuzòòlò atu to. Kakàvwà kàànyisha byàdìdyà byàtù abi to, pàvwàtu tùdiila mu lupangu lwà nzòòlò amu apu. Kùvwà cintu kampànda cyà cishìllàngàne mu kòkò, kadi kakàyi kamanyè ne dishìllangana divwa cinyi to.

247 Ki pashìishe dīngà ditùkù, kùvwa maamù mukankù kampànda uvwa mumanyè ne ùvwakù mwelè mayi búngi kampànda. Ne kùvwa òmwè dyà ku mayi awu, òvwa ne cyà kwikala kànà kèndè kà balùme, òvwa dipangike. Ki kuyayè wènda ùkèbangana naakù, kàdi kukàanganayè mu lupangu lwà nzòòlò amu. Ki kwelàyè lubilà lukolè. Ne pàakeelàye lubilà lukolè alu, kànà kàa mukankù aku kumanyakù dīyì dyà maamù adi. Bu mwàkambà Yesù ne: “Mikòòkò Yànyì mmimanyè Dīyì Dyànyì.”

248 Ngeela meeji ne, makèlèlè dilòòlò, pāmvwà mumòne muyiiki wà ku tèlèviziyò wà ba-Baptistes, ba-Presbytériens, ne bakwàbò awu, bàvwa bafwànyine kwikala batooyishila mwinshi mwà nzòòlò wa cikuka. Òmfwilèku luse, wèwè mwanèètù wa balùme, wamònu’s. Kàdi Maamù ùvwa mumanyè ne Òvwa ne bananga Bèndè mwómò amu mwaba kampànda. Pa nànkù bantu abu biimàne mwab’awu, kabàyi bàlwishaa byàkudyà bìvwàbò bàpeta kùdi maamù cikuka awu to, ne bikwàbò, kàdi mpindyewu bóbò mmikankù, nudi numòna’s, yìdi yìbùùka bwà kakèba byàkudyà byànyì. Nwamònu anyi?

249 Nènku ngeela meeji ne èkèleeziyà ùdi bu cyalu cīmvwà mumòne ànu matùkù mashààle aa, pāmvwà ndwa mfùmina ku Tucson, anyi mfùmina ku—ku Phoenix, mutàngile ku Tucson. Mèmè kumòna cintu cyà kaciyi cyūmvwika to. Kàdi kwenzaci bu cimpandè mwoyi, pa kumòna cīvwa cyenzèke, mùvwà... kabemba, kàsòmbèèlè kàbùùka mu mpeepèlè aku’s, mwanààbò ne mukankù, wùdi cìfwànyikijilu cyà èkèleeziyà awu.

Ne Yèhowàh ùtu m’Mukankù. Wakabiiikila bapròfeta Bèndè ne m’“mikankù.” WàkaDibiiikila Nyèyè mwine ne, Yèhowàh, “Mukankù.”

250 Kàdi kabemba aka kàkaadi kajimije dimanyishiibwa dyàkù kùkaadi ntàntà mule, bwalu kakàcyèna kàbìdi kèndela mu mpeepèlè kènda kàkèba cyàkudyà cyàkù mùvwàku ne cyà kwikala kàkèba to. Kàdi kakaadi kasòmbè pa nshinga yà tèlèfonè ne kènza maalù bu cidy’à bibolè. Kàdi—kàdi kènda kakèbangana ne tùlulù tufwè tùdi tushipa ku màshinyi, ne kòkò ne nkùmbikùmbi bìdi bìpàtuka bikadiila pāmwe. Kàdi kàtùpika bu nkùmbikùmbi, pamutù pàa kwendakù mùvwàbi bikèngela bwà kòkò kwenda. Nkàjimije dimanyishiibwa dyàkò.

251 Kàdi ndi ngamba eci ne dinanga dyònsò dyà difwanà dyà Nzambi ne kaneemu ne, èkèleeziyà mmujimije dimanyishiibwa dyèndè bu mwanèètù wa bakàji mukankù kùkaadi ntàntà mule. Mmusòmbè panshi. Pamutù pàa kwondola mu Dīyì bwà kujandula maalù aa nī ngàa bushùwà, mmwindile mushiki wà mikànda yà kubala yà kalaasà kàa Dyàlumingu yìdi mikwàtakaja kùdi musùmbà wà beena mamanya a mu mitù mu mwaba kampànda, kàlulù kampànda kafwè kàa kashipeela mu mungà mwaba. Òtùpika bu nkùmbikùmbi!

ùmukè àye. Nènkú swàku bwà bantu bàtungunukè ne lwendu too ne ku Buloba bulaya, biikàle ne mubidi tumatuma ne makàndà. Pàvwa Izàlèlèlè wènda wèndela mu cipèèla, kakùvwa muntu nànsha umwe ne butekètè munkaci mwàbò to, ku ntengu mukwàbò aku. Swàku bwà byènzekelèku bantu aba, Taatù, bwalu tudi tutùma mishwâlà eyi, mu Dìnà dyà Yesù Kilistò. Amen.

²⁵⁶ Nzambi ànubènèshè, muntu ne muntu. Panùdi nupeta mishwâlà yènù mpindyewu apu, itàbùùjaayi ne mwoyi wènù wònsò. Nudi witabuuja ne Nzambi ùdi ùmvwa cyôci eci anyi? Nwamònu anyi? Ndi—ndi muswè kwamba nùnkú ewu. Kanwèdikù, kanwèdikù mpatà to, nànsha kakesè. Nwamònu's, cidi mwà kumwèka cyà pabwàci cyà menemene. Mfwilaayikù luse, katanci kakesè cyanàànà. Kanwèdikù mpatà to, nànsha kakesè. Kàdi itabùùjaayi mpindyewu ne, citwàlòmbu aci, Nzambi ùdi ucifila.

²⁵⁷ Udi witabuuja ne aci n'Nzambi kaaba aka, udi mumanyè munsokòntù wà mwoyi wèbè anyi? Udi mumanyè ne witabuuja ne awu n'Nzambi anyi? Mpindyewu sòmbeshà ànu meeji èbè awu mpindyewu ne, kacyèna mwà kwikala cingà cintu to. Nwamònu anyi?

²⁵⁸ Mpindyewu, ambàbi túng bu ne nkufwànyìne kwikala mààlabà munènè, kule kwàka kùkaadi kupite bidimu eci cishààle bwalu-bulonda. Nènkú pìikalà bantu, mu bidimu bicilwalwà, bu byòbì mwa kwikala nànkú, bóbò's bàvwa mwà kulwa kwamba ne: “Èè, bu ne mvwakù ne mwoyi mwinè musangu awu's, nùnkú's ndi mumòne aci cyenzèke, balùmyànà wa yààyà, s'ki cyònsò cívwa cikèngela bwà mèmè kumanya aci's. Nùnkú's ndi mucitàbùùje ànu piinè apu!” Nwamònu's, cintu cimwècimwè cyùdi witabuuja aci, bu wèwepù pàakacyènzàYe musangu awu apu! Vùlukà ne, ùcidi ànu Yèyè awu. M'Mwoyi Wèndè munda mwèbè. Nzambi ànubènèshè.



ÛJAADIKÀ Dîyî DYÈNDE LUA65-0426
(Proving His Word)

Diyyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu Dimwè dilòdòlò, dya matùkù 26 à ngondo mwinàâyì, cidimu cyà 1965, bwà Mpungilu wa Buloba bujima wa Bwobumwè bwà Beena Kantu-ku-Byanza ku Hôtel Ambassade mu Los Angeles, Californie, U.S.A. Ndyumusha pa mukaba wa mêyî ne dituuta ku cyamu mu kaabujima kààdî mu Anglais. Nkudimwinu wa mu Ciluba ewu mmutuuta ku cyamu ne mwabanya kùdî Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwîlà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org